



VOL. 66 | N° 02 | 2025
ISABUKURU Y'IMYAKA IJANA

Imyaka
 IVUGURURA

INTEGUZA *y'ubugorazi*

Kongererwa imbaraga n'Imana Ubuheruka

Imvura y'Itumba n'Irangira ry'Umurimo w'Imana



Icyumweru cyo Gusenga, 11 - 20 Nyakanga 2025



Ibishiyrwa mu Mwanya wa Mbere

Hariho ibihe mu buzima; aho duhura n'ikibazo gikeneye kwitabwaho byihutirwa. Mu masaha aheruka mbere yuko Abisirayeli bava muri Egipura, igihe cyari kigufi. Bahawe amabwiriza n'Imana arebana n'ifunguro rya Pasika: "Uku abe ari ko muzazirya: muzazirye mukenyeye, mukwese inkweto, mwitwaje inkoni, muzazirye vuba vuba. Iyo ni yo Pasika y'Uwiteka." (Kuva 12:11).

Nta gihe cyo gutegereza cyari gihari, nta binezeza byo kuruhuka mu bwisanzure umuntu atambaye inkweto, ndetse nta n'umwanya bagize wo gushyira hasi inkoni. Abantu bagombaga gusangira iringo funguro ry'ikigereranyo hutihuti. Kubera iki?

Imana yarasobanuye iti: "Kuko muri iringo joro nzanyura mu gihugu cya Egiputa nkica abana b'imfura bose bo mu gihugu cya Egiputa, imfura z'abantu n'uburiza bw'amatungo. N'imana z'Abanyegiputa zose nzasohoza amateka nziciriye ho. Ndi Uwiteka. Ayo maraso azababere ikimenyetso ku mazu murimo, **nanje ubwo nzabona ayo maraso nzabanyuraho**, nta cyago kizababaho ngo kibarimbure, ubwo nzatera iringo gihugu cya Egiputa." (Kuva 12:12,13).

Cyari ikibazo cyerekeye ubugingo n'urupfu. Bagombaga gushyira igihe cyabo mu mwanya wa mbere bakurikije amabwiriza y'Imana.

Mbese ntituduna ko natwe turi mu mimerere nk'iyabo muri iki gihe? "Dore umwijima w'icuraburindi uzatwikira isi, umwijima w'icuraburindi uzatwikira amahanga." (Yesaya 60:2). Mbese muri iki gihe ntituduna umwijima w'icuraburindi mu mbaga y'abantu bari mu rujijo rwa Babuloni? "Iraguye iraguye, Babuloni ikomeye! Ihindutse icumbi ry'abadayimoni, aharindirwa imyuka mibi yose n'ibisiga byose bihumanye kandi byangwa. Kuko amahanga yose yanyoye inzoga ari zo ruba ry'ubusambanyi by'ubo mudugudu, kandi abami bo mu isi basambanaga na wo, abatanzi bo mu isi bagatungishwa n'ubwinshi bw'ubutunzi bwawo no kudamarara." Numva irindi jwi rivugira mu ijuru riti "**Bwoko bwanje, nimuwusohokemo kugira ngo mwe gufatanya n'ibyaha byawo, mwe guhabwa no ku byago byawo. Kuko ibyaha byawo byarundanijwe bikagera mu ijuru, kandi Imana yibutse gukiranirwa kwavo.**" (Ibyahishuwe 18:2 – 5).

Na none, icyo ni ikibazo cy'ubugingo cyangwa urupfu. Abami n'abacuruzi bayobora umuryango mugari w'abantu, bari mu mutego wo kugirana umushyikirano utemewe n'amategeko n'abantu batumaga urujijo rwa Babuloni rugumaho. Ni gute twakwirinda uwo mutego burundi? Ni gute dushobora gufasha abandi bakawukurwamo?

Ubu ngubu tumaze imyaka 100 turiho. Icyo dushimira Imana, ni uko hari byinshi twagezeho kubw'ubuntu Bwayo. Ariko kandi hari byinshi cyane bitaragerwaho. Bityo rero, igihe ni gito rwose.

"Umurimo itorero ritashoboye gukora mu gihe cy'amahoro no kugubwa neza, rizagomba kuwukora mu gihe giteye ubwoba no mu bihe by'urucantege no kubuzwa amahwemo. Imiburo yacecekeshejwe ndetse ikaburizwamo no kwihuza n'ab'isi izatangwa mu gihe cyo kurwanywa bikomeye n'abanzi bo kwizera."¹

Nibyo, dukeneye kwihuta. Tugomba "gucunguza uburyo umwete kuko iminsi ari mibi" (Abefeso 5:16). Gusukwa k'Umwuka Wera mu buryo bwuzuye kwarakererewe cyane, icyakora ntibyatewe ntibyatewe n'uburangare bw'Imana yacu itunganye; ahubwo byatewe n'uko twebwe tutigeze tugira inzara n'inyota byo guhabwa Umwuka – kandi koko ntabwo tumwiteguye mu buryo bwuzuye binyuze mu buntu Bwe.

"Mbese twaba turi gukingurira Yesu urugi rw'umutima, maze tugafunga inzira zose Satani ashobora kwinjiriramo? Mbese buri munsi twakira umucyo mwinshi kurushaho n'imbaraga nyinshi kurushaho, kugirango dushobore guhagarara mu gukiranuka kwa Kristo? Mbese twaba turimo dukura mu mitima yacu ukwikanyiza kose, kandi tukayiboneza, twitegura kwakira imvura y'itumba ivuye mu ijuru?"²

Kristo yaduciriye inzira binyuze mu kubambwa Kwe, kuzuka Kwe, no kuzamurwa mu ijuru Kwe. Muri iki gihe dukeneye Umwuka Wera kuruta ikindi gihe cyose cyatambutse. Gusengana umwete tumusaba, nibyo bikwiriye kuza ku mwanya wa mbere.

¹Ibihamya by'itorero, vol 5, p.463.

²Historical Sketches, p.155.



Icapiro ry'itorero ry'Abadiventisiti b'Umunsi wa Karindwi

Bavugurura

"Icyo isi ikeneye cyane kurusha ibindi byose ni abantu batagurwa cyangwa ngo bagurishwe" – Uburezi, p.57.

Umwanditsi Mukuru
Umwanditsi Wungirije
Ushinzwe Ubugen'i no
Gutunganja Igitabo

L. Tudorou
B. Montrrose
E. Lee

INTEGUZA Y'UBUGOROZI[®] (ISSN 0482-0843) ifite imiterere

y'ibinyamakuru, ikavuga ku nyigiso ya Bibiliya izakungahaza imibereho y'iby'umwuka y'abashaka kumenya Imana biruseho. Icapwa buri mezi abiri n'Inteko Nkuru Rusange y'Abadiventisiti b'Umunsi wa Karindwi Bavugurura, Agasanduku k'Posita 7240 Roanoke, VA 24019 – 0240, USA.

Biçapwa kandi Bigakwirakwiza n'icapiro ry'Integuza y'Ubugoroz. Ushaka gutera inkunga no gufasha uyu murimo wakwifashisha imyirondoro ikurikira: Periodical postage paid at

Subscription rates:

United States: \$18.00; Foreign countries: \$16.00 plus shipping;

Single issue: \$4.00 plus shipping

www.subscriptions.reformationherald.com

POSTMASTER: Send address changes to The Reformation Herald,

Kongererwa imbaraga n'Imana Ubuheruka

Iyo ikintu gishimangiwe [kikongererwa imbaraga], kirushaho gukomezwa kugirango kitamenagurika mu gihe bitagenze gutyo ubundi mu busanzwe cyakwangizwa n'igitutu gikomeye cyane.

Kuri twe bimeze bite? Mbese wumva ufite imbaraga zidasanzwe haba mu buryo bw'umubiri, mu bwenge, no mu by'umwuka? Muri iki gihe cy'amateka kirangwamo akaga, abizera bose bagomba kwiyumvisha intege nke zacu n'aho ubushobozi bwacu bugarukira, kandi bakamenya ko dukeneye cyane Imana ishoborabyose.

Imana mu mbabazi Zayo izi byinshi byatuma twungukirwa biturutse mu burinzi bw'inyongera twahabwa ubu, bityo muri uyu mwaka wo kwizihiza isabukuru y'imyaka 100 habayeho Abadiventisiti b'Umunsi wa Kariindwi Bavugurura; tuzi ko dukeneye kongererwa imbaraga n'Imana ubuheruka kugirango turangize umurimo wahawé indahemuka muri iyi minsí y'imperuka.

Mu gihe duteraniye hamwe twicishije bugufi kugirango twifatanye muri iki Cyumweru Cyihariye cyo Gusenga, tugomba gusenga dushyizeho umwete dusaba gusukirwa Umwuka Wera mu buryo bwuzuye. Iri "hembura" ni ukongererwa imbaraga yasezeranywe mu buryo bw'igitangaza iturutse mu Ijuru, kandi igomba gutangwa mu buryo burangwamo ineza kandi bworoheje.

Ibyigisho byo muri iki Cyumweru Cyihariye cyo Gusenga bigaragaza iyo mimerere hamwe n'imigisha myinshi umuntu ashobora kubona binyuze mu kwakira Umwuka Wera mu mbaraga y'imvura y'itumba.

Uko tuzagenda twiga ibyo byigisho bifite insanganyamatsiko ivuga ngo 'Kongererwa Imbaraga n'Imana Ubuheruka' dufite intego yo kubahiriza by'ukuri ibyo bisabwa, tukaba twiteguye kwakira iryo sukwa [ry'Umwuka Wera]; ni nako ukwizera kwacu kuzagororerwa mu buryo bukomeye cyane. Nimutyo kandi dushishikarire kugeza ku bandi imigisha ikungahaye iboneka muri ibyo byigisho twiga; bashobora kuba bari bonyine cyangwa baheze mu rugo.

Uwiteka abagirire ubuntu; asubize ibyifuzo byose bivuye ku mutima by'abantu bose bashishikariye gushaka uku kongererwa imbaraga no guhabwa Umwuka Wera mu mbaraga y'imvura y'itumba muri iki Cyumweru Cyihariye cyo Gusenga.

Ibirimo:

1 Amavuta ahora asukwa	4 Inuma yo mu Ijuru	9 Inzabya zirimo Ubusa
-------------------------------	----------------------------	-------------------------------

4 Uburyo bwo Gutegura Amafunguro	5 Gukurwa mu Bigera-gezo Bikaze	6 Imbaraga ziri mu kunga Ubumwe
---	--	--

7 Kunesha no Gukome-za Kunesha	34
---------------------------------------	-----------

1 Amavuta ahora asukwa

Kuwa Gatandatu, 11 Nyakanga 2025

Byasonzoranyijwe bikuwe mu Nyandiko za Ellen G. White

"Icyo gihe ubwami bwo mu ijuru buzagereranywa n'abakobwa cumi bajyanye amatabaza yabo, bajya gusanganira umukwe. Ariko muri abo cumi, abatanu bari abapfu, abandi batanu bari abanyabwenge. Abapfu bajyanye amatabaza yabo ntibajyana n'amavuta, ariko abanyabwenge bo bajyana amavuta mu mperezozabo hamwe n'amatabaza yabo. Umukwe atinze bose barahunikira, barasinzira. "Ariko nijoro mu gicuku habaho urusaku ngo 'Umukwe araje, nimusohoke mumusanganire!' Maze ba bakobwa bose barahaguruka baboneza amatabaza yabo. Abapfu babwira abanyabwenge bat'i 'Nimuduhe ku mavuta yanyu, kuko amatabaza yacu azima.' Ariko abanyabwenge barabahakanira bat'i 'Oya, ntiyadukwira twese, ahubwo nimujye mu bahanjuzi muyigurire.' Bagiye kugura, umukwe araza, abari biteguye binjirana na we mu bukwe, urugi rurakingwa. "Hanyuma ba bakobwa bandi na bo baraza, barahamagara bat'i 'Nyakubahwa, dukingurire.' Na we arabasubiza ati 'Ndababwira ukuri yuko ntabazi.' "Nuko mube maso, kuko mutazi umunsi cyangwa igihe" (Matayo 25:1 – 13).

Amavuta y'izahabu

"Muhore mukenyeye kandi amatabaza yanyu yake, mumere nk'abantu bategereza shebuja aho agarukira ava mu bukwe, kugirango ubwo azaza nakomanga bamukingurire vuba. Hahirwa abagaragu shebuja azaza agasanga bari maso. Ndababwira ukuri yuko azakenyera, akabicaza akabahereza. Naza mu gicuku cyangwa mu nkoko agasanga bameze batyo, bazaba bahirwa... Namwe muhore mwiteguye, kuko Umwana w'umuntu azaza mu gihe mudatekereza."

Aha ngaha duhabwa umuburo wo kutagomwa imitima yacu ngo tuyime amahirwe Uwiteka yatanze, kugirango tube abatunzi mu byo kwizera kandi tube n'abaragwa nk'uko byasezeranywe.

Tugomba gukomeza kuba maso mu gihe dutegereje ukugaruka k'Umwami. Ibimenyetso bya mbere bigaragaza ko umuntu asinziriye mu buryo bw'umwuka bigomba kurwanywa mu buryo bukomeye. Imbaraga zibanza zitwerekeza ku bunebwe bw'iby'umwuka zigomba kurwanywa cyane. Intumwa Petero yatanze inama igira iti: "Mwirinde ibisindisha, mube maso." Buri gihe kigomba gukoreshwa mu budahemuka. "Uwihangana akageza imperuka, niwe uzakizwa." Tubwirwa gukorera agakiza kacu, kandi uburyo tugomba kugakorera bugaragazwa muri aya magambo ngo: "Kuko Imana ariyo ibatera gukunda no gukora ibyo yishimira."

Abashaka kwitegura gusanganira Umwami wabo bagomba guhora buzuza amatabaza yabo amavuta y'ubuntu. Kwirengagiza ibi ngibi nibyo byatumye abakobwa b'abapfu batandukana n'abakobwa b'abanyabwenge. Bari bafite amatabaza, ariko ntibari bafite amavuta; imico yabo ntiyashoboye gutsinda ikigeragezo. Abakobwa b'abanyabwenge ntibari abahanga mu kumenya ukuri gusa, ahubwo kubw'ubuntu bwa Kristo; ukwizera kwabo, kwihangana kwabo, n'urukundo rwabo, byakomezaga kwiyongera. Amatabaza yabo yongeraga kuzuzwa n'uko bari baftanye umushyikirano na Mucyo w'isi. Mu gihe abakobwa b'abapfu babyukaga bagasanga amatabaza yabo yazimye, cyangwa bakagendera mu mwijima, abakobwa b'abanyabwenge bo binjiye mu nzu y'ibirori amatabaza yabo yaka cyane, maze inzugi zirafungwa.

Abashaka kwitegura gusanganira Umwami wabo bagomba guhora buzuza amatabaza yabo amavuta y'ubuntu.



Amavuta abakobwa b'abanyabwenge bujuje mu matabaza yabo agereranya Umwuka Wera. Zekariya yaranditse ati: "Marayika twavuganaga agaruka aho ndi, arankangura nk'uko umuntu akangurwa akava mu bitotsi, arambaza ati "Ubonye iki?" Ndamusubiza nti: Ndarebye mbona igitereko cy'itabaza cy'izahabu cyose, kandi mbonye n'urwabya rwacyo ruteretse hejuru yacyo, mbona n'amatabaza arindwi yo kuri cyo. Kandi ayo matabaza ari hejuru yacyo yose, itabaza ryose ryari rifite imiheha irindwi. Kandi impande zombi hari imyelayo ibiri, umwe wari iburyo bw'urwabya, undi wari ibumoso bwarwo.... Ndongera ndamubaza nti "Iriya myelayo uko ari ibiri, umwe uri iburyo bw'igitereko cy'amatabaza, undi ukaba ibumoso bwacyo isobanurwa ite?" Nongera kumubaza ubwa kabiri nti "Ariya mashami y'imyelayo abiri, ari impande zombi z'imibirikira y'izahabu uko ari ibiri, akikamuramo amavuta asa n'izahabu asobanurwa ate?" Arambaza ati "Ariya ntuzi uko asobanurwa?" Ndamusubiza nti "Oya nyagasani." Arambwira ati "Ariya mashami ni ba bantu babiri bejeshejwe amavuta, bahora bahagaze imbere y'Umwami w'isi yose."

Binyuze mu biremwa byera bizengurutse inteve ye y'ubwami, Uwiteka ahora ashyikirana n'abatuye isi. Amavuta y'izahabu agereranya ubuntu Imana ikoresha kugirango amatabaza y'abizera akomeze kwaka. Iyo ayo mavuta adasukwa avuye mu ijuru mu butumwa bw'Umwuka w'Imana, abakozi b'umubi bari gutegeka abantu mu buryo bwuzuye. Imana irasuzugurwa mu gihe

tutakiriye itumanaho itwoherereza. Bityo twanga amavuta y'izahabu yashakaga gusuka mu mitima yacu kugirango abwirwe abakiri mu mwijima. Igihe hazabaho guhamagarwa ngo: "Umukwe araje, nimusohoke mumusanganire", abantu batigeze bakira amavuta yera, batigeze bimenyereza kugira ubuntu bwa Kristo mu mitima yabo, bazasanga bameze nk'abakobwa b'abapfu, ku buryo bazaba batiteguye gusanganira Umwami wabo. Bo ubwabo nta bushobozi bifitemo bwo kugira ayo mavuta ndetse n'ubugingo bwabo burarimbustse. Ariko Umwuka w'Imana naramuka asabwe, nidusaba nka Mose duti: "nyereka ubwiza bwawe", urukundo rw'Imana ruzasukwa mu mitima yacu. Tuzahabwa amavuta y'izahabu.¹

Ugusukwa kw'amavuta

Ubwoko bw'Imana bugomba kuba umuyoboro ukoreshwa n'imbaraga ziruta izindi zose mu ijuru no mu isi. Mu iyerekwa rya Zekariya, ibiti bibiri by'imyelayo bihagaze imbere y'Imana biggereranya n'ibisuka amavuta y'izahabu akanyuzwa mu miyoboro y'izahabu, akajya mu rwabya rwo mu buturo bwera. Ayo mavuta niyo atuma amatabaza yo mu buturo bwera yaka, kugirango ahore amurika kandi atange umucyo. Kubw'ibyo; umucyo w'Imana, urukundo Rwayo, n'imbaraga Zayo, bituruka ku basizwe bahagaze imbere y'Imana, bigahabwa ubwoko Bwayo, kugirango na bo bashobore kugeza ku bandi umucyo, umunezero, n'hembura. Bagomba kuba imiyoboro abakozi b'Imana bakoresha kugirango bageze ku b'isi urukundo rw'Imana.



Kuki utahitamo umuntu umwe wo gusengera muri iki Cyumweru cyo Gusenga? Reka uwo muntu ameny e ko uzamurengera, kandi wibuke kubikora. Muri iki Cyumweru cyo Gusenga nzassenger

**Gusubiza amaso inyuma no
Kurabagirana**

Kuvugurura bikubiyemo ibikorwa!
Nimureke turabagirane ibikorwa bya Kristo
binyuze mu bikorwa bituranga:

Umugambi Imana ishaka gusohoreza mu bwoko Bwayo bwo muri iki gihe uhwanye n'uwo yifuje gusohoreza mu Bisirayeli igihe yabavanaga muri Egiputa. Ab'isi bashobora kubona imico y'Imana kubwo kwitegerezza ubugiraneza, imbabazi, ubutabera, n'urukundo by'Imana bigaragarira mu itorero. Bityo amategeko y'Imana nagaragarira mu mibereho, n'ab'isi bazamenza ko abakunda Imana, bakayubaha, kandi bakayikorera baruta abandi bantu abo ari bo bose bari ku isi. **Uwiteka areba buri wese mu bagize ubwoko Bwe; afite imigambi kuri buri muntu wese.**²

Umucyo wakwiriye isi yose

Ubutumwa bw'ibyiringiro n'imbabazi bugomba kujyanwa ku mpera z'isi. Umuntu wese ubishaka, ashobora gushyikira kandi akagundira imbaraga z'Imana, akabana na Yo amahoro, kandi azagira amahoro. Abapagani ntibazongera kuba mu mwijima w'icuraburindi. Umwijima uzatamururwa n'imirasire y'umucyo wa Zuba ryo Gukiranuka. Imbaraga z'ikuzimu zaratsinzwe.

Ariko kandi, nta muntu ushobora gutanga icyo na we ubwe adafite. Mu murimo w'Imana nta kintu na kimwe abantu bashobora gutangiza. Nta muntu ushobora kwihindura umutwaramucyo w'Imana akoresheje umuhati we bwite. Ni amavuta y'izahabu intumwa zo mu ijuru zisuka mu miyoboro y'izahabu; kugirango akurwe mu rwabya rw'izahabu ashirwe mu matabaza yo mu buturo bwera, bityo ahore amurika kandi atange umucyo. Urukundo Imana ikunda umuntu nirwo rumushoboza gutanga umucyo. Amavuta y'izahabu atemba nta nkomyi, mu mitima y'abantu bose bunze ubumwe n'Imana kubwo kwizera, kugirango bongere kumurikira mu mirimo myiza, mu murimo nyakuri kandi uvuye ku mutima bakorera Imana.

Mu mpano ikomeye kandi itagerwa y'Umwuka Wera hakubiyemo ubutunzi bwose bw'ijuru. Si ukubera ko hari icyo Imana ikumira kugirango ubutunzi bw'ubuntu Bwayo butagera ku bantu. Abantu bose baramutse bagize ubushake bwo kwakira [ubwo buntu], bose bakuzuzwa Umwuka w'Imana.

Umuntu wese afite amahirwe yo kuba umuyoboro muzima Imana ishobora gucishamo ubutunzi bw'ubuntu Bwayo ikabugeza ku batuye isi, aribwo butunzi butarondoreka bwa Kristo. Nta kintu Kristo yifuza cyane nk'abantu bazagaragariza abatuye isi Umwuka We n'imico Ye. Nta kintu isi ikeneye cyane nko kugaragazwa k'urukundo rw'Umukiza rugaragarije mu muntu. Ijuru ryose ritegerezza imiyoboro ishobora gucishwamo amavuta yera kugiramo abere imitima y'abantu ibyishimo

n'umugisha.³

Buri wese ni igikoresho

Nyamara keretse gusa abagize Itorero ry'Imana muri iki gihe nibagirana umushyikirano muzima na Sōko yo gukura mu by'umwuka, naho ubundi ntibazaba biteguye igihe cy'isarura. Keretse gusa nibakomeza kuboneza amatabaza yabo kandi akagumya kwaka, nabitaba bityo ntibazongererwa ubuntu mu gihe bazaba babukeneye mu buryo budasanzwe.

Abahora bakira ubwo buntu nibo gusa bazahabwa imbaraga ihwanye n'ubukene bwabo bwa buri munsi kandi bahabwe n'ubushobozi bwo kuyikoresha. Aho kugira ngo bategerezza igihe kizaza ubwo binyuze mu mpano y'umwihariko y'Umwuka bazahabwa ubushobozi butangaje bwo gukiza imitima, bahora biyegurira Imana buri munsi kugira ngo ibahindure ibikoresho

Byayo bikwiriye. Bahamya Umwami wabo buri munsi n'aho baba bari hose, haba ahantu hacishije bugufi bakorera mu miryango cyangwa mu ruhame....

Ku mukozi werejwe umurimo w'Imana, hari uguhumurizwa gutangaje kuri mu kumenya ko na Kristo mu buzima Bwe hano ku isi yasabaga Se buri munsi kugira ngo amwongere ku buntu akeneye. Yavaga muri uko gusabana n'Imana ajya gukomeza abandi no kubahesha umugisha. Itegerezze Umwana w'Imana yicishije bugufi asenga asaba Se! ariko **ku bantu biyeguriye umurimo we burundu abasezeranira ubufasha mvajuru.** Urugero Rwe bwite ni icyemezo cyerekana ko gusaba Imana bivuye ku mutima, udacogora mu kwizera; kwa kwizera kuyobora umuntu ku kugengwa n'Imana burundi ndetse no kwirundurira mu murimo Wayo; bizazanira abantu ubufasha bw'Umwuka Wera mu rugamba barwanya icyaha.⁴

Ighari ubu ngubu

Ubutunzi bwose bw'ijuru butegerezje ko tubusaba maze ngo tubuhabwe; kandi uko duhawe umugisha, niko natwe tugomba kuwutanga. Uko niko amatabaza yera asukwamo [ibituma amurika], maze itorero rikaba umutwaramucyo mu isi.

Uwo niwo murimo Uwiteka yifuza ko buri muntu wese ategurirwa gukora muri iki gihe, mu gihe abamarayika bane bagifashe imiyaga ine, kugirango itarekurwa kugeza igihe abagaragu b'Imana bamariye gushyirwaho ikimenyetso mu ruhanga rwabo. Iki si igihe cyo kwishakira ibinezeza. Amatabaza y'umutima akwiriye kugabanyirizwa urumuri. Agomba gushyirwamo amavuta y'ubuntu.

Hagomba gufatwa ingamba zose zishoboka kugirango hirindwe gucika inteqe

**Umuntu wese afite
amahirwe yo kuba
umuyoboro muzima
Imana ishobora
gucishamo ubutunzi
bw'ubuntu Bwayo
ikabugeza ku batuye
isi, aribwo butunzi
butarondoreka bwa
Kristo.**



mu by'umwuka, naho ubundi bitagenze bityo umunsi ukomeye w'Uwiteka wazadutungura nk'umujura wa nijoro. Ubu noneho, buri muhamya w'Imana agomba gukorana ubwenge akurikije uburyo Imana yashyizeho. Buri munsi tugomba kugira ubunraribonye buzima kandi bwimbitse mu murimo wo kuboneza imico ya Gikristo. **Tugomba guhabwa amavuta yera buri munsi kugirango tuyageze no ku bandi.** Bose bashobora kuba abatwaramucyo, bakawugeza ku b'isi niba babishaka. Muri Yesu, tugomba kureka kwirebaho ubwacu. **Tugomba kwakirira ijambo ry'Uwiteka mu nama no mu nyigisho,** kandi tukaribwira abandi tunezerewe. Ubu hakenewe amasengesho menshi. Kristo arategeka ati: "Musenge ubudasiba", ni ukuvuga ko umutima wanyu ukwiriye kwerekezwa ku Mana, Yo sôko y'imbaraga zose n'ubushobozi bwose.

Dushobora kuba tumaze igihe kirekire tugendera mu nzira ifunganye, ariko nta mutekano uri mu gufata ibyo nk'ikimenyetso cy'uko tuzayigenderamo kugeza ku mperuka. Niba twaragendanaga n'Imana mu gusabana n'Umwuka, biterwa n'uko tuyishakisha buri munsi kubwo kwizera. Amavuta y'izahabu ava mu biti bibiri by'imyelayo, agatemba anyura mu mibirikira y'izahabu, niyo twamenyeshejwe. Ariko abantu batimenyereza kugira umwuka wo gusengo, ngo bibe akamenyero; ntibashobora kwitega guhabwa amavuta y'izahabu yo kugira neza, kwihangana, ubugwaneza, n'urukundo.

Buri wese agomba kwitandukanya n'isi yuzuye gukiranirwa. Ntitugomba kugendana n'Imana mu gihe runaka gusa, noneho tugatandukana na Yo, maze tukagendera mu mucyo twicaniye ubwacu. Hakwiriye kubaho gukomeza gushikama no kwihangana mu bikorwa byo kwizera....

Igihe turimo ubu, ni igihe cyo gutangwa k'Umwuka Wera agahabwa abamusaba. Nimusabe umugisha We. Igihe kirageze kugirango turusheho kugaragaza ko twiyeguriye Imana. Twebweho twashinzwe umurimo utoroshye, ariko ushimishije, kandi ufite ubwiza bwo guhishurira Kristo abari mu mwijima. Turahamagarirwa kwamamaza ukuri kudasanzwe kugenewe iki gihe. Kugirango ibyo byose bishoboke, ni ngombwa ko Umwuka Wera asukirwa abantu. Tugomba gusenga tumusaba. Uwiteka ategereje ko tumusaba. Uwo murimo ntabwo twawukoranye umutima wacu wose.⁵

Mbese ndi kuba inkomyi yo gusukwa [k'Umwuka Wera]?

Ntabwo Umwuka Wera azigera asukwa igihe cyose hakiriho amakimbirane no gusharirirana hagati y'umwizera n'undi mu bagize itorero. Igomwa, ishyari, kunegurana, no kuvuga amagambo mabi ni ibya Satani, kandi byitambika mu nzira rwose bikabuza Umwuka Wera kugira icyo akora. Nta kintu kintu muri iyi si Imana ikunda cyane nk'itorero Ryayo. Nta kintu irinda icyitayeho kandi igafuhira nkaryo. Nta kintu na kimwe gitukisha Imana nk'igikorwa cyangiriza imbaraga ihindura y'abari gukora umurimo Wayo. Abantu bose bafasha Satani mu murimo we wo kujöra no guca intege, Imana izababaza.

Abantu batagira impuhwe, ubugwaneza n'urukundo, ntibashobora gukora umurimo wa Kristo. Mbere yuko ubwo buhanuzi busohora, "Umunyantege nke azaba nka Dawidi" kandi ab'inzu ya Dawidi bazaba "nka marayika w'Uwiteka", abana b'Imana bose bagomba kureka ibitekerezo byo gushidikanya bene se. Umutima [w'abakora umurimo] ukwiriye gukangukira gusabana n'umutima [wa Kristo]. Kugira neza kwa Gikristo n'urukundo rwa Kivandimwe bigomba kurushaho kugaragara mu buryo bwuzuye. Amagambo ari kwirangira mu matwi yanje ni aya: "Muterane, muteranire hamwe." Ukuri kw'ingenzi kandi kwera ko muri iki gihe, ni uguhuza ubwoko bw'Imana. Icyifuzo cyo kuba umuntu ukomeye kigomba gupfa. Ingingo imwe y'icyitegererezoo igomba kuruta izindi zose, ni nde uzarushaho gusa na Kristo mu mico? Ni nde uzarushaho kwihiha muri Yesu mu buryo bwuzuye?....

Guhinduka kw'imico bigomba kuba ubuhamya bwo guhamiriza ab'isi ko urukundo rwa Kristo ruri mu muntu. Uwiteka ategereje ko ubwoko Bwe bwerekana yuko imbaraga icungura y'ubuntu ishobora gukora ku mico irangwamo amakosa maze ikayigira myiza igakura kandi ikera imbuto nyinshi.

Ariko kugirango dushobore gusohoza umugambi w'Imana, hari umurimo wo kwitegura ugomba gukorwa. Uwiteka adusaba gukura mu mitima yacu ubwikanyize aribwo muzi wo kwirema ibice. Yifuza cyane kudusenderezaho Umwuka We Wera ku rugero rwagutse kandi akadusaba ko twaboneza inzira binyuze mu kwizinukwa. Igihe twiyeguriye Imana, amaso yacu arahumuka tukabona amabuye asitaza ubupagani bwacu bwashyize mu nzira y'abandi. Ibyo byose Imana idusaba kubikuraho. Iravuga iti: "Mwaturirane ibyaha byanyu kandi musabirane kugirango mukizwe." Ubwo rero dushobora kugira ubwishingizi nk'ubwo Dawidi yari afite igihe

Tugomba guhabwa amavuta yera buri munsi kugirango tuyageze no ku bandi.

Bose bashobora kuba abatwaramucyo, bakawugeza ku b'isi niba babishaka. Muri Yesu, tugomba kureka kwirebaho ubwacu.

yasengaga, nyuma yo kwatura icyaha cye agira ati: "Mana, undememo umutima wera, unsubizemo umutima ukomeye. Ntunte kure yo mu maso yawe, ntunkureho Umwuka wawe Wera. Nibwo nzigisha inzira yawe abacumura, abanyabyaha baguhindukirire."

Igihe ubuntu bw'Imana buzaba butegekera mu mutima, ubugingo buzaba bukikijwe n'umwuka w'ukwizera n'ubutwari, hamwe n'urukundo nk'urwa Kristo, umwuka wongerera imbaraga ubugingo bw'iby'umwuka bw'abantu bose bawuhumeka.... Buri muntu wese aba usangiye na Kristo urukundo rubabarira, buri wese wamurikiwe n'Umwuka w'Imana kandi agahindurwa n'ukuri, azumva ko afitiye umwenda buri muntu wese uzahura na we, kubera iyo migisha y'agaciro kenshi. Abantu bicisha bugifi mu mutima, nibo Uwiteka azakoresha kugirango agere ku mitima abagabura badashobora kugeraho. Bazasunikirwa kuvuga amagambo ahishura ubuntu bwa Kristo bukiza.

Kandi mu guhesha abandi umugisha, na bo ubwabo bazawuhabwa. Imana iduha uburyo bwo gutanga ubuntu, kugirango ishobore kutwuzuzamo ubuntu burushijeho gusāga. Ibyiringiro n'ukwizera bizakomezwa mu gihe umukozi w'Imana azaba akoresha impano n'ubushobozi Imana yamuhyae. Azagira Imana nk'umufasha wo gukorana na we.⁶

Gukomeza gusukwa ubudahagarara

Iki gihe turimo niwo munsi dufite tugiriwemo icyizere. Umuntu wese yahawe impano zimwe zihariye cyangwa se italanto igomba gukoreshwa mu guteza imbere ubwami bw'Umucunguzi. Abakorera Imana bose bazirkana inshingano bafite, uhoreye k'uri hanyuma y'abandi kandi woroheje kurusha abandi ukagera ku bari mu myanya yo hejuru mu itorero, bose baragijwe ubutunzi bw'Uwiteka. Ntabwo umugabura wenyine ariwe ugomba gukora kubw'agakiza k'abantu. Abantu bafite impano nto hanyuma y'izindi ntabwo basonewe gukoresha impano zihebuje bafite, kandi mu kugenya batyo impano zabo ziziyongera. Nta mutekano uri mu gukinisha inshingano umuntu asabwa muri rusange cyangwa gusuzugura umunsi w'ibintu bito. Ubuntu bw'Imana busaranganya ibyayo bukurikije ubushobozi butandukanye bw'abantu. Nta muntu n'umwe ukwiriye kurizwa n'uko adashobora guhimbarisha Imana impano atigeze agira kandi atazabazwa.⁷

Ubushobozi bwo kwakira amavuta

yerataturuka ku biti bibiri by'imyelayo, bwongerwa n'uko uwakiriye ayo mavuta yera muri we ayakamurira mu magambo no mu bikorwa, kugirango ahaze ibyo abandi bantu bakeneye. Umurimo, umurimo w'agaciro kenshi kandi utera kunyurwa, ugomba guhora wakira kandi ugahora utanga.

Dukeneye kandi dukwiriye kugira imbaraga nshya buri munsi. Kandi se, mbega ukuntu dushobora gufasha abantu benshi binyuze mu gushyikirana na bo! Ijuru ryose rikeneye imiyoboro yo kunyuzwamo amavuta yera ashobora gusukwa, kugirango abere abandi umunezero n'umugisha. Nta bwoba mfite bw'uko umuntu uwo ariwe wese azakora igikorwa cy'urukozasoni, niba bazahinduka umwe na Kristo. Kristo naguma muri twe, tuzakomeza gukora umurimo wacu nta gucogora kandi mu buryo buhamye, kugirango umurimo wacu uzagumeho. Kuzura k'ubumana kuzakwirakwira binyuze ku muntu witanze kugirango buhabwe abandi.⁸

Ni ukubera iki tutagira inzara n'inyota byo guhabwa impano y'Umwuka Wera? Ni kuki tutayiganira, kubera iki tudasenga tuyisaba; kandi ngo tubwirize ibyayo?....

Mu bibazo bitunguranye no hogati mu rwango rw'ab'isi, Umwuka atanga imbaraga ikomeza abantu bari mu kaga no ku rugamba kandi akanatuma basobanukirwa ukutabonera kwabo n'amakosa yabo.⁹

Niba rero.... mwebwe abantu kandi mukaba babi, ko "muzi guha abana banyu ibyiza, So wo mu ijuru ntazarushaho rwose guha Umwuka Wera abamumusabye?" Umwuka Wera, uhagarariye Imana ubwayo, ni we mpano ikomeye isumba izindi. Muri iki ni ho "ibintu byiza" byose biri. Nta kintu gikomeye kandi cyiza kirenze icyo Umuremyi ashobora kuduha. Igihe twingingira Uwiteka kutugirira ibambe mu kababaro kacu, no kutuyoboza Umwuka Wera, ntabwo azanga na gato gusaba kwacu.¹⁰

Aho Biboneka:

¹Urwibutso n'Integuza, kuwa 03 Gashyantare, 1903.

²Ibihamya by'Itorero, vol 6, p.11,12.

³Imigani ya Kristo, p.418,419.

⁴Ibyakozwe n'Intumwa, p.55,56.

⁵Ibihamya ku Bagabura, p.510 – 512.

⁶Ibihamya by'Itorero, vol 6, p42,43.

⁷Ibid, vol 4, p.618.

⁸Ibid, vol 6, p.117.

⁹Ibid, vol 8, p.22.

¹⁰Ibitekerezo byo ku Musozi w'Umugisha, p.132.



2 Inuma yo mu Ijuru

Ku Isabato, 12 Nyakanga 2025

Byateguwe na Davi Paes Silva

Kuba Ubumana buhari

Ubumana bwose bugira uruhare mu nama y'agakiza kacu. Dusoma ko "Ubumana bwagiriye impuhwe inyokomuntu, kandi ko Data wa twese, Umwana, n'Umwuka Wera bitanze kugirango bashyire mu bikorwa inama y'ugucungurwa."¹

"Icyo gihe Yesu ava i Galilaya ajya kuri Yorodani, asanga Yohana ngo amubatize. Na we ashaka kumuhakanira ati "Ko ari jye wari ukwiriye kubatizwa nawe, none ni wowe unsanze?" Yesu aramusubiza ati "Emera ubikore, kuko ari byo bidukwiriye ngo dusohoze gukiranuka kose." Aherako aremera." (Matayo 3:13 – 15). Igihe yabatirizwaga mu ruzi rwa Yorodani, abamarayika bo mu ijuru babyitegerezanyije amatsiko menshi. Igihe yigiraga umuntu, yabaye uduhagarariye.

"Uwiteka yari yarasezeraniye Yohana [Umubatiza] ko azamuha ikimenyetso cyari gutuma amenya Mesiya uwo ari we, nuko ubwo Yesu yavaga mu mazi, yahawé icyo kimenyetso yari yarazeranyijwe; kuko yabonye ijuru rikingutse, **Umwuka w'lmana usa n'inuma y'izahabu itunganyijwe, ujya ku mutwe wa Kristo**, maze ijwi rivugira mu ijuru riti: 'Nguyu Umwana wanje nkunda, nkamwishimira.'²

"Isengesho Kristo yasenze asabira umuntu ryatumye amarembo y'ijuru yugururwa, kandi Data wa twese yararisubije, yemera ubusabe bwasabiwe inyokomuntu yaguye. Kristo yadusabiye ameze nk'umwishingizi wacu n'incungu yacu, none ubu umuryango wa mwenemuntu ushobora kugera kuri Data wa twese binyuze mu byo Umwana We ukundwa yakoze."³

Ni koko rero, Data wa twese, Umwana, n'Umwuka Wera bose bari bahari muri uwo mubatizo; wari ikigereranyo cy'umubatizo wa buri Mukristo, akaba ariyo mpamvu abizera bahabwa amabwiriza agira ati: "Nuko mugende muhindure abantu bo mu mahanga yose abigishwa, mubabatiza mu izina rya Data wa twese n'Umwana



n'Umwuka Wera, mubigisha kwitondera ibyo nababwiye byose. Kandi dore ndi kumwe namwe iminsi yose kugeza ku mperuka y'isi." (Matayo 28:19,20).

Kuki ari inuma?

"Ikimenyetso cy'ishusho y'inuma yagaragaye hejuru ya Yesu igihe yabatizwaga; kigaragaza ubugwaneza bw'imico Ye."⁴

Ibyo bisobanura iki kuri twe muri iki gihe cy'amateka; kugeza ku mperuka y'isi? Mbese hari umwanzi utwubikiriye aho tunyura?

"Mbese wigeze witegerezza igisiga gihiga inuma y'inymahoro? Ubwenge kamere bw'inema bwayigishije ko kugirango igisiga kibashe gufata umuhigo wacyo kigomba kugurukana umuvuduko usumba icyo gishaka gufata. Bityo rero, inuma iraguruka igatumbagira hejuru cyane mu bicu by'ubururu, nyamara kandi cya gisiga kikiyikurikiye gishaka kuyibona urwaho ngo kiyifate ariko bikaba iby'ubusa. Inuma ishobora kurokoka igihe cyose itagize icyo yemerera kuyibuba gukomeza kuguruka, cyangwa gitume isubira inyuma iguruka yerekeza hasi ku isi. Ariko iyo inuma icogoye, maze ikaguruka igana hasi gato; umwanzi wayo uba uri maso ayihoreraho. Incuro nyinshi twagiye twitegerezza uwo muhigo tuwitayeho ariko kandi duhagaritse umutima, dufitiye impuhwe ako kanuma gato. Mbega uburyo byabaye ibintu bibabaje kubona ako kanuma gafatwa na cya gisiga!

"Imbere yacu hari urugamba, - mu ntambara turwana na Satani n'ibishuko bye mu buzima bwacu bwose. Umwanzi azakoresha igitekerezo cyose n'igishuko cyose kugirango ashire ubugingo bwacu mu kaga; kandi kugirango tuzahabwe ikamba ry'ubugingo, tugomba gukoresha umuhati wose tudacogora. Ntitugomba kurambika intwaro cyangwa ngo tuve ku rugamba tutarabona intsinzi kandi dushobora kuneshereza mu Mucunguzi wacu.

"Igihe cyose tuzakomeza guhangamaso yacu kuri Nkomoko yo kwizera kwacu akaba ari na We ugusohoza rwose, tuzaba amahoro.

Gusubiza amaso inyuma no Kurabagirana

Kuvugurura bikubiyemo ibikorwa! Nimutyo binyuze mu bikorwa byacu, twitegure kwakira Umwuka Wera.

Isengesho Kristo yasenze asabira umuntu ryatumye amarembo y'ijuru yugururwa, kandi Data wa twese yararisubije, yemera ubusabe bwasabiwe inyokomuntu yaguye.

Ariko urukundo rwacu rugomba kwerekezwa ku byo mu ijuru, mu cyimbo cyo kwerekezwa ku byo ku isi. Kubwo kwizera; tugomba gukomeza kuzamuka tukagera ku rwego ruhanitse rw'ubuntu bwa Kristo. Kubwo kurangamira urukundo Rwe rutagira akagero, tugomba kurushaho gukura buri munsi dusa n'ishusho Ye yuje ubwiza. Nitubaho dutyo dusabana n'ijuru, Satani azadutega imitego ye ariko bibe iby'ubusa."⁵

Mu by'ukuri, nk'uko iyo mfashanyigisho igaragaza ko Data wa twese n'Umwana batigeze bananirwa gusohoza inshingano yo gucungura twebwe inyokomuntu yaguye bakadukiza ukurimbuka kw'iteka, ni nako Umwuka Wera atazananirwa gusohoza uwo mugambi uhebuje wo kudukiza. Imbaraga z'Umwuka Wera zizasukwa uko zikenewe ku rugero rutagerwa; nk'uko byasezeranywe.

Umwuka Wera ku iherezo

Umwuka Wera ni we mufasha w'ibanzo ku isi mu gutegura ubwoko bw'Imana kugirango umurimo urangire. Niyo mpamvu dukeneye gusenga dusaba kubatirishwa Umwuka Wera buri munsi. "Uhereye igihe yamaze ari kumwe n'Imana [Kristo, Umwana w'umuntu], yazaga buri gitondo azaniye abantu umucyo w'ijuru. Buri munsi yahabwaga umubatizo mushya w'Umwuka Wera."⁶ Niba Yesu yari akeneye iryo hembura, mbega ukuntu twebwe turikeneye cyane kurushaho mu mimerere yacu y'ubunyacyaha! Mu by'ukuri, dukeneye

Nimureke twemere kuyoborwa n'Umwuka Wera mu buryo bwuzuye. Kuraho ikintu cyagiye hagati yawe n'Imana udatindiganyije. "Data, mbabarira ibaya byanje. Mfasha gukraho buri kintu cyose kintandukanya nawe kugirango mbe niteguye kwakira Umwuka Wera, Amena." Gusenga nzasengera

umurimo w'Umwuka Wera mu mibereho yacu mu buryo bwose bw'agakiza kacu no kugirango dusohozze uruhare rwacu mu murimo wo kubwiriza ubutumwa bwiza mu isi yose.

Uko kuri Kristo yagusobanuriye neza abigishwa Be mbere yuko ajyanwa mu ijuru. Yasezeranyije abigishwa Be ati: "Icyakora muzahabwa imbaraga Umwuka Wera nabamanukira, kandi muzaba abagabo bo kumpamya i Yerusalem n'i Yudaya yose n'i Samariya, no kugeza ku mpera y'isi." (Ibyakozwe n'Intumwa 1:8).

"Kandi dore ngiye kuboherereza ibyo Data yasezeranye, ariko mugume mu murwa kugeza ubwo muzambikwa imbaraga zivuye mu ijuru." (Luka 24:49).

Ni nde utubatirisha Umwuka Wera? Igihe abanditsi n'abafarisayo bamubazaga ibyerekerye n'umurimo we, Yohana Umubatiza yababwiye ibya Kristo agira ati: "Jyeweho ndababatirisha amazi ngo mwihane, ariko uzaza hanyuma yanje andusha ubushobozi, ntibinkwiriye no kumutwaza inkweto. Ni we uzababatirisha Umwuka Wera n'umuriro, intara ye iri mu kuboko kwe kandi azeza imbuga ye cyane, amasaka ye azayahunika mu kigega, ariko umurama wo azawucanisha umuriro utazima." (Matayo 3:11,12).

Yesu niwe ubatirisha abana Be Umwuka Wera.

Ni ryari dukenera kubatirishwa Inuma mvajuru? Mu by'ukuri, ibyo ni ibantu dukenera buri munsi. Nk'uko byavuzwe, dukenera iyi mpano y'imbaraga z'Imana buri munsi; haba mu kwhiana kwacu no kugera ku mitima mishya ngo tuyerekeze mu bwami bw'Imana.

Umuanuzi Zekariya yaranditse ati: "Nimusabe Uwiteka **imvura mu gihe cy'itumba**, muyisabe Uwiteka urema imirabyo, na we azabavubira imvura y'umurindi, umuntu wese azamumereza ubwatsi mu rwuri rwe." (Zekariya 10:1).

Igihe cy'invura y'itumba kigera ryari?

"Ubutumwa bwa marayika wa gatatu buri kubwirizwa mu ijwi rirenga, kandi ntimumgomba kwitwaza umudendezo kugira ngo mwirengagize umurimo wo muri iki gihe, kandi mukomeze igitekerezo ko ige runaka kizaza, muzahabwa imigisha myinshi, kandi mukazagira ikangura ritangaje mu gihe nta mwete na muke mugize ku ruhande rwanyu. Mukwiriye kwiyegurira Imana uyu munsi, kugira ngo ibashe kubagira ibikoresho biyihesha icyubahiro, byo gukora umurimo Wayo. Uyu munsi mukwiriye kwiyegurira Imana ubwanyu, mukwiriye kwiyambura inarijiye, irari, ishyari, gusebanya, amakimbirane, ikintu cyose kidahesha Imana icyubahiro. Uyu munsi mukwiriye kugira igikoresho cyanyu gitunganye kandi cyiteguye kwakira ikime kiva mu ijuru, cyiteguriwe imigisha y'invura y'itumba; kuko imvura y'itumba izaza, kandi umugisha w'Imana uzuzura umutima wose udafite inenge iyo ari yo yose. Ni umurimo wacu uyu munsi kwegurira imitima yacu Kristo, kugira ngo tube twiteguye ige cy'ihembura kiza gituruka ku bwiza bw'Uwiteka — duktirishiye kuba twiteguye kubatirishwa Umwuka Wera."

Ni ibiki bisabwa kugirango umuntu ahabwe umubatizo w'Umwuka Wera?

Umuanuzi Hoseya agaragaza ibantu by'ibanze dusabwa kugirango duhabwe imbaraga y'Umwuka Wera mu gihe cy'invura y'itumba:

"Nzagenda nisubirire iwanje, kugeza ubwo bazemera igicumuro cyabo bagashaka mu maso

hanje, nibabona ibyago bizabatera kunshaka hakiri kare." "Nimuze tugarukire Uwiteka, kuko ari we wadukomerekeje kandi ni we uzadukiza, ni we wadukubise kandi ni we uzatwomora. Azaduhembura tumaze kabiri, ku munsi wa gatatu azaduhagurutsa, kandi tuzabaho turi imbere ye. Dushishikarire kumenya, tugire umwete wo kumenya Uwiteka: azatunguka nk'umuseke utambika nta kabuza, azatuzaho ameze nk'invura, nk'invura y'itumba isomya ubutaka." (Hoseya 5:15; 6:1-3).

Muri ibi Byanditswe tubona ko hari ibisabwa bikurikira umuntu agomba kuba yujuje kugirango ahabwe imvura y'itumba:

1. **Kwemera ibyaha byacu uko biri**
2. **Gushaka Uwiteka n'umutima wacu wose, mu kwicisha bugufi no kwicuza**
3. **Kugarukira Uwiteka kugirango aduhe ikangura**
4. **Kumenya no gukomeza kumenya Uwiteka. "Kumenya Imana niko kuyikunda."⁸**
5. **Ubwo nibwo azatuzaho ameze nk'invura, nk'invura y'itumba isomya ubutaka.**

Kwitanga utizigamye

"Kristo yasezeraniye itorero Rye impano y'Umwuka Wera, kandi iryo sezerano yahaye abigishwa Be ba mbere natwe ni iryacu. Ariko kimwe n'andi masezerano, hari ibyo dusabwa kubanza kugira. Hari benshi biringira ndetse bavuga ko bafite amasezerano y'Imana; bakavuga ibya Kristo ndetse n'iby'Umwuka Wera, ariko ntibigire icyo bibamarira. **Ntabwo bemerera umutima wabo kuyoborwa ndetse no kugengwa n'imbaraga z'ijuru.** Ntabwo dushobora gukoresha Umwuka Wera, ahubwo Umwuka Wera ni we udukoresha. Binyuze mu Umwuka Wera Imana ikorera mu bantu Bayo, "kuko Imana ari yo ibatera gukunda no gukora ibyo yishimira." Abafilipi 2:13. Ariko benshi ntibiyegurira Imana. Bashaka kwigenga bo ubwabo. Iyi niyo mpamu ibatera kutakira impano y'ijuru. **Abantu bonyine bategereza Imana bicishije bugufi, bagategereza ubuntu bw'Imana n'inama Zayo, abo ni bo bazahabwa Umwuka Wera.** Imbaraga y'Imana ni ngombwa ko abantu bayisaba kandi bakayihabwa. Iri sezerano ry'umugisha, iyo ryakiriwe mu kwizera, rizana n'indi migisha myinshi y'Imana. Iryo sezerano rikomoka mu butunzi bwinshi bw'ubuntu bwa Kristo, kandi Kristo yiteguye kugenera buri muntu wese ibihwanye n'ibyo yiteguye kwakira."⁹

"Abantu benshi ntibabonye imvura y'umuhindo. Ntibigeze bahabwa imigisha yose Imana yatanze muri ubwo buryo. Bakeneye ko imvura y'itumba izabaha ibyo badafite. Igihe ubutunzi butagira akagero bw'ubuntu buzatangwa, bazifusa gukingura imitima yabo kugirango babwakire. Bari gukora ikosa rikomeye cyane. Umurimo Imana yatangiriye mu mitima y'abantu wo gutanga umucyo Wayo n'ubumenyi; ugomba gukomeza kujya mbere. Buri muntu wese akwiriye kumenya icyo we ubwe akeneye. Umutima ugomba gukurwamo uguhumana kose kandi ukezwa kugirango Umwuka awuturemo. Abigishwa ba mbere bateguriwe gusukirwa Umwuka Wera ku munsi wa Pentekote binyuze mu kwatura ibyaha no kubireka, kubw'sengesho rivuye ku mutima no kwiyegurira Imana. Uwo murimo ni nawo ugomba gukorwa muri iki gihe; ariko mu rugero rwagutse.

Abantu bonyine bategereza Imana bicishije bugufi, bagategereza ubuntu bw'Imana n'inama Zayo, abo ni bo bazahabwa Umwuka Wera. Imbaraga y'Imana ni ngombwa ko abantu bayisaba kandi bakayihabwa.

Ubwo nibwo umuntu aba agomba gusaba uwo mugisha, maze agategereza ko Uwiteka amusohoreza umurimo. Imana niyo yatangiye umurimo, kandi ni nayo izasohoza umurimo Wayo, itume umuntu aba umuntu ushyitse muri Yesu Kristo. Ariko ntitugomba kwirengagiza ubuntu bugereranywa n'imvura y'umuhindo. Abantu bazabaho mu buryo buhuje n'umucyo bafite nibo bonyine bazabona umucyo mwinshi kurushaho. Nituramuka tuateye imbere buri munsi mu kugaragaza ingeso nziza za Gikristo, ntituzamenya ukwigaragaza k'Umwuka Wera mu mvura y'itumba. Ishobora kuba igwa mu mitima y'abatuzengurutse, ariko ntituzayitahura cyangwa ngo tuyihabwe.

"Nta gihe na kimwe mu mibereho yacu dushobora kubura ubufasha bw'ibyadushoboza kubanza gutangira. Imigisha twahawe mu gihe cy'imvura y'umuhindo niyo dukeneye kugeza ku mperuka. Ariko iyo yonyine ntihagije. Mu gihe twishimira imigisha y'imvura y'umuhindo, ku rundi ruhande; ntitugomba kwirengagiza ko hatabonetse imvura y'itumba kugirango imeze imyaka kandi iyeze, ntabwo habaho kwitegura gusarura, kandi umurimo w'umubibyi waba imfabusa. Ubuntu bw'Imana burakenewe mu ntangiriro, ubuntu bw'Imana muri buri ntambwe y'iterambere, kandi ubuntu bw'Imana gusa nibwo bushobora kurangiza umurimo. Nta mwanya dufite wo kuruhukira mu nyifato yo kutagira icyo twitaho. Ntidukwiriye kwibagirwa imiburo ya Kristo; igira iti 'mube maso musenge' "Mube maso.... Musenge ubudasiba." Gushyikirana n'Imana buri gihe ni iby'ingenzi kugirango tugire amajyambere. Dushobora kuba dufite urugero runaka rw'Umwuka w'Imana, ariko binyuze mu gusenga no kwizera, tugomba guhora dushaka kurushaho kugira Umwuka. Nta na rimwe bizatuma tureka gushyiraho imihat. Niba tudatera imbere, niba tutishyize mu myitwarire yo

kwakira imvura y'umuhindo n'i'yitumba, tuzatakaza ubugingo bwacu, kandi inshingano izaba iri kuri twebwe ubwacu."¹⁰

Ubu ngubu, ubwo twebwe abagize itorero ku isi yose tumaze imyaka 100 turiho uhoreye igehe twatangiriye gukora ku mugaragaro, ni igehe cyo kwita ku nshingano dufite tudakebakeba. Igihe kirageze ngo umuhamagaro wacu no gutoranywa kwacu bibe impamo kandi dukomeze kugirana n'Uwiteka umushyikirano muzima, kugirango "Iyatangiye umurimo mwiza muri mwe izawurangiza rwose, kugeza ku munsi wa Yesu Kristo" (Abafilipi 1:6). Ni igehe cyo gusezera kuri iyi si mbi no kwitegura kugaruka kwa Yesu kwegereje kugirango dushobore gutaha iwacu mu ijuru. Umugisha w'imvura y'itumba Uwiteka awuhe uwoko Bwe ku isi yose.

Aho Biboneka:

¹Inama ku Buzima, p.222.

²Abahungu n'Abakobwa b'Imana, p.133.

³Imibereho yanje y'Uyu Munsu, p.260.

⁴Ubutumwa Bwatoranyijwe, vol 2, p.238.

⁵Imibereho yanje y'Uyu Munsu, p.105.

⁶Imigani ya Kristo, p.139.

⁷Ubutumwa Bwatoranyijwe, vol 1, p.190,191.

⁸Uwifuzwa Ibihe Byose, p.22.

⁹Ibid., p.672.

¹⁰Ibihamya ku Bagabura, p.507,508.



Inzabya zirimo

3 Ubusa

Kuwa Mbere, 13 Nyakanga 2025

Byateguwe na Peter D. Lausevic

Umuvugabutumwa n'Umwigisha ukomeye kuruta abandi bose isi yigeze kubona, yari amaze imyaka itatu n'igice akorera umurimo w'Imana mu kwigisha, kubwiriza, no gukiza. Mu mugani w'Umubibyi n'Imbuto, uw'Ingano n'Urukungu, Yesu agaragazwa nk'Umubibyi. Umurimo we w'ibanye wari uwo kubiba imbuto y'ukuri ku nyokomuntub nk'uko ari Umubibyi¹ mu migani yombi, si uwo gutanga umusaruro. "Nimwumve; umubibyi yasohoye imbuto." (Mariko 4:3). Kubera iyo mpamvu, "Kristo Umucunguzi w'isi, yahoraga ahanganye n'ingorane ndetse agasa n'utageze kubyo yifuzaga gukora."² Nubwo imbagá y'abantu benshi baje kumwumva, muri icyo gihe abantu bake cyane, nibo bemeye ku mugaragaro ubutumwa bw'agakiza. Kimwe nka Nikodemo, bamwe bamenye Mesiya igihe imbagá y'abantu benshi barimo bamujyana ku musaraba. Abandi bo bari bategereje ikindi kintu kirenze ibyo.

Gutegereza

Mbese ushabora kwiyumvisha ko mu gihe byihutirwaga kujya kwigisha amahanga yose no kwhitisha kuza kwa Kristo, Yesu yabwiye abigishwa Be gutegereza? "Kandi dore ngiye kuboherereza ibyo Data yasezeranye, ariko mugume mu murwa kugeza ubwo muzambikwa imbaraga zivuye mu ijuru." (Luka 24:49). Natwe ni uko, dukeneye gusobanukirwa ko mu gihe cyihutirwa dukenera gutegereza. "Tugomba gusenga dushyizeho umwete dusaba gusukirwa Umwuka Wera nk'uko abigishwa basenze ku munsi wa Pentekote. Niba bari bamukeneye icyo gihe, twe turamukeneye cyane kurutaho muri iki gihe. Umwijima w'icuraburindi mu by'imiconbonera, wijimye nk'ibara ry'umwenda bambara mu gihe cyo gushyingura, utwikiriye isi. Inyigisho z'ibinyoma z'uburyo bwose, inyigisho z'ubuhakanyi, n'ibinyoma bya Satani birimo birayobya imitekerereze y'abantu. Umurimo dukora wo kwamamaza ukuri waba imfabusa, tubaye tudafite Umwuka w'Imana n'imbaraga Zayo."³

Ariko se ni kuki tugomba gutegereza? Hari isano igaragara iri hagati yo kugaruka kwa Yesu no kubwiriza ubutumwa bwiza mu isi yose. "Kandi ubu butumwa bwiza bw'ubwami buzigishwa mu isi yose, ngo bube ubuhamya bwo guhamiriza amahanga yose, ni bwo imperuka izaherako ize." (Matayo 24:14).

Kubw'ibyo se, kuki twategereza? Ni iyihe ntego y'Umwuka Wera? Tugiye kwibanda kuri zimwe



muri izo ngingo mu buryo bwihariye kuko ibindi bice by'iki gitabo bizasuzuma izindi ngingo nyinshi zifitanye isano na byo.

1. Ni iki cyemeza umutima w'umuntu? "Ubwo azaza azatsinda ab'isi, abemeze iby'icyaha n'ibyo gukiranuka n'iby'amateka" (Yohana 16:8). Haramutse hatabayeho umurimo w'Umwuka Wera wo kwemeza abantu ko ari abanyabyaha bakeneye Umukiza, dushobora kubwiriza ibyo dushaka byose nyamara ntibigire icyo bitanga.

2. Dukeneye Umwuka Wera kubera ko ari we ugomba kuduha impano zihariye zituruka ku Mana. "Umuntu wese agahabwa ikimwerekanaho Umwuka kugira ngo bose bafashwe. Umwe aheshwa ijambu ry'ubwenge n'Umwuka, undi agaheshwa n'ubo Mwuka ijambu ryo kumenya... ariko ibyo byose uwo Mwuka umwe ni we ubikorera muri bo, agabira umuntu wese uko ashaka." (1Abakorinto 12:7,8,11). Dukeneye izo mpano zose mu itorero kugirango dusohoze umurimo wo kubwiriza ubutumwa mu buryo buboneye.

3. Na none ni iby'ukuri ko bari bakeneye gutegereza kugirango "bahabwe imbaraga ivuye mu ijuru." Umwuka Wera yari kubaha imbaraga z'Imana binyuze mu kuba bari gusangira kamere ya Kristo. "Ibyo ni byo byatumye aduha ibyo yasezeranije by'igiciro cyinshi, bikomeye cyane kugira ngo bibatere gufatanya na kamere y'Imana, mumaze guhunga no gukira kononekara kwazanywe mu isi no kwifusa." (2Petero 1:4). Kandi se, bigenda bite iyo dusangiye kamere y'Imana? Ni ayahe mahirwe tugira yo kubona uburyo dutangazwa n'ubuntu bw'Imana? "Mu gukorana na Kristo, muri we baba bashiyitse, kandi mu ntege nke zabo za kimuntu bashobozwa gukora ibikorwa by'lshoborabyose."⁴

Ni yihe mirimo y'lshoborabyose ivugwa aha ngaha? Biragaragara neza ko atari ibikorwa by'abantu, bityo abantu ntibashobora kwishoboza umurimo uwo ariwo wose, kubera ko ibyo bikorwa mu by'ukuri bidaturuka muri bo.

"Abatanga umutima, umubiri n'umwuka byabo bakabyegurira Imana, bazahora iteka bongerwa imbaraga z'umubiri n'ubwenge. Amasoko adakama yo mu ijuru arabateganirijwe. Kristo abahumekera ku mwuka We akanabaha ku bugingo Bwe. Umwuka Wera ashishikarira cyane gukorera mu mutima no mu ntekerezo. Ubuntu bw'Imana bwagura, bukanongera ubushobozi bwabo, kandi imbaraga y'ubutungane bwose bukomoka ku Mana buza kubafasha **mu murimo wo gukiza imitima**."⁵ Ibikorwa by'lshoborabyose si ibyo kwihesha ikuzo. Ni ibyo guhesha abantu agakiza.

Ubumenyi bw'umwizera

Kandi se, ni uwuhe murimo w'umutima utuma umuntu aba umwizera? "Ni watuza akanwa kawe yuko



*Abigishwa bagombaga
guteranira hamwe kandi
bakegurira Imana ubugingo
bwabo batizigamye na bo
ubwabo, nk'uko bagomba
kubwirana akabari ku
mutima kandi bakaturirana.*

Yesu ari Umwami, ukizera mu mutima wawe yuko Imana yamuzye uzakizwa" (Abaroma 10:9). Tuzi ko igikorwa cyo kuganduka kizana uguhinduka. Kubw'ijo mpamvu, Satani ntazigera ahunga, kugeza igithe ubushake bwacu tuzabwegurira ubushake bw'Umuremyi wacu n'Umucunguzi wacu. "Nuko rero mugandukire Imana ariko murwanye Satani, na we azabahunga." (Yakobo 4:7). Uko kwitanga gukiza gukomoka ku kwizera nyakuri ko Yesu ari we Mesiya tugomba kwatura.

Icyo gihe Yesu yari amaze imyaka itatu n'igice abwiriza, kandi bashoboraga kubona ko ari we Mesiya. Kubera iki abantu benshi cyane bategereje umunsi wa Pentekote? Kuki mu gihe cy'umurimo wa Kristo nta bantu benshi bahindutse? Bose bari bafite amahirwe angana n'ay'abigishwa, kandi bashoboraga guhamya mu buryo bworoshye bati: "Uwahozeho uhoreye mbere na mbere, uwo twumvise, uwo twiboneye n'amaso yacu, kandi uwo twitegereje intoki zacu zikamukoraho, ari we Jambo ry'ubugingo" (1Yohana 1:1). Ariko ntibabikoze. Kubera iki abigishwa bategereje kubatiza abantu 3,000 icyo gihe, n'abandi 5,000 ikindi gihe? (Reba Ibyakozwe n'Intumwa 2:41; 4:4).

Kubera iki icyo gihe aribwo bwonyine umusaruro wagaragaye? "Abigishwa bagombaga gutangirira umurimo wabo aho yari yarabibye imbuto z'ukuri. Abantu benshi bari barumvise amagambo Ye, maze barayizera, ariko ntibagize ubutwari bwo kumwemera nk'Umukiza wabo, kugirango badacibwa mu isinagogi. Igihe Umwuka Wera yasukwaga, **imbuto Kristo yari yarabibye zaramaze, zirakura, zera imbuto**. Abigishwa bagize ubutwari n'ibiringiro, kandi bari biteguye kujya mu turere twa kure cyane tw'isi kugirango bamamaze iby'Umukiza wazutse"⁶

Yesu yari Imana\umuntu, nk'uko izina Rye ribigaragaza: "Dore umwari azasama inda kandi azabyara umuhungu, azitwa Imanweli, risobanurwa ngo "Imana iri kumwe natwe" (Matayo 1:23). Ubumana bwari bukeneye gukora bumuntu, bityo "Jambo uwo yabaye umuntu abana natwe (tubona ubwiza bwe busa n'ubw'Umwana w'ikinege wa Se), yuzuye ubuntu n'ukuri." (Yohana 1:14). Yagombaga guhinduka, mazeakanesa nk'umuntu. "Kandi rero tuzi yuko atari abamarayika yatabaye, keretse urubyaro rwa Aburahamu. Ni cyo cyatumye yari akwiriye **gushushanywa na bene Se kuri byose**, ngo abe umutambyi mukuru w'imbabazi kandi ukiranuka mu by'Imana, abe n'impongano y'ibaya by'abantu." (Abaheburayo 2:16,17).

Muri iyo kamere y'Imana n'umuntu ntiyagiraga ikizinga. "Kuko muzi yuko ibyo mwacungujwe ngo muve mu ngeso zanyu zitagira umumaro mwatojwe na ba sekuruza banyu, atari ibyangirika nk'ifeza cyangwa izahabu.... ahubwo mwacungujwe amaraso y'igiciro cyinshi, nk'ay'umwana w'intama utagira inenge cyangwa ibara, ari yo ya Kristo" (1Petero 1:18,19). Ibi bisobanuye ko Yesu atigeze akora icyaha, kandi ko yaduhaye urugero duktiriye gukurikiza. "Kuko na Kristo yabababarijwe akabasigira icyitegererezo, kugira ngo mugere ikirenge mu cye. Nta cyaha yakoze, nta n'uburiganya bwabonetse mu kanwake" (1Petero 2:21,22). Ibyo bimuhu uburenganzira bwo kutubera umuvugizi n'umufasha wacu. "Kuko tudafite umutambyi mukuru utabasha kubabarana natwe mu ntege nke zacu, ahubwo yageragejwe uburyo bwose nkatwe, keretse yuko atigeze akora icyaha." (Abaheburayo

4:15).

Ibyo byose abantu bashoboraga kubibonera muri Kristo. Yagaragaje uburyo bwo kunesha icyaha. None se ni iki bari bategereje? Ni iki kindi bifuzaga kubona kubona? Abantu muri kamere yabo bashaka kubona ikintu runaka bakoresheje ubuhanga, ni nako bashaka kubonamo n'agakiza. "Bibiliya ni igitabo cy'inyigisho gikomeye cyane cy'lmana, umwigisha ukomeye lmana ikoresha. Bibiliya niyo rufatiro rw'ubumenyi bwose nyakuri. Buri shami ryose ry'ubumenyi rishobora kugerwaho kubwo gushakisha mu ijambo ry'lmana. Kandi hejuru y'ibyo byose, ikubiyemo ubuhanga buruta ubundi buhanga bwose, **aribwo bumenyi bw'agakiza**. Bibiliya ni ikirombe cy'ubutunzi butagira akagero bwa Kristo."⁷

Ariko se, ni iki mu by'ukuri gisobanura ubumenyi? Intumwa Pawulo yatanze umuburo wo kwirinda "ingirwabwenge" (1Timoteyo 6:20); ni ukuvuga ubumenyi bwitwa ko ari ubwa siyansi, ariko budafite urufatiro nyakuri. Ubumenyi nyakuri bushingiye ku byo abantu bareba, ku byo bagaragaza, n'ibyo basubiramo. Abahanga mu bya siyansi bandika uburyo bakoresha, bakandika buri ntambwe bateye, hanyuma bagasuzuma niba bashobora gusubiramo ubwo buryo bakagera ku bintu bimwe. Umusaruro uba mu by'ukuri uwa siyansi iyo undi muntu ashobora gukurikiza intambwe zimwe mu mimerere imwe kandi akagera ku mwanzuro umwe n'uwa ba bandi. Ni muri ubwo buryo, agakiza na ko kagomba kuba karenze amagambo gusa; kagomba kugaragazwa kandi kakerekairwa mu mibereho y'ubwoko bw'lmana.

Jya wigana Yesu

Yesu yagaragaje uko twabaho imibereho irangwa no kwera. Ubu rero ibyo bigomba gusubirwamo n'undi muntu akurikije ubwo buryo. Ibyo nibyo bituma isi yose ibyizera. Kubygisha mu magambo bishobora kuba byinshi, dushobora kubivugaho, kandi tukabisuzuma uko dushaka kose. Ariko kubisubira, ni mu buryo bwa siyansi. None ni iki kirimo gusubirwamo? Kristo yatweretse ko abantu bo mu bihugu bitandukanye, bafite imico itandukanye n'imiterere itandukanye, bafite n'imyumvire itandukanye; bahinduka umwe. "Muri iki gihe isi ikeneye ibyo yari ikeneye mu myaka 2,000 ishize; ihishurwa rya Kristo."⁸

Ibyo ntibyashobokera abantu. Igisanzwe mu bantu ni uko: "Ishyanga rizatera irindi shyanga, n'ubwami butere ubundi bwami" (Luka 21:10). Ibyo si mu gihe cy'intambara gusa. Murebe uko bigenda iyo habaye umukino w'umupira w'amaguru cyangwa andi marushanwa mpuzamahanga. Kuba Umukristo bisobanura neza neza icyo Aburahamu yagombaga gukora: "Va mu gihugu cyanyu, usige umuryango wanyu n'inzu ya so, ujye mu gihugu nzakwereka." (Itangiriro 12:1). Ibyo byaba ari igitangaza, ikintu kidasanze ku kiremwamuntu, nyamara nicyo gikwiriye. Icyo nicyo kigaragaza imbaraga z'Ubukristo. "Ngo bose babe umwe nk'uko uri muri jye, Data, nanje nkaba muri wowe ngo na bo babe umwe muri twe, ngo ab'isi bizere ko ari wowe wantumye." (Yohana 17:21). Ibyo nibyo bituma umuntu aba umwizera.

"Gusabana n'ubumwe biri mu bantu bafite ingeso zitari zimwe ni byo muhamya ukomeye cyane yuko lmana yatumye Umwana Wayo mu isi gukiza abanyabyaha. Ni ihirwe ryacu kujyana bene ubwo buhamya. Ariko kugira ngo dukore ibyo, dukwiriye kwemera itegeko rya Kristo. Ingeso zacu zikwiriye gutunganyishwa gusabana n'ingeso Ze, n'ubushake

bwacu bukwiriye kwegurirwa ubushake Bwe. Ni bwo tuzakorera hamwe tudafite igitekerezo cyo kugirirana nabi."⁹

Kuba witeguye: kwikorera umusaraba wawe

Turamutse duhawe imbaraga y'Umwuka Wera mu buryo bwuzuye ariko ntidusobanukirwe uku kumugaragaza no kumwigana, iyo mbaraga yakoreswa mu ntego mbi no mu migambi mibisha. Iyo niyo mpamvu imvura y'umuhindo yamanukiye abigishwa igihe bari biteguye. "Umunsi wa Pentekote usohoye, bose bari bari hamwe mu mwanya umwe bahuje umutima." (Ibyakozwe n'Intumwa 2:1).

Mbese ubwo bumwe busobanuye ko twese dutekereza kimwe kuri buri ngingo? "Ibantu byinshi byerekeza ku migenzo igaragarira inyuma siko byose bivugwa mu Byanditswe, ariko ntibyaretswe bidasobanutse, kandi akensi usanga abantu bashishikarizwa cyane kugira ibyo bahitamo ku byerekeranye n'izo ngingo. Igihe hari umuntu udahuje imikorere n'undi runaka wo mu itsinda ry'abizera, nimureke utuntu duto batandukaniyeho twe guhinduka ibibabaza ngo tubatere amacakubiri. Uburyo n'ingamba dukoresha kugirango tugere ku ntego runaka, siko buri gihe biba ari bimwe. Tugomba gukoresha ubwenge n'ubushishozi mu gihe duhitamo icyo twakora. Ubunararibonye buzerekana inzira yoroshye yo gukurikiza mu mimerere iriho. Ntimugahangane mupfa utuntu tw'ubusa. Umwuka w'urukundo n'ubuntu bw'Umwami wacu Yesu Kristo bizatuma imitima y'abantu ihuza, niba buri muntu wese azajya afungura amadirishya y'umutima yerekeza mu ijuru, maze agafunga ayerekeza ku isi."¹⁰

Umuzi w'ubumwe uherereye mu gikorwa cyo kuzuza inzabya zacu zirimo ubusa. Kubamba umuntu ku musaraba, nibwo buryo burusha ubundi burangwamo ubugome bwo kumwica; kandi igihe cyose byakorwaga ku mbaraga abihatiwe. Iyo abantu bamanikwaga ku musaraba, nta buryo bwo guhunga babaga bafite. Umudendezo wawe n'icyubahiro cyawe byabaga byayoyotse. Kwiybaha kwawe ntikwabaga kukiriho. Icyo nicyo kintu kibi kurusha ibindi gishobora kuba ku muntu. Nyamara Yesu aravuga ati: "Utikorera umusaraba we ngo ankurikire, ntashobora kuba umwigishwa wanje." (Luka 14:27). Nibyo, ubwo buryo bwo kwica bubi cyane, umuntu agapfa urupfu rw'agashinyaguro, nibwo tugomba kwemera; kubera ko aribwo buryo nyakuri bwo kubona agakiza. Ni iby'agaciro rwose. Ikbereye ab'isi urupfu, ku mwizera ni ubugingo n'imbaraga. "Ijambo ry'umusaraba ku



**Abatanga umutima,
umubiri n'umwuка
byabo bakabyegurira
lmana, bazahora iteka
bongerwa imbaraga
z'umubiri n'ubwenge.**

barimbuka ni ubupfu, ariko kuri twebwe abakizwa ni imbaraga z'Imana" (1Abakorinto 1:18).

Tugomba kugundira uwo musaraba. "Ariko jyeweho sinkiratana ikindi, keretse umusaraba w'Umwami wacu Yesu Kristo wateye ko iby'isi bimbera nk'ibibambwe, nanjye nkabera iby'isi nk'ubambwe." (Abagalatiya 6:14).

"Kuri Pawulo umusaraba ni wo wari ikintu kimwe gifite agaciro kuruta ibindi. Kuva amaze gufatirwa mu murimo we wo gutoteza abayoboke b'Umunyanazareti wabambwe, ntiyigeze acogora guha umusaraba icyubahiro. Icyo gihe yari yarahishuriwe urukundo rw'Imana ruhebuje, nk'uko rwagaragariwe mu rupfu rwa Kristo; kandi uguhinduka gutangaje kwari kwarabaye mu buzima bwe kwatumye inama ze n'imigambi ye yose bihuza n'ijuru. Kuva icyo gihe yahindutse umuntu mushya muri Kristo. Yari azi mu byo yari yaragiye ahura na byo ko iyo umunyabyaha abonye urukundo rwa Data wo mu ijuru, nk'uko rwagaragaye mu gitambo cy'Umwana We, maze akiyegurira imbaraga y'Imana ngo imuyobore, habaho guhinduka k'umutima kandi kuva icyo gihe Kristo akamubera byose muri byose."¹¹ Kandi se, bigenda bite iyo tugundiriye uwo musaraba?"Uko twerereza uyu musaraba, tuzabona ko nawo uzatuzahura."¹²

Umutwaro

Uwo musaraba ni iki? Ni kuki aricyo kintu cy'ibanzze mu idini ry'ukuri? Yesu aravuga ati: "Abwira bose ati "Umuntu nashaka kunkurikira niyyiyanje, yikore umusaraba we iminsi yose ankurikire, kuko ushaka kurengera ubugingo bwe azabubura, ariko utita ku bugingo bwe ku bwanjiye ni we uzabukiza." (Luka 9:23,24). Kwikorera umusaraba no kwiyanga ni ikintu kimwe kandi birahwanye. Abantu benshi biyanga, ntabwo baguwe neza kuruta uko bari bameze mbere. Ibyo biterwa n'uko hano tutari kuvuga gusa ubwoko runaka bwo kwikorera umusaraba. Tugomba kwikorera umusaraba wa Kristo kandi tukawugira uwacu. Mu yandi magambo, tugomba gufatanya na Kristo muri uwo murimo wo kwikorera umusaraba. "Mwese abarushye n'abaremerewe, nimuze munsange ndabaruhura. Mwemere kuba abagaragu banjiye munyigireho, kuko ndi umugwaneza kandi noroheje mu mitima, namwe muzabona uburuhukiro mu mitima yanyu, kuko kunkorera kutaruhije, n'umutwaro wanjiye utaremereye." (Matayo 11:28 – 30). Tubona ubwo buruhukiro bw'umutima ari uko gusa dufatanyije umutwaro na Kristo, kandi "uwo mutwaro ugereranya kuganduka mu buryo bwuzuye."¹³

Mbese ni iki kiba mu buryo busanzwe iyo twiyeguriye uwo musaraba ku bushake? "Avuga ko umusaraba we utaruhiye, kandi ndabyizerwa. Avuga ko umutwaro we woroshye, kandi na byo ndabyizerwa. Iyo wikoreye umusaraba wa Kristo, kwitotomba kose n'intonganya zawe birashira."¹⁴ Ibyo bisobanuye ko ibisabwa kugirango imvura y'itumba isukwe biba byuzuye, kubera ko tuba twiyambuye inarijiye maze tukuzuzwa Kristo. "Nabambanywe na Kristo ariko ndiho, nyamara si jye uriho, ahubwo ni Kristo uriho muri jye. Ibyo nkora byose nkirih mu mubiri, mbikoreshwa no kwizera Umwana w'Imana wankunze akanyitangira." (Abagalatiya 2:20).

Imvura y'itumba

Dukeneye imbaraga kugirango dusohoze umurimo twahawe umuntu ku giti, kandi nk'itorero. "Kwikorera umutwaro wa Kristo ni kimwe mu bisabwa by'ibanzze kugirango duhabwe imbaraga Ye."¹⁵ Nyuma yo kubambwa, abigishwa bamaze iminsi cumi bateraniye hamwe mu cyumba cyo hejuru, kandi nyuma yaho bujujwe imbaraga. Kubera iki? Bashoboye kwigana ubumwe Yesu na Se bari baftanye mu buryo bwa

kimuntu mu itsinda ry'abantu, buri wese muri bo akaba yarashakaga kuba mukuru. Bigenda bite? "Umutima ugomba gukurwamo uguhumana kose kandi ukezwa kugirango Umwuka awuturemo. Abigishwa ba mbere bateguriwe gusukirwa Umwuka Wera ku munsi wa Pentekote binyuze mu kwatura ibaha no kubireka, kubw'isengesho rivuye ku mutima no kwiyegurira Imana. Uwo murimo ni nawo ugomba gukorwa muri iki gihe; ariko mu rugero rwagutse."¹⁶

Kuki twebwe abagize itorero tukiri hano; na nyuma y'imyaka 100? Abantu benshi babaye indahemuka ku cyo Imana yabasabye gukora none ubu baruhukiye mu mva bategereje wa muzuko udasanzwe, kugirango bazashobore kumva isezerano rihoraho maze ku iherezoo bazabone Umukiza aje ku bicu byo mu ijuru.

Turi hano kuko hari undi murimo tugomba gukora; atari buri muntu ku giti cye gusa, ahubwo no mu rwego rw'itorero. Abigishwa bagombaga gutteranira hamwe kandi bakegurira Imana ubugingo bwabo batizigamye na bo ubwabo, nk'uko bagomba kubwirana akabari ku mutima kandi bakaturirana. Mbese ibyo byashoboka bite?

Mbese waba warasukuye urwabya rwawe ku buryo uftite ubushake bwo kureka byose kugirango ukorere Shobuja umurimo? Mu gihe turi muri iki Cyumweru cyihariye cyo Gusenga cyo kwibuka imyaka 100 tubayeho nk'itorero, Uwiteka ashishikarize imitima yacu, buri muntu ku giti cye gutekereza ku musaraba, kugirango dushobore kunga ubumwe twese hamwe, bityo tugire imbaraga zikenewe zo kurangiza umurimo; maze ku iherezoo tuzatahane n'Umukiza wacu imuhira.

"Abigishwa basenganaga umwete kugira ngo batunganyirizwe guhura n'abantu kandi ngo mu kubonana n'abantu kwabo kwa buri munsi babashe kuvuga amagambo ayobora abanyabyaha kuri Kristo. Bakuyeho ibitatandukanya byose no kwifusa icyubahiro kose maze bahuriza hamwe mu gusabana kwa Gikristo....

"Iyi minsi yo kwitegura yari iyo kwisuzuma. Abigishwa basobanukiwe ubukene bwabo mu by'umwuka maze batakira Imana ngo bahabwe gusigwa kwera kwari kubashoboza gukora umurimo wo gukiza abantu. Ntibigeze bisabira imigisha yabo bwite ahubwo icyari kibaremereye ni uko abantu bakizwa."¹⁷

Aho Biboneka:

¹Uko niko na Kristo, Umubibyi mvajuru, yagiye kubiba, Imigani ya Kristo, p.36.

²Uwifuzwa Ibihe Byose, p.678.

³Ibihamya by'itorero, vol 5, p.158.

⁴Uwifuzwa Ibihe Byose, p.827.

⁵Ibid.

⁶Ibimenyetso by'Ibihe, kuwa 14 Ukwakira 1889.

⁷Imigani ya Kristo, p.107.

⁸Umurimo wo Gukiza, p.143.

⁹Ibihamya by'itorero, vol 8, p.242.

¹⁰The Ellen G. White 1888 Materials, p.1698.

¹¹Ibyakozwe n'Intumwa, p.245.

¹²Ibihamya by'itorero, vol 8, p.45.

¹³In Heavenly Places, p.236.

¹⁴The Ellen G. White 1888 Materials, p.905.

¹⁵Uwifuzwa Ibihe Byose, p.825.

¹⁶Ibihamya ku Bagabura, p.507.

¹⁷Ibyakozwe n'Intumwa, p.37.



Uburyo bwo Gutegura

4 Amafunguro

Kuwa Kane, 16 Nyakanga 2025

Byateguwe na Rolly C. Dumaguit

Muri iki gihe, hirya no hino ku isi, abantu barushaho gushishikazwa no kurya ibyo kurya bitarangwamo inyama. Dukurikije ibarurishamibare riheruka gukorwa, ku isi hose hari abantu barenga miliyon 640 bakoresha amafunguro atarangwamo inyama. Bitewe n'uko ibyo birimo birarushaho kuba akamenyero, muri Leta zunze Ubumwe za Amerika honyine hafi kimwe cya kabiri cy'amazu y'uburiro [Resitora] ubu batanga ibyo kurya bitarangwamo inyama ku bakiriya babo.

Hari impamvu zitandukanye zituma abantu bakoresha amafunguro atarangwamo inyama, zimwe muri zo zikaba ari idini, amahame mbwirizamuco, ubuzima, kubungabunga ibidukikije, ubukungu, kwanga inyama, ndetse n'umuco.

Nk'abantu bategereje kugaruka kwa Kristo, tumaze igihe kirekire dukoresha ibyo kurya bikomoka ku bimera, kugirango twitegure ikigiye kubaho dutegerezanyije amatsiko menshi. Ayo niyo mafunguro Imana yahaye ubwoko Bwayo buri muri iyi si yononekaye, ibigiranye urukundo. Ni umugambi w'Uwiteka ko mu kugenza dutyo, tuzarushaho kugira ubuzima bwiza kandi tugatsinda intäge nke zacu. Ibyo bisaba ko tugira umuco wo kwirinda no kwihangana. Ni ukubera iki kwirinda ari ngombwa? Mbese tuba twugarijwe n'akahe kaga iyo tutitaye ku ngaruka z'ibyifuzo byacu kandi tukabaho imibereho itagira icyo ibuzwa?

"Kutirinda nibyo byakururiye umuvumo isi yari ikiremwa. Umwana wa Nowa yari yarashayishije kubwo kunywa inzoga nyinshi bikabije ku buryo yatakaje ubwenge bwe bwose, nuko umuvumo wakurikiye icyaha cye ntiwigeze ukurwa ku bamukomotseho.

"Nadabu na Abihu bari abagabo bakoraga umurimo wera; ariko kubwo kunywa inzoga, ubwenge bwabo bwijimishijwe n'igihu ku buryo batashoboye gutandukanya ibantu byera n'ibisanzwe. Kubwo gukoresha "umuriro udawkiriye" basuzuguye itegeko ry'Imana, maze bicwa n'imanza Zayo.

"Alegizanderi yabonye ko kwigarurira ubwami byamworoheye cyane kuruta gutegeka umutima we bwite. Nyuma yo kwigarurira amahanga, uwo mugabo witwaga ko yari akomeye yaguye mu mutego wo guhaza irari rye; azira ukutirinda."

None urabitekerezaho iki? Ni iki cyakubera cyiza: ari ukwigarurira isi no kwitsinda wowe ubwawe? Mbese Bibiliya ibivugaho iki? "Utihitira kurakara aruta intwari, Kandi utegeka umutima we aruta utsinda umudugudu." (Imigani 16:32). Kubw'ibyo rero, Pawulo yabwiye abizera ati: "Ineza yanyu imenywe n'abantu bose, Umwami wacu ari bugufi." (Abafilipi 4:5).

Mu busobanuro: Kwirinda ni ingeso yo guhora ugenzura ibikorwa byawé, ibitekerezó byawé, cyangwa ibiyumvo byawé kugirango wirinde kurya no kunywa birenze urugero cyangwa kurakara vuba. Umwuka w'Ubuhanuzi usobanura neza ko "Kwirinda nyakuri bitwigisha kureka rwose buri kintu cyose cyangiza maze tugakoresha neza ibituma tugira amagara mazima."⁷² Mbese hari isano iri hagati yo kwirinda n'ikibazo cy'agakiza? Mbese kwirinda muri byose ni kimwe mu bigize inyigisho zacu zishingye kuri Bibiliya?

Imwe mu mbuto z'Umwuka

"Ariko rero imbuto z'Umwuka ni urukundo n'iwyishimo n'amahoro, no kwihangana no kugira neza, n'ingeso nziza no gukiranuka, no kugwa neza no kwirinda. Ibimeze bityo nta mategeko abihana." (Abagalatiya 5:22,23).

Umutambiko wa kane ku ngazi yo kwezwa [ivugwa muri Petero]

"Ibyo abe ari byo bituma mugira umwete wose, kwizera mukongereho ingeso nziza, ingeso nziza muzongereho kumenya, kumenya mukongereho kwirinda, kwirinda mukongereho kwihangana, kwihangana mukongereho kubaha Imana, kubaha Imana mukongereho gukunda bene Data, gukunda bene Data mukongereho urukundo." (2Petero 1:5-7).

Ingingo y'ingirakamaro mu gakiza kacu

"Icyigisho cyo kwirinda, mu ngingo zose zikigize, gifite umwanya w'ingenzi mu gusohoza agakiza kacu. Kubera ingeso mbi mu mirire n'iminywere, isi igenda irushaho guta umurongo mu mico mbonera."³

1. Kwirinda mu Mirire

Imwe mu ngingo dukaneye gutekerezaho mu byerekeranye no kwirinda, ni iyerekereye imirire. Ni iyihe nkuru yo muri Bibiliya utekereza ko ishobora gutanga igihamya cy'urugero nyakuri rwo kwirinda mu mirire? Urugero rumwe rukunda guhora ruhita ruza mu ntekerezo ni urwa Daniyeli. Ni iki mu by'ukuri Daniyeli yanze?

"Maze Daniyeli agambirira mu mutima we kutaziyanurisha ibyokurya by'umwami cyangwa vino yanywaga, ari cyo cyatumye yinginga uwo mutware w'inkone kugira ngo atiyanduza. Nuko Daniyeli aherako abwira igisonga cyari cyategetswe n'umutware w'inkone kurera Daniyeli na Hananiya, na Mishayeli na Azariya ati "Ndakwinginze gerageza abagaragu bawe iminsi cumi, baduhe ibishyimbo abe ari byo turya n'amazi yo kunywa." (Daniyeli 1:8,11,12).

Imana yifuza ko tugira amagara mazima. Yifuza ko twabaho neza mu buryo bw'umubiri no mu buryo bw'umwuka; akaba ariyo mpamu yahaye Adamu na Eva ibyo kurya bikomoka ku bimera ubwo bari bamaze kuremwa. "Kandi Imana irababwira iti "Dore mbahaye ibimera byose byera imbuto biri mu isi yose, n'igitu cyose gifite imbuto zirimo utubuto twacyo, bizabe ibyokurya byanyu." (Itangiriro 1:29).

"Ba sogokuruza ntibamenye ibitangaza byawewe wakoreye muri Egiputa, ntibibutse imbabazi zawe nyinshi, ahubwo bagomera ku nyanja ari yo nyanja itukura.... Hahise akanya bibagirwa imirimo yakoze, ntibarindira ko isohoza imigambi yayo. Ahubwo bifuriza cyane mu butayu,

bageragereza Imana ahatagira abantu." "Bagerageresha Imana imitima yabo, bayigerageresha gusaba ibyokurya byo guhaza kwifusa kwabo." (Zaburi 106:7,13,14; 78:18).

Impamu y'ingenzi ituma kurya inyama bitagifite umutekano ni uko amatungo azahazwa n'ububabare, akaba yugarijwe cyane n'indwara zinyuranye. Muri Yeremiya 45:5, umuhanuzi yahanuye ko Imana "izateza ibyago ku bantu bose"; kandi kubw'imbabazi Ze, Uwiteka yaduhaye gahunda y'imirire yo kururinda indwara nyinshi. Ubu noneho igihe kirageze ngo dusubire ku mirire Imana yahaye umuntu mu ntangiriro. "Imirire yacu igomba kuba igizwe n'imboga, imbuto, n'binyampeke. Nta munopfu w'inyama ugomba kwijnira mu gifu cyacu. Kurya inyama ni ibantu bitari muri kamere y'imiterere yacu. Tugomba gusubira ku mugambi wa mbere Imana yaturemeye, katanga ka mbere, mu iremwa ry'umuntu."⁴

Impuguro ikomeye

"Ababyeyi bazi ukuri ku byerekeranye no guhaza ipfa ntibagomba kwemerera abana babo ngo barye birenze urugero, cyangwa ngo barye inyama, cyangwa ibindi biribwa bikangura irari ry'umubiri. Ibyo umuntu arya nibyo bimwubaka. Gukoresha imirire irangwamo inyama byongererera imbaraga ibyifuzo bibi, kandi bikabikangurira gukora cyane. Ababyeyi bagomba kureka ikintu cyose gishobora gushyira mu kaga imicombonera y'abana babo n'imibereho y'umubiri wabo. Ntibagomba gushyira inyama ku meza."⁵

Urugero rwo mu Butayu

"Bene Data, sinshaka ko mutamenya yuko ba sogokuruza bose bari munsi ya cya gicu, kandi yuko bose baciye mu nyanja yigabanije, bose bakabatirizwa muri icyo gicu no muri iyo nyanja gutegekwa na Mose, bose bagasangira bya byokurya by'Umwuka na bya byokunywa by'Umwuka, kuko banywaga ku gitare cy'Umwuka cyabakurikiraga, kandi icyo gitare cyari Kristo. Ariko abensi muri bo Imana ntiyabashimye, ni cyo cyatumye barimbukira mu butayu. Ariko ibyo byababereyeho kugira ngo bitubere akabarore, ngo tutifusa ibibi nk'uko bo babyifuje." "Ibyo byababereyeho kutubera akabarore, kandi byandikiwe kuduhugura twebwe abasohoreweho n'imperuka y'ibihe." (1Abakorinto 10:1-6,11).

Mu butayu, "Abanyamahanga y'ikivange bari hagati y'Abisirayeli batangira kwifusa, Abisirayeli na bo bongera kurira, baravuga batu "Ni nde uzaduha inyama zo kurya?" (Kubara 11:4). "Bagerageresha Imana imitima yabo, bayigerageresha gusaba ibyokurya byo guhaza kwifusa kwabo." (Zaburi 78:18). Uwiteka yakiriye ate icyifuzo cyabo? "Kandi bwira abantu uti: Mwiyereze umunsi w'ejo kandi muzarya inyama, kuko muririye ku matwi y'Uwiteka mukavuga muti 'Ni nde uzaduha inyama zo kurya, ko twari tumereye neza muri Egiputa?' Ni cyo gitumye Uwiteka azabaha inyama mukazirya. Ntimuzazirya umunsi umwe cyangwa ibiri cyangwa itanu, cyangwa

**Icyigisho cyo
kwirinda, mu
ngingo zose
zikigize,
gifite
umwanya
w'ingenzi
mu gusohoza
agakiza kacu.**



icumi cyangwa makumyabiri, ahubwo muzazirya ukwezi kose mugeze aho zizabatungukira mu mazuru zikababihira, kuko mwanzo Uwiteka uri muri mwe, mukamuririra imbere muti 'Twaviriye iki muri Egiputa?.... Inyama bakizishinze amenyo bataramara kuzitapfuna, uburakari bw'Uwiteka bukongerezwa abantu, abatera mugiga ikomeye cyane. Aho hantu bahita Kiburotihatava, kuko ari ho bahambye abifuzaga." (Kubara 11:18-20, 33,34).

Twebwe bimeze bite muri iki gihe?

"Abamaze kumenya ububi bwo gukoresha inyama, icyayi n'ikawa, n'imitegurire mibi y'ibokurya, kandi bakaba bariyemeje kugirana isezerano n'Imana kubwo kwitanga, ntibazakomeza kwiyandavuza bakoresha imirire bazi ko ari mibi ku buzima bwabo.... Uyu ni wo murimo ugomba gukorwa mbere y'uko ubwoko bw'Imana buhagarara imbere Yayo butunganye."⁶

"abantu babasha kuboneza imibiri yabo yahindanyijwe n'imigenzereze mibi y'ibyaha. Igihe banduye, ntibashobora kuramya Imana mu buryo bukwiriye, kandi ntibashobora kuba mu ijuru. Niba umuntu yishimira umucyo Imana yatanganye imbabazi Zayo w'ivugurura mu by'ubuzima, azabasha kwezwa n'ukuri, maze abe ukwiriye ubugingo buhoraho. Ariko natita kuri uwo mucyo, maze akarangwa no kugira imibereho igomera amategeko y'ibaremwe, agomba kuzabona igihano."⁷

"Ibyaha biteye ubwoba bikomeje gukorwa bitewe no kwirundumurira mu irari ry'ibyifuzo bibi."⁸ Ni gute irari ryangiritse rigaragazwa mu buryo bwihariye?

"Gukomeza kurya inyama biteza akaga gakomeye mu mubiri. Nta rwitwazo rw'ibyo usibye irari ribi, ryangiritse."⁹

"Nyuma y'umucyo mwinshi ubwoko bw'Imana bwahawe, nibaramuka bakomeje kugundira ingeso mbi, bakanga kureka inarijye ngo bemere kwakira ivugurura, bazahura n'ingaruka z'uko kwigomeka. Nibaramuka biyemeje gukomeza kugundira irari ribi, ntabwo Imana izabakiza ingaruka zo kwinangira kwabo. 'Bazaryamana umubabaro'"¹⁰

Kurya inyama bizatera indwara z'ibyorezo

Amagambo ateye ubwoba yavuzwe n'Umwuka w'Ubuhanuzi, arushaho kugaragaza ko kurya inyama

byangiza ubuzima bwacu: "Mu ngo zimwe, inyama ni byo byokurya by'ibanze, kandi amaherezo yazo ni ukuzana mu maraso mikorobi za kanseri n'amatembabuzi afite imisemburo y'igituntu. Umubiri wa bene abo bantu uba ugizwe n'ibyo barya, ariko iyo uburibwe n'indwara bibagezeho, babibona nk'igihano batererejwe n'Imana."¹¹

Mu gihe cya Ellen White, abaganga benshi ntibari baziko kurya inyama byashoboraga guteza mu mibiri yacu indwara zishobora kuduhitana. Ariko muri iki gihe, siyansi irabyemeza. Urugero, iyo inyama zokeje, ibinuro biri muri izo nyama birashonga bikagwa ku makara, bigatuma haboneka umwotsi, nawo ugatuma haboneka ibinyabutabire byitwa metilikolantilene na benzopirene. Inyama zokeje, urugero nka bakoni na hamu, zirimo ikinyabutabire cya nitorosamine. Ibyo binyabutabire iyo byinjiye mu mubiri byangiza DNA y'ingirabuzimafatizo, kandi aho gupfa byiyongera vuba, bikarema mikorobi. Inyama nazo zirimo ibinure byinshi biri mu bwoko bwa Kolesiteroli.¹²

"Ishami ry'Umuryango w'Abibumbye ryita ku Buzima, ryashyize mu byiciro inyama zitunganyijwe zirimo hamu, bakoni, salami, na furankifuru, nka karikinojeni yo mu Itsinda rya 1 (izwi nk'itera kanseri bivuze ko hari ibimenyetso bikomeye byerekana ko inyama zitunganyijwe zitera kanseri. Kurya inyama zitunganyijwe bakazifunga mu bikombe, byongera ibyago byo kurwara kanseri y'inda n'iy'igifu. Inyama zitukura, nk'inyama z'inka, iz'intama, n'iz'ingurube, zashyizwe mu itsinda rya 2 ry'ibitera kanseri, bivuze ko zishobora gutera kanseri."¹³

Uretse kurya inyama, na none hari inama zituruka mu Mwuka w'Ubuhanuzi zivuga ku mirire n'imibereho mibi bishobora kwangiza ubuzima bwacu. Nubwo ibyo atari igipimo cy'ubuyoboke, ni iby'ingenzi kubikurikiza kugirango umuntu agire amagara mazima.

2. Kuvanga imbuto n'imboga mu ifunguro rimwe; ntabwo ari byiza

"Imbuto n'imboga ntibigomba kuribwa mu ifunguro rimwe. Ku ifunguro rimwe koresha umugati n'imbuto, mu gihe cy'ifunguro rya kabiri ukoreshe umugati n'imboga."¹⁴

"Abahanga mu bya siyansi bavumbuye ko igifu gikoresha ibinyabutabire bitandukanye mu

Ni izihe ngaruka igifu kigira bitewe no kurya birengeje urugero? Gicika intege cyane, ingingo z'urwungano ngogozi zikagira intege nke n'uburwayi, hamwe n'izindi ngaruka z'ibibi bikurikiraho.



gusya imbuto n'imboga. Igihe imbuto ziribwa, zigomba kuribwa zonyine kandi zigashirwa mu gifu kitarimo ibindi byokurya, kuko kizisya vuba kuruta ibindi biribwa. Ariko iyo habayeho kuvanga imbuto n'imboga (*byose bitwara izihe gitandukanye kugirango igifu kibisyeye*) bishobora gutera gaze mu gifu. Ibyo ni nako bimeze no ku binyobwa; bishobora gutuma umuntu agira kugugara mu mubiri, akagira umuriro mu gifu, ndetse akanaribwa umutwe.¹⁵

3. Kwirinda kurya hagati y'amafunguro

"Nyuma yo kurya ibyokurya ku masaha asanzwe, igifu gikwiriye guhabwa ikeruhuko kingana n'amasahta atanu. Nta cyokurya na gito gikwiriye gushirwa mu gifu kugeza iyihe cyo gufata ifunguro rikurikiyeho. Muri icyo gihe, igifu kiba gikora umurimo wacyo, cyarangiza kikaba noneho iteguye kwakira ibindi byokurya."¹⁶

"abantu benshi bumva baguve neza cyane mu mubiri iyo bariye kabiri ku muni kurusha iyihe bariye gatatu. Abandi, bitewe n'ibibazo by'imibiri yabo, bakenera ifunguro rya nimugoroba, ariko bene iri funguro rigomba kuba ryoroshye cyane."¹⁷

Birashimishije kubona uburyo siyansi muri iki gihe yavumbuye ingorane ziri mu kuryagagura. "Ingaruka zo kuryagagura n'igihe cyo kurya buzima ndetse n'indwara, bimaze imyaka myinshi ari insanganyamatsi ishishikaje abantu. Nubwo ibimenyetso by'indwara byerekana isano iri hagati yo kurya kenshi no kugabanya ibyago byo kurwara, igerageza ry'ubushakashatsi ryerekanye ibisubizo bivuguruzanya. Byongeye kandi, ubushakashatsi buherutse gukorwa bwagaragaje ko ibyago byo kurwara byiyongera cyane iyo abantu bakabije kuryagagura; aho usanga umuntu ashobora kurya incuro zirenze esheshatu ku muni, ibyo rero ntiwabigereranya n'umuntu ufata hagati yifunguro rimwe cyangwa abiri ku muni."¹⁸

Abahanga mu by'ubuvuzi bo muri iki gihe basobanukiwe akamaro ko kwiyiriza ubusa rimwe na rimwe. "Kuba umubiri wakoresha ingirabuzimafatizo zawo mu gihe wabuze ibyo kurya; ni uburyo bw'banze bukora mu rwego rw'ingirakabuzimafatizo kugirango ukureho imyanda, usane ibyangiritse, wongere izindi ngirabuzima nshyashya. Nyuma y'amasahta cumi n'atandatu umuntu atarya, umubiri uzatangira kurwanya uturemangingo duto twanduza. Umubiri uzakomeza kurya ingirabuzimafatizo mbi n'ibyo wahunitse kugirango ubone imbaraga. Ibyo bituma umubiri wawe ugira amahirwe yo kuvanaho ibisigazwa by'ingirabuzimafatizo zidawkiriye, urugero ni nk'ingirabuzima za kanseri."¹⁹

"Kurya gusa ifunguro rya mu gitondo n'irya saa sita byagabanyije ibiro by'umubiri, bigabanya

ibinure byari bifashe ku mwijima, ndetse n'sukari mu gihe cyo kwiyiriza ubusa, kandi byongera ikinyabutabire cya insilini gikoreswa n'umwijima cyane. Uwo musaruro werekana ko, ku bibazo by'sukari mu maraso, gufata amafunguro ahagije ya mu gitondo n'aya saa sita, bishobora kuba ingirakamaro kuruta kurya incuro 6 ku munsi."²⁰

4. Jya wirinda kurya birenze urugero

"Ni izihe ngaruka igifu kigira bitewe no kurya birengeje urugero? Gicika intege cyane, ingingo z'urwungano ngogozi zikagira intege nke n'uburwayi, hamwe n'izindi ngaruka z'ibibi bikurikiraho."²¹

Dukurijke ivuriro rya Mayo, havuzwe ko ibinure cyangwa kalori birenze urugero bihindurwamo ikinyabutabire cyitwa tirigiliseride, bikaba bitera umuvuduko ukabije w'amaraso, bigatera kuziba kw'imitsi y'amaraso, ndetse bikanatwika urwagashya.

Kurya ibyokurya birenze urugero buri gihe; ni icyaha gikomeye gituma umubiri urushaho gucika intege kandi bigatera umutimanama kudakora neza. Kugirango ushobore kunesha iyo myifatire, ugomba kwita kuri ibi: "Niba uziko uru umunyanda nini, wifatira icyuma ku muhogo wawe." (Imigani 23:2). Ibyo dushobora kubigeraho ari uko gusa dufashe icyemezo kivuye ku mutima cyo kwirinda tubifashijwemo n'Umwuka Wera.

5. Kwirinda muri byose

"Ineza yanyu imenywe n'abantu bose, Umwami wacu ari bugufi." (Abafilipi 4:5).

"Ntukihutire kurakara mu mutima, kuko uburakari buba mu mutima w'umupfafpa." (Umubwiriza 7:9).

"Namwe iyo murya cyangwa munywa cyangwa mukora ikindi kintu cyose, mujye mukorera byose guhimbaza Imana." (1Abakorinto 10:31).

"Ahubwo mbabaza umubiri wanje nywukoza uburetwa, ngo ahari ubwo maze kubwiriza abandi nanje ubwanje ntaboneka ko ntemewe." (1Abakorinto 9:27).

"Kwirinda mu bintu byose by'ubu buzima bikwiriye kwigishwa no gushirwa mu bikorwa. Kwirinda mu mirire, mu minywere, mu gusinzira, no mu myambarire ni rimwe mu mahame akomeye agenga imibereho y'Ubukristo bwacu."²²

Tugomba kunywa amazi ahagije buri munsi. Kubura amazi mu mubiri byangiza impyiko kandi bigatuma imikorere y'umubiri ihindagurika. Si ya mazi y'ambara, arimo ibintu runaka, arimo isukari, n'inzoga! Umwami w'umunyabwenge kuruta abantu bose mu mateka, yarasobanuye ati: "Vino ni umukobanyi, Inzoga zirakubaganisha, Kandi ushukwa na byo ntagira ubwenge." (Imigani 20:1).

Tugomba kwambara mu buryo bwubahisha

Imana kandi bukayihesha icyubahiro. Turi abantu bavuga ko bagendana n'Imana buri munsi. Niba twifuza kugendana na Yesu mu buryo bwa bugufi kurushaho, tugomba kwambara neza twikwije. Abaserafi n'abakerubi bipfuka mu maso iyo bari imbere y'Imana. Ihame tugenderaho ku birebana n'imyambarire riboneka mu Gutegeka kwa Kabiri 22:5. None se bimeze bite ku byerekeranye no gusinzira? Igihe cyiza cyo kuryama ni hagati ya saa yine z'ijoro na saa kumi n'ebiiri za mu gitondo. Ni akahe kaga gaterwa no kudasinzira bihagije?

"Ubushakashatsi bushya bwakozwe na kaminuza yo muri leta ya lyowa, bwagaragaje ko abantu bakererwa amasaha make yo kuryama nijoro bagira uburakari bukabije kandi ntibashobore guhangana n'ibibaca intege; ugereranyije n'abantu baruhuka bihagije."²³

Mu gihe dufite ibibazo mu itorero cyangwa mu muryango wacu, birashoboka cyane ko twumva duherereza amakosa ku bandi bantu cyangwa cyangwa wenda abo twashakanye, ariko akensi impamvu y'banze iba iri mu kudashyirwa mu gaciro kwacu. Kubera iyo mpamvu, tugira akamenyero ko kunenga abandi, gusebanya, kandi ikibabaje kurushaho, ni uko turangwa n'umwuka wo kutabarira. Mu gihe tugendera mu buggingo bushya, nimutyo twibande ku kwitegeka. Ntitugaherereze amakosa ku bandi, ahubwo nimureke dutangire kwisuzuma ubwacu turebe aho twananiwe kwiyahisha. Wenda dushobora kuba tutarya neza. Igifu cyacu kiruzuye, nyamara uturemangingo two dufite inzara. Ibyo biterwa n'iki? Ni ukubera ko tutarya indyo yuzuye. Mwibuke ko umuntu ushonje aba afite umujinya. Gerageza kunywa menshi kandi usinzire neza kugirango ugire amarangamutima meza.

6. Kwirinda ndetse n'Imvura y'Itumba

"Abantu bake nibo bamenya isano iri hagati y'ibyo bakunda kurya n'ubuzima bafite, imico yabo, akamaro bafite muri iyi si, ndetse n'amaherezo yabo y'iteka ryose."²⁴

"Ubwoko bw'Imana bugomba kwirinda icyo kwirinda muri byose bisobanuye.... Mbere yuko bashobora mu by'ukuri gusobanukirwa icyo kwezwa by'ukuri no guhuza n'ibyo Kristo ashaka bisobanuye, bagomba, binyuze mu gukorana n'Imana; kunesha ingeso n'ibikorwa bibi."²⁵

"Nta mutu n'umwe muri twe uzakira ikimenyetso cy'Imana mu gihe imico ye ifite ikizinga na kimwe. Ni ahacu gukosora inenge zo mu mico yacu, ndetse no kweza urusengero rw'umutima rukavamo guhumana kose. Ubwo nibwo tuzasukirwa imvura y'itumba nk'uko abigishwa basukiwe imvura y'umuhindo ku munsi wa Pentekote."²⁶

Umwanzuro

Ubu noneho dusobanukiwe ko kugirango duhabwe imvura y'itumba, tugomba kugira imibereho yejejwe nk'uko Imana ibidusaba. Kugirango tugere kuri uko kwezwa, tugomba kunesha ibyaha by'uburyo bwose byerekeranye n'imirene n'uko tubayeho.

Kubera ko turi abantu b'abanyabyaha, ntidushobora kubigeraho kubw'imbaraga zacu

bwite. "Kurandura akamenyero umuntu yagiye yitoza mu buzima kandi akaba yaragatoje ipfa rye, ni ikintu kigoye cyane. Umudayimoni wo kutirinda ntabwo atsindwa mu buryo bworoshye. Afite imbaraga nk'iz'igihanda kandi kumutsinda birakomeye."²⁷

Uburyo bumwe rukumbi bwo kubigeraho ni ukwemera irarika rya Yesu, "Mwese abarushye n'abaremerewe nimuze munsange ndabaruhura." (Matayo 11:28).

Tugomba gusohoza uruhare rwacu maze tukareka Yesu akadukoreramo mu buryo bwuzuye. "Nuko abo nkunda, nk'uko iteka ryose mwajyaga mwumvira uretse igehe mpari gusa, ahubwo cyane cyane ntahari, mube ari ko musohoza agakiza kanyu mutinya, muhinda imishyitsi, kuko Imana ari yo ibatera **gukunda no gukora ibyo yishimira**." (Abafilipi 2:12,13).

Nibyo, kwinezeza birakomeye ariko biroroshye kubitsinda; biragoye niba tubikora twenyine, ariko biroroshye niba Yesu ariwe udufasha. Mbese koko urifusa kuba umuneshi? Ese urizera ko Yesu ashobora kugufasha? Nk'itorero tumaze imyaka 100 turi kuri uyu mubumbe. Turarushye kandi buri wese muri twe arashaka gutaha, si byo se? kubw'ibyo rero, dukwiriye gukorana n'Imana mu nyigisho Zayo zose, binyuze mu mbaraga ishaka kuduha; no gusenga dushyizeho umwete dusaba ko Yesu yaza vuba ku bicu byo mu ijuru kugirango atwijyanire iwacu.

Aho biboneka:

¹ *Kwirinda kwa Gikristo n'Isuku ya Bibiliya*, p.28,29.

² *Kwirinda*, p.138.

³ *Ivugabutumwa*, p.265.

⁴ *Inama ku Mirire n'ibyo Kurya*, p.380.

⁵ *Pacific Union Recorder*, October 9, 1902.

⁶ *Abageze mu Zabukuru*, p.129.

⁷ *Inama ku Mirire n'ibyo Kurya*, p. 70.

⁸ *Ibid.*, p.44.

⁹ *Ibid.*, p.407.

¹⁰ *Ibid.*, p.25.

¹¹ *Ibihamya by'itorero*, vol.3, p.563.

¹² <https://www.sciencedirect.com/topics/earth-and-planetary-sciences/nitrosamine>

¹³ <https://www.cancercouncil.com.au/1in3cancers/lifestyle-choices-and-cancer/red-meat-processed-meat-and-cancer/>

¹⁴ *Ibimenyetso by'ibihe*, kuwa 30 Nzeri, 1897.

¹⁵ <https://timesofindia.indiatimes.com/life-style/health-fitness/diet/fruits-you-should-not-have-together/articleshow/58459356>

¹⁶ *Inama ku Mirire n'ibyo Kurya*, p.179.

¹⁷ *Kwirinda kwa Gikristo n'Isuku ya Bibiliya*, p.58.

¹⁸ <https://pmc.ncbi.nlm.nih.gov/articles/PMC6520689/>

¹⁹ <https://drpompa.com/fasting-diet/fastng-autophagy>

²⁰ <https://lifespa.com/diet-detox/diet/6-meals-a-day>

²¹ *Inama ku Mirire n'ibyo Kurya*, p.101.

²² *Kurera Umwana*, p.394.

²³ <https://www.healthline.com/health-news/why-a-lack-of-sleep-can-make-youangry>

²⁴ *Abahanuzi n'Abami*, p.562.

²⁵ *Kurera Umwana*, p.396.

²⁶ *Ibihamya by'itorero*, vol.5, p.214.

²⁷ *Kurera Umwana*, p.408.

Gukurwa mu Bigera- 5 gezo Bikaze

Kuwa Gatandatu, 18 Nyakanga 2025

Byateguwe na Liviu Tudoroiu

Dufite amahirwe y'umugisha yo gutuma iki **Cyumweru cyihariye cyo Gusenga** kiba ikinejeje kubw'ibitekerezo bike by'amateka, by'umwihariko muri iki gihe aho benshi bishimira imyaka 100 tumaze tubayeho nk'itorero, mu gihe abandi bagaragaza impungenge zikomeye ku mikorere yacu y'iby'umwuka.

Kugirango tumenye mu by'ukuri uko imimerere yacu y'iby'umwuka imeze, haba buri muntu ku giti cye cyangwa mu rwego rw'itsinda ry'abizera, tugomba mbere na mbere kumenya isōko y'ihinduka ryose ryiza, ishingiro ry'ibikorwa byose byiza, Uwihihuyue ubwe ko ari "inzira, ukuri, n'ubugingo." Turamutse tutamufite nk'icyitegererezo gitunganye, ntidushobora kumenya imimere yacu nyakuri y'iby'umwuka.

Uko twitekerezaho bishobora gutandukana bitewe n'uko tubona ibantu. Dushobora kurebesha amaso y'Umukiza wacu, tugashaka ukuri Kwe, cyangwa tukarebesha amaso yacu ya kameremuntu wikanyiza, uwo usanga akensi atabona intege nke ze, ku buryo adashobora kugera kure yishingikirije ku cyubahiro kiranga imico ye. Nyamara kandi, **izina ry'icyubahiro ni ikimenyetso gisigara mu bwenge bw'abantu ku birebana n'uwo turi we; imico ni ukuri kw'lmana ku byerekeranye n'icyo turi cyo n'abo turi bo mu by'ukuri.**

Niyo mpamvu **UKURI** ari ikintu cy'ingenzi cyane; nk'uko benshi muri twe tubizi, ukuri kunyura mu byiciro bitatu: icya mbere, kurwanya cyane; icya kabiri, gusekwa; icya gatatu, kwemerwa n'abantu bose. Uku "Kubiganiraho" gukomeje, kwerekana kwerekana uburyo butandukanye bwo kwishimira imyaka 100 y'insinzi cyangwa se gutekereza imyaka 100 "y'ibyagezweho" bivanzie n'ibyaduciye intege. Ibyo bituganisha ku ngingo ikurikiyeho mu bushakashatsi bwacu.

Kuva mu mwaka wa 1914 kugeza mu mwaka wa 1945, umubare munini w'abizera b'Abadiventisiti bemeraga badashidikanya intambara z'isi zariho icyo gihe zari kugaragaza iherezo ry'imibereho y'abantu, kandi ko zari gutuma habaho kugaruka kwegereje k'Umwami wacu Yesu Kristo. Mu rugaryi rw'umwaka wa 1913 no mu mezi abanza y'umwaka wa 1914, abantu benshi barushijeho kwizera ko intambara y'urujjo n'urugomo ziba ku isi, akaba atari ahantu abantu b'imitima itaryarya kandi b'inyangamugayo bashobora kwitegurira kuzabaho iteka. Mu by'ukuri, ibyo byiyumvo

ntibyakwirakwijwe gusa mu bizera b'itorero bari bategereje kugaruka kwa Kristo, ahubwo byakwirakwijwe no mu bantu benshi batemeraga ko Imana ibaho, abahakanamana, n'abantu bo mu madini anyuranye.

Mbese amaraso y'abishwe bahorwa ukwizera kwabo ntiyari ahagije ku buryo yatuma abantu bashidikanya bahakana ko iryo tsinda ari iry'ukuri?

Mu gitabo cye yanditse cyitwa "Imikorere y'Abanyabubasha" ku ipaji ya 217, intiti mu bya Bibiliya yitwa Walter Wink, yavuze ko "itorero ryari ryarahagurukiye kurwanya igutugu cy'ubwami bw'Abaroma mu butarangwamo urugomo, ryaje kwsanga rifite insinzi mu buryo ritari ryitezze... Nk'uburyo bwo kubungabunga ubutware bwaryo bwa cyami; byasabye ko itorero itorero ritanga ikiguzi cyo kwemera ko urugomo rukoreshwa. Ariko ikurwaho ry'urugomo mu butumwa bwiza byakuyeho ibuye fatizo ryari rishingiweho, bituma Ubukristo buhinduka idini ry'umuntu ku giti cye n'ubuzima bwa nyuma y'urupfu burindwa n'Imana y'inayburakari kandi iteye ubwoba. Iyo gahunda yose yayoborwaga neza n'itsinda ry'abapadiri b'ibirangire, bari bashygikiwe n'abategetsi b'isi, ubu mu mateka bakaba bafatwa nk'abakozi b'Imana batoranyiwe."¹

Carl Von Clausewitz, umwanditsi w'igitabo Vom Kiriyege – igitabo kivuga ku ngamba zifashishwa mu ntambara, ashobora kuba ari umwe mu bantu b'abahanga mu bya gisirikare bafite ubushobozi bwo gushyira mu bikorwa igitekerezo cy'intambara nk'igikorwa cy'imbaraga cyo guhatira umwanzi gukora ibyo dushaka, kandi na none, iyo ntambara **igaragarira mu buryo butatu butangaje: bugizwe n'ubugizi bwa nabi, urwango, n'ubwanzi, bigomba gafatwa nk'imbaraga kamere y'impumyi.**

Nyamara kandi ibigaragazwa n'uku kuri, abahanga mu bya tewolojiya bagerageza guhuza imico ya Yesu Kristo n'urugomo rw'intambara.

Abayobozi bafite imitekerereze nk'iya Kayafa, iyo bahuye n'ikigeragezo cyo gutakaza ubutware bwabo, bavugana ubukana bati: "Tugire dute ko uwo muntu akora ibimenyetso byinshi? Nitumurekera dutya bose bazamwizera, kandi Abaroma bazaza barimbure umurwa wacu n'ubwoko bwacu." (Yohana 11:47,48).

Yesu ntiyigeze ajya mu ntambara, kandi ntiyigeze agirira nabi umuntu uwo ariwe wese cyangwa itsinda ry'abantu haba mu buryo bw'umubiri, cyangwa mu buryo bw'amarangamutima. Mu guhangana n'umuco w'intambara wari wogeye mu gihe Cye, yagaragaje uko imiyitwarire y'umuntu igomba kuba mu bihe nk'ibyo by'amakuba: "Mwumvise ko byavuzwe ngo 'Ukunde mugenzi wawe, wange umwanzi wawe.' Ariko jyewehe ndababwira nti 'Mukunde abanzi banyu, musabire ababarenganya." (Matayo 5:43,44).

Bityo rero, abashyizeho urufatiro rw'Abadiventisiti, n'abagoroz ikeriye; bakurikiye urugero rwa Kristo, basobanukirwa ko kugira imyifatire nk'ijo no gukunda abanzi bawe, bisaba umuntu gutakaza umudendezo, agafungwa, agashinyagurirwa, ndetse akanicwa. Abadiventisiti bakundaga Yesu by'ukuri bari bazi ikiguzi bagombaga kwishyura kugirango bagaragaze ukwizera kwabo mu ijwiriranguruye.

Mu mpeshyi, buri wese yishimiraga umunezero. Ariko mu itumba, cyabaga ari igihe cy'amakuba; no gutekerezo ku kuntu warangurura ukwizera kwawe, bikaba byarashoboraga gutuma utakaza kwemerwa n'umuryango mugari w'abantu muri rusange. Iki gihe nibwo ukwizera kwacu kugiyekugeragezwa ubwo incuti twahoranye kera zizahinduka abanzi bacu.

Muri Rapor ngarukamwaka ya gatatu y'Ihuriro y'Inteko Nkuru Rusange y'Abadiventisiti b'Umunsi wa Karindwi, mu Rwibutso n'Integuza, kuwa 23 Gicurasi, 1865; igitekerezo rusange cyari iki gikurikira: "Dutegetswe kwanga kugira uruhare urwo arirwo rwose mu bikorwa by'intambara no kumena amaraso." Nyamara mu gihe cy'intambara ya mbere y'isi yabaye mu mwaka wa 1914 kugeza mu wa 1918, Abadiventisiti b'Umunsi wa Karindwi benshi – 98% hakurikijwe ibipimo bimwe na bimwe, bahatiwe kujya mu ntambara; bifatanya n'imashini y'ubwicanyi ku isi hose, bazi neza ko imyifatire nk'ijo yari inyuranye n'imyizerere yabo.

Abantu bake cyane, ni ukuvuga 2% gusa; bahisemo inzira inyuranye n'ijo. Bahisemo kuba abantu basuzuguritse, abaturage bakabafata nk'abaciwe, aho kureka Kristo no kugomera amategeko y'Imana. Kubera ko bari baracengewe n'Umwuka wa Kristo mu buryo buhamye, icyo gihe bahuye n'ibigeragezo; amaso yabo akaba yari ahanze ku bwiza bwa cya gihugu kindi – aricyo gihugu gihoraho. Basobanukiwe neza ko imitekerereze y'intambara idashobora na rimwe guhuza n'itegeko rigira riti: "mukunde abanzi banyu." Kuba amategeko n'Imana n'amategeko ya Kayisari bitarashoboraga guhuza, byatumye batotezwa mu buryo bukaze, ibyo bikaba byaragerageje icyemezo abo bantu b'indahemuka bafashe.

Igihe n'ahantu akensi byagiye bishora mu ntambara abasore babaga bataziranye kandi ntibaganirane urwango, bahatirwaga kwica kubera impamvu zashiyizweho n'abantu bakuru bakesya baziranye kandi bafitanye urwango rukomeye ariko ntibabe batinyuka gufata intwaro bo ubwabo.

Ntibigoye kubona ko iyo ngengabitekerezo ihabanye cyane n'imico y'Imana. Igaragaza rwose inkomoko y'icyaha. Igikorwa cyo guhatira ibiremwa bifite kuvuga cyangwa gukora ikintu kinyuranyije n'umutimanama wabyo bigaragaza itangiriro ry'intambara ikomeye mu ijuru; ubwigomeke bufite umuzi ku guhatira no kwangiza umudendezo

Gusubiza amaso inyuma no Kurabagirana

Kuvugurura bikubiyemo ibikorwa! Nimutyo tugagaraze umucyo wa Kristo mu bikorwa byacu. Nimutyo dufate akanya dutekereze by'ukuri:

[buri wese yibaze] mbese mfite ubutwari bwo guhagarara nshikamye mu bihe by'amahoro? Byagenda bite se mu bigeragezo?



*Gusoma igitabo cya Yobu utabanje
guhura n'ibigeragezo byamugezezo
ni kimwe; ariko kugisoma mu gihe
cyo kwiyiriza ubusa no gusenga mu
bihe by'imibabaro ikomeye, ni ikindi.*

w'lmana.

Ubutwari mu gihe cy'akaga

Mu mpeshyi, ibiti byose biba bifite ibara ry'icyatsi kibi, ariko iyo igihe cy'itumba kigeze; ibiti bisanzwe ari icyatsi kibisi nibyo gusa bikomeza kugira ibara ryabyo. Ni muri ubwo buryo, mu bihe by'amakuba y'iby'umwuka n'imibereho y'umuryango mugari w'abantu, nibwo imico yacu nyakuri igaragara. Iyo ibirimby'unuriro bikoze ku birenge byacu, nibwo gusa tumenya abo turi bo by'ukuri. Abantu bagwa mu moshya bashobora kwitwa "Abakristo bakunda kudamarara".

Mbere yuko icyo gihe cy'ibigeragezo kigera, biratworoheye kuvuganira ukuri mu gihe itarabirwanya; ariko iyo akarengane gatangiye, mbega ukuntu abantu bake cyane aribo baba biteguye gutanga ikiguzi cy'ukwizera kwabo bavugal! Benshi bari bashishikajwe no gukurikira Yesu igihe yatangaga imitsima ku buntu ku misozi y'i Yerusalem, nyamara se ni bangahé muri abo bajanye mu rugo intonga cumi n'ebiyiri z'ubuvungukira bari biteguye guhara icyubahiro cyabo kugirango bahagarare iruhande rw'Umwana w'umuntu wicishaga bugufi, wabambwe hagati y'ijuru n'isi.

Abigishwa baciwe intäge cyane n'uko Yesu atiyerekanye ko ari Imana y'ijuru n'isi binyuze mu kugaragaza imbaraga n'ubutware bivuye mu ijuru. Bari kwishimira kumubona nk'Umwami wa Isirayeli watsinze, ntibamubone nk'umuntu uraho ikimenyetso cy'uko ari umugizi wa nabi, wahamwe n'icyaha "cyo kugandira ubutegetsi bw'Abaroma."²

Gusoma igitabo cya Yobu utabanje guhura n'ibigeragezo byamugezezo ni kimwe; ariko kugisoma mu gihe cyo kwiyiriza ubusa no gusenga mu bihe by'imibabaro ikomeye, ni ikindi. Kuririmbira Kristo ni kimwe, ariko gupfira Kristo byo ni ikindi. Kogera muri pisine ni kimwe, ariko kogera mu nyanja byo ni ikindi, aho uba ugomba guhangana n'imiraba yaho.

Ibihe bigoye bituma abantu baba abanyambaraga, kandi abantu bakomeye batuma habaho ibihe byiza. Icyakora kandi, ibihe byiza bituma abantu bagira intäge nke, kandi abantu b'abanyantege nke nibo batuma habaho ibihe bigoye. None nimurebe aho turi, nyuma y'imyaka 100 tubayeho, duhanganye n'ibibazo n'akaga, duhura n'ibizazane bishya maze bikagaragara nk'imigirire y'imikorere mishya, "yigaragaza uko iri" ku marembo y'itorero.

Igisekuru cy'abaharanira lvugurura cyavutse mu bihe bigoye, nuko gihererekanya n'ikindi cyagikurikiye, cyubatswe n'abantu bakomeye. Icyakora muri iki nubwo bigaragara nk'aho isi iyobowe n'abantu b'abanyantege nke, ibyo byatumye twongera guhura n'ibihe bigoye.

Abagize igisekuru gishya cy'Abavugurura, bahanganye n'ibishuko n'ibikangisho bikaze cyane kuruta ibyo bari barahuye na byo mbere. Ab'igisekuru cyatambutse baruhukiye mu mahoro, amarimbi bashyinguwemo yaribagiranye, mu gihe abana babo n'abuzukuru babo bibuka bike cyane ku ntambara ba sekuruza babo barwanye.

Mu gihe cy'imyaka irenga 2,000 Roma n'isi, binyuze kuri "Kayisari" byagiye biggerageza gushuka Abakristo b'indahemuka kugirango bagire ibyo bahindura ku birebana n'ukwizera bafitiye Yesu no kwica amategeko y'lmana. Kuva mu gihe cya Kristo, amategeko y'Abaroma niyo yagiye aganza mu kugenga abantu, Abakristo ba mbere batanze amazina yabo, bahara icyubahiro cyabo n'ibyo bari batunze, ndetse amaherezo bemera no gupfira umukunzi wabo Kristo, bashingiye ku itegeko rikomeye ryavugaga ngo "Non licet es vos!" — "Ntiwemerewe kubaho!" Ubu ngubu, "Kayisari wo muri iki gihe" na we asaba ikintu nk'icyo: kuganduka utiriwe utekereza niba bikwiriye, bitaba ibyo ukuba ukwiriye gupfa. Ibyo nibyo byatumye habaho lvugurura mu Badiventisiti b'Umunsi wa Karindwi.

Ni iby'ukuri ko impano y'ubuzima twahawe n'lmana iba ikubiyemo "umusaraba" wacu bwite. Imana itanga umusaraba, ariko abantu nibo bawuteramo imisumari. Kubw'ijo mpamvu, dufite ingeri ebyiri z'amateka; imwe yanditswe n'abatotezaga bakoresheje wino y'ubugome, indi yanditswe n'abishwe bahorwa ukwizera kwabo bayandikisha amaraso yabo bwite.

Isuzuma ritarangwamo uburyarya

Ba sekuruza bacu, aribo batangije ivugurura, banditse amateka yabo bakoresheje amaraso yabo bwite, kuko bahaye agaciro ukuri bakurutisha icyubahiro cy'iyi si cy'akanya gato. Mubihugu by'Abakominisiti nka Romaniya, abizera bacu bavukijwe uburezi bw'ibanze, bamburwa umudendezo n'uburenganzira bwa muntu. Muri ibyo bihe by'umwijima, abategetsi bensi bari kwirata bat: "Reka dutegereze imyaka mike gusa, muzashiraho burundu." Ariko yitaye ku bwoko Bwayo igihe cyose, kandi amaherezo abakandamizaga nibo barimbutse, bicwa n'ubwibone bwabo.

Kugirango turabagirane umucyo, ntidukeneye guhutaza abandi cyangwa ngo tubanegure mu magambo yacu no mu bikorwa byacu. Nimutyo imico ya Kristo irabagiranire muri twe, nibwo impaka zerekeranye no kumenya "uwera kurusha undi" zizashira. Nimureke umwuka w'ijuru udutwikire aho tujya hose, kugirango abantu batabona ko turiho nk'itorero gusa, ahubwo banamenye itandukaniro riri hagati y'icyiza n'ikibi. Baziyumvisha ingaruka zo kuba turi mu muryango mugari w'abantu. Nguko uko tuzagira itandukaniro.

Nitwe bireba: mbese tuzahakana ukuri cyangwa tuzemera gukira? Tugomba kwibuka ko kugera ku nsinzi bidasuzumirwa ku burebure bw'umusozи dushobora guterera, ahubwo bireberwa ku mubare w'abantu dushobora kugeza ku gasongero kawo.

Uramutse urebeye gusa ku mubare w'abizera barigize, wasanga itorero risa nk'aho ntacyo ryagezehe mu bwiyongere. Ariko turamutse turebeye ku ndangagaciro z'abarigize, atari ku bwinshi bwabo, twaba tubona mu buryo butandukanye rwose umurimo w'itorero. Muri Zefaniya 3:12, Uwiteka aha isezerano abasigaye bo mu gisekuru gisheruka: "Ahubwo nzagusigamo ubwoko bw'indogore n'abakene, kandi baziringira izina ry'Uwiteka." Ayo magambo agaragaza ko ku iherezo ry'isi, abagize ubwoko bw'lmana batazaba ari imbagya y'abantu benshi basakuza bishimira ko batsinze, ahubwo rizaba ari itsinda ry'abantu bababaye kandi bicishije bugufi, bizeria izina ry'lmana gusa.

Nk'uko dushobora kubibona, nta kurata cyangwa kugaragaza imbaraga mu buryo burenze urugero bizabaho mu gihe cyo kugaruka kwa Kristo. Ahubwo, hari abasigaye b'indahemuka, b'abanyamubabaro, batitabwaho n'abantu, kandi badashishikazwa n'amahame y'isi ku byerekeye ubutunzi n'ubwinshi bw'abayoboke. Nyamara nibo batwara umucyo w'ukuri kw'lmana.

Mbese ni iki kirimo kuba?

Iyo ubwiza bw'Uwiteka buturasie, nibwo gusa dushobora kugaragaza ko dufite imico itunganye itwerekeza ku kwizinukwa no kwanga ukwinezeza kurangwamo inarijye duterwa na kamere yacu y'inacyaha. "Igihe imico ya Kristo izagaragarira mu bwoko Bwe mu buryo butunganye, nibwo azaza kubatwara nk'abe bwite."⁷³

Mu gihe dutekereza ku gihe cyacu cyahise, dushobora kwemeza ko Kristo yakomeje kubana n'ubwoko Bwe mu bigeragezo no mu mibabaro. Mu nguni zose z'isi, aho bene data bagiye bahura n'ukurwanywa gukomeye, Yesu yabaga ahari, akitegereza ubudahemuka bwabo, akabamurikishiriza ubwiza Bwe. Muri buri cyumba cy'urukiko, muri buri kasho y'umwijima ya gereza za kure, Yesu yabaga ari kumwe n'umugen We. Ubutegetsi bw'igitugu bwateje imibabaro ikomeye, bufunga, kandi bucecekesha abizera b'itorero, bubambura umudendezo wabo n'ubwisanzure bwo kuvuga. Abaharanira ivugurura bamaze imyaka myinshi bamamaza ukuri. Kubwo kuba abasigaye bahanz amaso amategeko y'lmana kuruta amategeko y'abantu, bagiye bagerwaho n'ingorane nyinshi, bituma abakomeye bo muri iyi si babagirira urwango.

Birasa n'aho nta kintu icyo aricyo cyose twagerageje kugeraho cyigeze gishimisha ijuru ku buryo byatuma Yesu arangiza umurimo We wo gusabira abantu mu buturo bwera, kandi imico Ye ikagaragarira mu buryo bwuzuye muri twe. Turacyari hano ku isi, dusangiye ibirushya, dusangiye amavuriro, dufite indwara zimwe, kandi ibituro tuzahambwamo ni bimwe nk'iby'abandi bantu bo ku isi. Hari ikintu kimwe cyabuze muri ibi ngibi, cyibutsa ikibazo cyabajijwe n'umusore w'umutunzi muri Matayo 19:20, "icyo dusigaje ni iki?"

Imibare y'lmana

Dukunda kwibanda cyane ku kubarura umubare w'abizera bagize itorero ryacu, tumenyereye guha

agaciro cyane ubwinshi bwabo; ariko Uwiteka atwibutsa ko insinzi ishobora kugerwaho kabone nubwo baba bake rwose.

Tekereza kuri raporo y'ubwinshi bw'abantu bari bagandagaje mu kibaya cya Dura: abantu batatu b'indahemuka bahagaze batemeranya n'ubwami bwa Babuloni bwari bunini cyane. Igihe yajugunywaga mu rwobo rw'intare, Daniyeli yari umwe, mu ngabo z'Abamedi n'Abaperesi zari zishyize hamwe. Mu gihe cy'umwamikazi Esiteri, Moridekayi na Esiteri bari bahanganye n'abantu batabarika batotezaga Abayuda.

Kandi i Kaluvari, tuhabona Simoni w'Umunyakurene, umutware utwara umutwe w'abasirikare, n'igisambo ku musaraba, bahanganye n'itsinda rinini ry'abantu bari barakaye cyane. Ariko kandi, muri ibyo bihe byose; abo bantu bari bonyine, nibo batahukanye insinzi nyakuri muri benshi.

Namenye ko imibare igaragaza gusa ko mu nyanja harimo ubwato cyangwa inkuge mu nyanja. Imibare gusa ntacyo imaze iyo lmana itabigizemo uruhare, ariko igihe iyo mibare ihujwe n'Umukiza wacu; igira agaciro gakomeye cyane. Umuntu umwe kongeraho lmanabihwanye na benshi.

Ijambo ry'lmana ryahumetswe riragira riti: "lmana ifite abana, ndetse benshi muri bo bari mu matorero ya Giporotesitanti, kandi ikagira n'umubare munini muri kilizya Gatolika b'abanyakuri rwose mu kumvira umucyo bazi, kandi b'abanyakuri mu gukora uko bashoboye kose bagakurikiza ibyo bazi kurusha umubare munini wo mu Badiventisiti bubahiriza Isabato batagendera mu mucyo."⁷⁴

Eliya yari umunyamabanga mwiza cyane. Yigeze gutanga raporo yerekana umwizera umwe. Ariko iyo raporo yari iy'imbere mu itorero. Amateka atwigisha gukurikirana na raporo y'abantu b'indahemuka bari hanze y'itorero. lmana niyo yabaye umunyamabanga wa raporo y'abo hanze y'itorero. Eliya yabaye umunyabanga wa raporo y'imbere mu itorero. Imbere mu itorero harangwaga umwizera umwe gusa, ariko hanze yaryo harangwaga abizera 7,000.

Umunyamabanga w'imbere mu itorero, ariwe Eliya, yatangajwe cyane na raporo y'umunyabanga wo mu ijuru wari wavye iby'abo bantu 7,000. Ikibazo Eliya yari afite si umubare gusa, ahubwo wenda icy'ingenzi kurushaho ni impamvu lmana itamuhishuriye iryo bangka nk'umuhanuzi. Kubw'ibyo rero, turabona ko n'abahanuzi badashobora gusobanukirwa ubushake bw'lmana, kandi ku rundi ruhande, ntibashobora kubona igiceri [cyatakaye] batagihishuriwe n'lmana.

Muri iki gihe, dushobora gukora ikosa nk'iryo umuhanuzi Eliya yakoze. Nizera ntashidikanya ko Abadiventisiti b'Umunsi wa Karindwi Bavugurura bahagarariye umuhanuzi Eliya. Kandi kubera iyo mpamvu, ndatekereza ko dufite akamenyero ko kwibwira ko ari twe bantu bonyine basigaye mu isi, nk'uko Eliya yabyibwiraga, ko ari twe twenyine bantu b'indahemuka ku Uwiteka.

Ariko dufite abandi bene data na bashiki bacu batabarirwa mu itorero, kandi tuzatungurwa cyane no kubabona bavuye mu mpande zose z'isi, bifatanye n'ukuri kwamamazwa n'Abadiventisiti b'Umunsi wa Karindwi Bavugurura.

Mu gihe umurimo w'lmana uzarangizwa n'imbaraga y'Umwuka Wera, bamwe muri twe bazaba baramaze gupfa. Ubutumwa buzatandukanya abantu kandi bwongere kubaha icyerekezo hakurikijwe ibyo bafite mu mitima yabo.

Bamwe bafite imyifatire y'ubworoherane bazifatanya n'isi mu buryo bwihue cyane; naho abandi bafite imyifatire yo gutsimbarara ku myifatire igendera ku mategeko ubutagamburura, bazagwa mu bwaka. Keretse gusa abantu bishingikiriza kuri Kristo nibo bonyine bazakomeza gusigasira iby'umwuka mu buryo bwiza, kandi bakurikize icyitegererezo gitunganye cya Kristo, We wagaragaje ubutabera nimbabazi mu buryo buboneye.

Amatsinda abiri atandukanye

Hariho itsinda ry'abantu bari bazi ukuri, ariko bakaba batarejejwe na ko. Mu mvugo yo muri iki gihe, ibyo tubyita "ubwigenge"; ni ukuvuga umudendezo wo kwishora mu byaha.

"Ubwo umugaru uteye ubwoba uzaba wegereje, inteko nini y'abantu bavugaga ubwabo ko bizera ubutumwa bwa Marayika wa gatatu, ariko bakaba batarejejwe binyuze mu kumvira ukuri, bazava ku kejo maze bifatanye n'abarwanya ubwo butumwa. Ubwo bazifatanya n'ab'isi kandi bagahuza na bo imigambi, bazaba babona ibantu kimwe; maze ubwo ikigeragezo kizabageraho, bazaba biteguye guhitamo ikiborohey, aricyo ruhande rurimo benshi. Abantu bafite impano ndetse bazi kuvuga neza, bahoze bishimira ukuri, bazakoresha izo mpano zabo mu gushuka no kuyobya abantu benshi. Bazahinduka abanzi bakomeye b'abo bizeraga kimwe"⁵

Ubwigenge butuma umuntu agaragaza ibitekerezo by'amajyambere, bityo agatwarira isanduku ibumoso. Ku rundi ruhande, abantu bashyira mu gaciro, bazwiho kuba ari abahanga mu by'amategeko, batwarira isanduku iburyo. Ibyo aribyo byose, ni uburyo bwo kuyobora ubwato. "Niba Satani adashobora kugumisha abantu mu rubura rw'ubunenganenzi, azagerageza kubashora mu bwaka bukaze."⁶

Abasigaye bo mu bwoko bw'Imana ntibazatega amatwi ibitekerezo bivuga iby'ubwigenge bidafashije, cyangwa ngo bumve ibitekerezo bidafite ireme by'ibyo Imana ishaka bitangwa n'abantu bagira ishyaka ry'amategeko. Ahubwo mu cyimbo cy'ibyo, kubw'ubuntu bw'Imana, ntitugomba, "guhindukirira iburyo cyangwa ibumoso, [ahubwo tugomba] gukura ikirenge cyacu mu bibi." Imigani 4:27.

Ubwoko bw'Imana bwasigaye, abazaba barakijiwe, bazakoreshwa nk'inzabya z'Imana, bazaba bafite amavuta y'Imana (Umwuka Wera), nk'umugabane w'uwo murimo ukomeye ugomba kugeza ku bantu ubutumwa buheruka mbere y'herezo ry'amasegonda make azasoza amateka ya muntu.

Ibyigisho bigomba kwigwa

Hari ikindi kibazo gihertse kubaho ku

isi yose cyadusigiye isomo nk'itorero. Twumvaga ibitekerezo by'abantu bivuguruzanya mu buryo butagize icyo butwaye. Byari umuraba woroheje, nyamara byateje imvururu ahantu hamwe na hamwe, tekereza ubwo undi muraba uzaba uje. Mbese tuzaba tugikomeje kuba incuti, cyangwa bamwe bazagaruka ku myifatire nk'iyo bagaragaje mu bihe nk'ibi by'ibibazo byugarije isi.

Bisa n'aho tutitaye ku ngorane duhura nazo, tukaba twirengagiza akarengane nyakuri katugeraho. Mu gihe cy'imyaka myinshi, nagiye mbona ko dufite akamenyero ko guteza imbere icyifuso cyo kwiga ingingo zihanitse mu byerekeranye n'impaka zigibwa muri tewolojiya, mu gihe tureka kwita ku bantu b'agaciro kenshi tubona ko batagifite ibyiringiro. Icyakora, Yesu ababona nk'ab'agaciro, akabakunda bikomeye.

Ntidushobora kurwanya igihe. Mu gihe tukiri hano ku isi, niko dushobora kugaragaza ko tudashishikajwe cyane n'iby'ijuru. Uko turushaho gutinda hano, niko turushaho kwigira nk'aho turi abaho. Nk'uko Abayuda bigiraga nk'aho bifatanyije na sekuru Aburahamu, niko natwe dushobora gusaba kwifatanya nk'abatangije ubugorozu mu mwaka wa 1914 tudafite imibereho yabarante. Umugani w'umunyabwenge uragira uti: "uko turushaho kwiyemera, niko turushaho kuba abatagize icyo bafite."

Ikibabaje ni uko, "abatuye isi bitangiye cyane kuyoborwa na Satani. Akora nk'imana y'iyi si. Abantu bishyize mu maboko y'umubi rwose, bakorana na we mu migambi ye, bakamufasha mu migambi ye yo kurwanya ubutegetsi bw'Imana."⁷

Intego y'uwo mugome ukomeye buri gihe yabaga ari iyo kwiregura no kugerazeza kugaragaza ko ubutegetsi bw'Imana ari bwo bwatumye yigomeka, bigatuma imbagi y'abantu benshi bemera uburyo bwe bwo gusobanura intambara ikomeye imaze igihe kirekire cyane. Mu gihe cy'imyaka ibarirwa mu bihumbi, uwo mugambanyi yashyize ibinyoma mu mwanya w'ukuri. Twese twasomye igitabo cy'Intambara ikomeye, nyamara ntitiwigeze dusenga dusaba Umwuka Wera umuti wo gusiga ku maso. "Iyindi ngeri" izerekeza umusomyi ku mwanzuro utandukanye rwose n'uwo.

Iyo dusubije amaso inyuma tukareba ibyo twagezeho n'ibyatunaniye mu myaka 100 ishize, nk'ubwoko bw'Imana dushobora kubona ko hari aho twagize ibihe byiza n'aho twagize ibihe bibi. Niba hari ibyagezweho byiza, tubikesha Imana. Mu by'ukuri, dufite byinshi byo kwigira ku nsinzi yagezweho, ndetse no bicantege byatugezeho.

Kugirango tubitekerezeho

Iyo turebye abigishwa n'ibababayeho mu gihe cyahise, abensi muri bo ntibari kuba bujuje ibisabwa kugirango babe bagenzi bacu muri iki gihe. Matayo yari umukoresha w'ikoro, Petero yari umuntu uhubuka kandi utarize, Yohana yari umunyamahane, Toma yari umuntu ushidikanya, Yuda yari umunyabwenge wagiraga uburiganya, kandi urutonde rushobora gukomeza.

Iyo turebye mu isezerano rya kera, Mose ntiyari yujuje ibisabwa kugirango abe umwe muri

*Namenye ko
imibare igaragaza
gusa ko mu nyanja
harimo ubwato
cyangwa inkuge
mu nyanja. Umuntu
umwe kongeraho
Imana bihwanye
na benshi.*



bagenzi bacu kuko yishe umunyegiputa abiherewe uburenganzira n'Imana.

Mbese twavuga iki kuri mukuru we Aroni wahawe inshingano z'ubugabura mu itorero; maze mu buryo bw'umwihariko nyuma yaho akaba ariwe wayoboye abantu mu buhakanyi binyu mu gushongesha izahabu maze akararikira abantu gusenga ikigirwamana cy'iniana y'izahabu?

Ni iki twavuga kuri Eliya utari kuzuza ibisabwa kugirango abe mugenzi wacu, bitewe n'uko yari yaragambaniye umurimo w'Imana agahunga Yezebeli?

Mu isezerano rishya, dusangamo abantu b'intwari zikomeye bongeye kwisubiramo:

Yohana Umubatiza, nyuma yo kubwiriza iby'ubwami bw'Imana, ubwo yari afunzwe, yaragize ati: "Mbese ni wowe wa wundi ukwiriye kuza, cyangwa dutegereze undi?" (Luka 7:19).

Petero, nyuma y'ibikorwa bye bikomeye cyane, yihanye Kristo mu buryo bubabaje cyane, kandi niko bishobora kuba byaragendekeye Sawuli w'i Taruso watotezaga itorero. Abo bose ntibujuje ibisabwa kugirango babe bagenzi bacu.

Bityo rero, bene data nkunda, nimureke dukurikize urugero rwa Yesu, twitegure hamwe n'itsinda ry'urubyiruko ruzahabwa umugabane w'inkubwe ebyiri w'Umwuka Wera kugirango iherez rigere ku isi y'imbabaro n'agahinda, itagira icyerekezo.

Iyo dusubije amaso inyuma cyangwa tukareba mu gihe cy'ahazaza, dutangira kubona neza impamvu tukiri hano: imyaka 100 bamwe bamaze biga ibyigisho, abandi bo barayirengagije; kandi nyamara turacyari hano.

Umusomyi ni we wagena niba ico ari igehe cyo kwishima cyangwa cyo gukira inguma.

Nimutyo dusabe Umwami wacu Yesu Kristo ko abana bacu n'urubyiruko rwacu bakizwa, dusabire agakiza k'abagabura bacu n'abizera bacu, kandi dusabire ubumwe bukenewe muri Kristo buzatumwa abantu basukirwa Umwuka Wera. Isaha irageze; niba tutari abo tuvuga ko turi bo, ntituzigera tubaho imibereho tuvuga ko dufite. Uko turushaho kwirata, niko turushaho gucishwa bugufi, uko turushaho kwiyorosha, niko turushaho kuzamurwa. Uwiteka Imana adufashe kwemera ukuri k'Umuhamya w'ukuri, kandi aturinde kwibaraho gukiranuka twihangiye kw'ikinyoma.

Hari ibantu bitatu bizatungurana mu ijuru:

"Hari Umukristo wigeze kuvuga ko igehe yari kuba ageze mu ijuru, yari yiteze ko yari guhura n'ibantu

bitatu bitangaje. Yari gutangazwa no kuhabona abo atari yiteze. Yari gutangazwa no kubona ko hari bamwe atari yiteze guhura na bo, kandi amaherezo, yari gutangazwa cyane no kuhabona umunyabyaha utabikwiriye, nka we ubwe, ari muri Paradizo y'Imana."⁸

Nimutyo ntitukibagirwe ko Imana iduhamagarira kugira ukwizera kurenze ibigaragarira amaso n'imibare; ukwizera gufite ireme n'uburebure bw'ikijyepfo kugaragaza mu by'ukuri imico ya Kristo. Umurimo wacu si uwo kugirango bigaragare ko turi imbaga y'abantu benshi mu maso y'abisi, ahubwo ni ukugirango tuboneke nk'abantu, boroheje kandi baciye bugufi, barabagirana umucyo w'Umukiza.

Nk'uko abantu bo mu bisekuru byabayeho mbere yacu bahanganye n'ibizazane bikomeye, natwe duhamagarirwa kugumya kuba indahemuka mu bihe by'amakuba, tukishingikiriza ku mbaraga Imana yonyine ishobora gutanga.

Kandi mu gihe dutegereje ko Umwami wacu agaruka, nimutyo tujye dusenga buri gihe tuti: "Mwami, udufashe kugaragaza imico yawe muri buri jambo ryose, na buri gikorwa cyose kugirango abisi babone muri twe ibyiringiro bitazashira."

Ijoro rirakuze, kandi isi ikeneye umucyo Kristo yaduhaye. Nimureke tube uwo mucyo. Nimutyo kandi tugire itandukaniro.

Aho Biboneka:

¹<https://thirdwaycafe.com/prepare-for-peace/living-peace/pacifism/>

²Uwifuzwa Ibihe Byose, p.773.

³Imigani ya Kristo, p.69.

⁴Ubutumwa Bwatoranyijwe, vol.3, p.386.

⁵Intambara Ikomeye, p.608.

⁶Ibihanya by'itorero, vol.5, p.644.

⁷Letters and Manuscripts, vol.16 (1901), Lt. 153, 1901.

⁸Ukwizera Kumbeshejeho, p.370.

Imbaraga ziri mu kunga 6 Ubumwe

Ku Isabato, 19 Nyakanga 2025

Byateguwe na Eli Tenorio da Silva

Muri Bibiliya yose, abizera bagirwaga inama yo kunga ubumwe, kandi na n'ubu niko bikimeze. Umunyezaburi yaravuze ati: "...ni byiza n'iby'igikundiro, ko abavandimwe baturana bahuje!" (Zaburi 133:1).

Yesu yasenze asabira abigishwa Be ati:

"Ngo bose babe umwe nk'uko uri muri jye, Data, nanjye nkaba muri wowe ngo na bo babe umwe muri twe, ngo ab'isi bizere ko ari wowe wantumye." (Yohana 17:21).

Ubumwe bw'abizera ni kimwe mu bihamya bikomeye cyane bigaragaza ukuri k'ubutumwa bwiza. Bugaragaza imico y'lmana, bukarehereza abantu kuri Kristo, kandi bukagaragariza ab'isi imbaraga ihindura y'ubuntu bw'lmana.

Mu isi igenda irushaho kwicamo ibice, yuzuyemo intambara, kutagira impuhwe, gatanya mu bashakanye, no kwikunda bikabije, ukunga ubumwe mu bwoko bw'lmana ni umucyo w'ibyiringiro, ndetse n'igihamya cy'imbaraga ituruka ku rukundo rw'lmana. Abantu benshi b'indahemuka bashakisha ikintu cyiza kiruta icy'isi ishaje ishobora gutanga, bazacengerwa n'ukuri k'ubutumwa bwiza binyuze mu rukundo n'ubumwe by'abayoboke ba Kristo, kandi bitume itorero rigera ku nsinzi mu nshingano yaryo yo kubwiriza ubutumwa bwiza ku isi yose.

"Ibanga ryo gutsinda mu murimo w'lmana rizaturuka mu gukorera hamwe kw'abantu bacu."

Ubumwe hagati y'abana b'lmana ntibugaragara nk'igitekerezo, ahubwo ni nk'ihamer yashyizweho n'lmana:

"Bene data ntibaziko ijambo ry'lmana ryerekana ingingo y'ubumwe bw'itorero nk'ihamer; abunze ubumwe na Kristo kubw'ukuri kw'ijuru bagomba kugirana ubucuti bukomeye."²

Icyakora ubwo bumwe, ntibugaragarira mu mikorere ihamye cyangwa ku bigaragarira amaso gusa. Ni umushyikirano wimbitse w'iby'umwuka, uturuka mu kuguma muri Kristo no kugaragaza imico Ye. Nimutyo rero dusuzume uko Bibiliya n'Umwuka w'Ubuhanuzi bivuga ku mbaraga ziboneka mu kunga ubumwe, inzitizi zituma hatabaho ubumwe, n'uburyo dushobora kubwimakaza muri ibi bihe bukomeye.

Uko Bibiliya iduhamagarira kunga ubumwe

Isengesho rya Yesu riri muri Yohana 17:20 – 23 ryasabiraga ubumwe abizera, ni rimwe mu masengesho Yesu yasenze ashyizeho umwete. Kandi iryo sengesho, ryavuzwe mbere yo kubambwa Kwe, ntiryari iryo gusabira abigishwa Be gusa, ahubwo ahubwo ryasabiraga abantu bose bari kuzamwizera binyuze mu buhamya bwabo, hakubiyemo na buri wese muri twe muri iki gihe:

“....ngo babe umwe rwose, ngo ab’isi bamenye ko ari wowe wantumye, ukabakunda nk’uko wankunze.” (Yohana 17:23).

Iri sengesho rihihura ko Kristo yifusa yuko abigishwa Be bunga ubumwe mu ntego, mu murimo, no mu rukundo. Ubwo bumwe buhishura ubumwe buri hagati ya Data wa twese n’Umwana. Ubwo bumwe buhamiriza ab’isi ko ubutumwa bwiza ari ukuri kandi ko buhindura.

Mu nzandiko ze, intumwa Pawulo yashimangiye iri rarika riduhamagarira kunga ubumwe. Yandikira Abefeso, yahuguriye itorero kuba “Mugire umwete wo gukomeresha ubumwe bw’Umwuka umurunga w’amahoro. Hariho umubiri umwe n’Umwuka umwe, nk’uko mwahamagarire ikiringiro kimwe cyo guhamagarwa kwanyu. Hariho Umwami umwe no kwizera kumwe n’umubatizo umwe, hariho Imana imwe ari yo Data wa twese udusumba twese, uri hagati yacu twese kandi uturimo twese.” (Abefeso 4:3 – 6).

Kuba Pawulo yarashimangiye ijumbo “umwe” bigaragaza yuko abizera bari kunga ubumwe binyuze mu kuba bari kuba basangiye ukwizera Kristo. Ubumwe si ikintu umuntu yihitiramo, ni ikintu cy’ibenze mu bigize imiterere n’umurimo by’Abadiventisiti b’Umunsi wa Karindwi Bavugurura, kandi ni ikintu cy’ibenze mu gutuma imico ya buri wese muri twe ikura, kuko turi ingingo z’umubiri wa Kristo.

“Ukuzura kw’imibereho ya Gikristo kugerwaho iyo imbaraga ihatira umuntu gufasha abandi no kubahesha umugisha ihora itemba imuturukamo. Umwuka urangwa n’uru rukundo rugose umutima w’umwizera ni wo utuma aba impumuro y’ubugingo izana ubugingo kandi ugatuma Imana ihira umurimo we.”³

Ubumwe buturuka mu mutima wahinduwe na Kristo, umutima ushaka guhesha abandi umugisha no kubakomeza aho gukorera inyungu zabo bwite.

Ubumwe nk’umuhamya uhamiriza ab’isi

Kimwe mu bintu bishishikaje cyane biranga ubumwe bwa Gikristo, ni ubushobozzi bwo guhamiriza ab’isi. Yesu yahuzaga ubumwe bw’abizera mu buryo butaziguye n’ubudahemuka bw’umurimo We:

“Ibyo ni byo bose bazabamenyeraho ko muri abigishwa banjye, nimukundana.” (Yohana 13:35).

Iyo abizera bagaragarizanya urukundo nyakuri, kwihangana, no kwicisha bugufi, biba igihama kitavuguruzwa cy’imbaraga z’ubutumwa bwiza. Abatuye iyi si irangwa no kwicamo ibice n’amakimbirane; bita cyane ku bumwe n’amahoro biranga ubwoko bw’Imana.

Itorero rya mbere ryagaragaje iryo hame. Ibyakozwe n’Intumwa 2:42 – 47 hasobanura ko abizera “bari bahuje umutima”; bagasangira ibyo kurya n’ibyo batunze bishimye kandi bafite imitima itaryarya. Ubumwe bwabo n’urukundo bakundaga ntibyakomeje ukwizera kwabo gusa, ahubwo byanakururiye abandi kuri Kristo. Ingaruka yabaye iy’uko “uko bukeye Umwami Imana ikabongerera abakizwa.” (Ibyakozwe n’Intumwa 2:47).

Umwuka w’ubuhanuzi uvuga kuri ubwo bumwe ugira uti: “Ni ubushake bw’Imana ko ubumwe n’urukundo rwa kivandimwe bigomba kubaho mu bwoko Bwayo.”⁴ Muri ubwo buryo bwonyine, nibwo itorero rishobora kuba rizima, kandi rigakora umurimo wo gukwirakwiza umucyo mu isi.

Ubumwe nyakuri bufite imbaraga zo kubwiriza ubutumwa tudashobora gukumira. Ni ikimenyetso kizima cy’ubutumwa bwiza; ni ikibwirizwa gifite imbaraga ziruta iz’amagambo y’umubwiriza w’intyoza.

Inzitizi zituma hatabaho ubumwe

Nubwo ubwo bumwe ari ingiramaro, akensi ubumwe bubangamirwa n’intege nke z’abantu no kudatungana kwabo. Ubwibone, kwikanyiza, urwikekwe, no kutabarira; ni inzitizi zikomeye. Ellen White atanga umuburo ugira uti:

“Impamu y’amacakubiri no kutumvikana mu miryango ndetse no mu itorero, ni ugutandukana na Kristo.”⁵

Iyo abizera bakuye amaso kuri Kristo, maze akaba aribo bireba ubwabo; amakubiri niyo ahita

Mu mpera z’iki cyumweru, kuki utashakisha uburyo ushobora kugira uruhare mu murimo ukorerwa mu itorero ubarizwamo? Ibyo bishobora kuba bikubiyemo gutegura ameza muriraho amafunguro ya saa sita, cyangwa se gusubiza ibibazo mu ishuri ryo ku Isabato. Dushobora kugira uruhare mu gutuma habaho ubumwe binyuze mu kugira icyo dukora.

Gusubiza amaso inyuma no
Kurabagirana

Kuvugurura bikubiyemo ibikorwa!
Nimutyo binyuze mu bikorwa byacu,
twitegure kwakira Umwuka Wera.



akurikiraho. Umwanzi w'imitima yishimira kubiba amacakubiri, kuko aziko amacakubiri aca intäge ubuhamya bw'itorero.

Intumwa Pawulo yavuze kuri ibyo bibazo mu nzandiko yandikiye amatorero ya mbere. Urugero, itorero ry'i Korinto ryarwanaga n'amacakubiri ku byerekeranye n'ubuyobozi n'impano z'Umwuka. Pawulo yabahuguye agira ati:

"Ariko bene Data, ndabingingira mu izina ry'Umwami wacu Yesu Kristo kugira ngo mwese muvuge kumwe, kandi he kugira ibice biremwa muri mwe, ahubwo muhurize hamwe rwose muhuje imitima n'inama." (1Abakorinto 1:10).

Kugirango duhangane n'inxitizi zituma tudakomeza kunga ubumwe, tugomba gushyiraho umuhati, tukicisha bugufi, kandi tukaba twiteguye gushyira umurimo wa Kristo ku mwanya wa mbere, tukawurutisha ibyo umuntu akunda.

Urufunguzo rw'ubumwe: kuguma muri Kristo

Ubumwe nyakuri hagati y'abizera ntibushobora kubaho umuntu adafitanye isano na Kristo umushyikirano wimbitse. Yesu yaravuze ati:

"Ni jye muzabibu, namwe muri amashami. Uguma muri jye nanje nkaguma muri we, uwo ni we wera imbuto nyinshi, kuko ari nta cyo mubasha gukora mutamfite." (Yohana 15:5).

Iyo abizera bagumye muri Kristo, bahindurirwa gusa na We. Bera imbuto z'Umwuka, arizo: urukundo n'ibyishimo n'amahoro, no kwihangana no kugira neza, n'ingeso nziza no gukiranuka, no kugwa neza no kwirinda." (Abagalatiya 5:22,23) – ari zo zituma habaho ubumwe. Kugirango ibyo bishoboke, ni ngombwa ko habaho kunga ubumwe na Kristo. Niba dusabana n'lmana, tuzaba imiyoboro inyuzwamo urukundo rw'lmana ruzatemba rugana ku bandi.

Uko abizera babona urukundo rw'lmana, ni nako bagira imbaraga zo gukunda no gukorera abandi. Urwo rukundo ruzira ubwikanyize ni kole ituma abagize itorero bahuriza hamwe.

Inama ya Pawulo iri mu Bafilepi 2:2 – 4 itanga intambwe z'ingirakamaro zo kwimakaza ubumwe:

"Musohoreshe umunezero wanje guhuriza imitima mu rukundo, mwibwira kumwe muhuje imitima. Ntimukagire icyo mukorera kwirema ibice cyangwa kwifata uko mutari, ahubwo mwicishe bugufi mu mitima, umuntu wese yibwire ko mugenzi we amuruta. Umuntu wese muri mwe areke kwizirikana ubwe gusa, ahubwo azirikane n'abandi."

Ubumwe busaba kwicisha bugufi, ubwitange, no kuba umuntu witeguye gukorera abandi. Izo ndangagaciro tuzigeraho binyuze mu gusabana na Kristo buri munsi, no kuba Umwuka Wera atuye muri twe.

"Muharanire ubumwe. Musengere ubumwe, kandi mugire icyo mukora kugirango ubumwe bubebo. Ubumwe buzazana ubuzima bw'iby'umwuka, buzamure intekerezo, butere imico myiza, butume ibitekerezo birangamira iby'ijuru, kandi bubabashishe kunesha ukwikanyiza no kuvuga ibibi, ndetse no kurushishwaho kunesha binyuze mu Uwabakunze akabitangira. Nimubambe inarijye, mwumve ko abandi bazaruta. Ubwo nibwo muzaba umwe na Kristo. Imbere y'ijuru, n'imbere y'itorero, n'imbere y'isi, muzatanga igihamya kidashidikanywaho ko muri abahungu n'abakobwa b'lmana. Imana izahimbarizwa mu rugero mutanga"⁶

Ubumwe mu minsi y'imperuka

Uko imperuka igenda yegereza, ubumwe bw'ubwoko bw'lmana bazarushaho gukenerwa cyane:

"Kunga ubumwe na Kristo ndetse no hagati yacu ubwacu niwo mutekano wonyine dufite muri iyi minsi y'imperuka."⁷

Ingorane no kurwanywa bizatugeraho twebwe abizera mu minsi y'imperuka, bizadusaba kunga ubumwe mu buryo bukomeye cyane. Ukwicamo ibice mu itorero bizaca intäge ubushobozi bwaryo bwo kurwanya imbaraga z'ikibi. Ubumwe mu itorero bazarigira imbaraga idashobora guhagarikwa yo gukora ibyiza mu kwamamazanya imbaraga ubutumwa bwiza bw'iteka ryo. Ubwo bumwe butera imbaraga abizera kugirango bagaragarize ab'isi ko bakunda Imana kandi ko bafite ubushake bwo kuyumvira, ndetse no mu bihe biruhije cyane bizagera ku itorero.

Ibyahihuwe 14:6 – 12 hasobanura umurimo w'itorero ryasigaye ryo mu minsi y'imperuka: ni uwo kwamamaza ubutumwa bw'abamarayika batatu mu mahanga yose, imiryango yose, indimi zose, n'amoko yose. Uwo murimo ukorerwa ku isi hose usaba umuhati uvuye ku mutima w'abizera bose, bunze ubumwe mu migambi no mu bikorwa.

Ab'isi bategerezanyije amatsiko menshi kureba icyo ukwizerwa kwawe n'ukwanje bidushishikariza gukora, kandi urukundo dukundana ni igihamya kigaragaza ukuri umuntu uwo ariwe wese adashobora guhinyura. Kandi Imana iduhamagarira kuba itorero ryunze ubumwe, ryiteguye kuyirwanirira intambara no kwihanganira ibigeragezo tuzahura na byo muri iyi minsi y'imperuka.

Uretse kuba ubwo bumwe budutegurira guhangana n'ibizaba ku itorero mu gihe giheruka, na none ubu bumwe buzaba ari igihamya gikomeye cyane kuruta ibindi byose gihamiriza ab'isi ukuri k'ubutumwa bwacu, ndetse n'urukundo rwa Kristo ruduhuriza hamwe.

Intambwe z'ingirakamaro zo kwimakaza ubumwe mu itorero

*Amatorero
ntabwo akingiwe
amakimbirane. Mu
gihe havutse ibibazo
bitera amacakubiri,
ujye uhita ubikemura
mu buryo burangwamo
ubwenge. Ujye
ukurikiza amahame
aboneka muri Bibiliya
mu gukemura ibibazo.*



Ubumwe ni ibuye rikomeza imfuruka ry'itorero ritera imbere kandi rifite amagara mazima mu by'umwuka. Muri iyi si yuzuyemo amacakubiri no kwikunda, itorero rihamagarirwa kuba umucyo urabagirana urukundo, ubwumvikane, no gufatanya. Ariko kwimakaza ubumwe bisaba gushyiraho imihati, kugira ingeso nziza, no kugira icyo umuntu akora. Dore zimwe mu ntambwe z'ingenzi umuntu ashobora gutera kugirango yubake ubumwe mu itorero kandi akomeze kubugumana.

1. Jya wibanda ku buyoboke bushingiye kuri Kristo

Ubumwe butangirira ku rufatiro rumwe rwashyizweho na Yesu Kristo.

"Ni jye muzabibu, namwe muri amashami. Uguma muri jye nanje nkaguma muri we, uwo ni we wera imbuto nyinshi, kuko ari nta cyo mubasha gukora mutamfite." (Yohana 15:5).

Iyo abizera bashyize ku mwanya wa mbere umushyikirano bagirana na Kristo, birumvikana ko barushaho kugirana ubumwe hagati yabo ubwabo. Mujye muhora muterana umwete uko mubonye uburyo bwo kugira ubuyoboke bushingiye kuri Kristo binyuze mu kwiga Bibiliya, amateraniro yo gusenga, no mu murimo w'ivugabutumwa.

2. Imenyereze ingeso yo kwicisha bugufi no kubabarira

Ubwibone no kugirana amakimbirane ni ibantu bikomeye bibangamira ubumwe. Intandaro y'amakimbirane menshi mu itorero muri iki gihe ni ikibazo cyo kwikunda ukaba nyamwigendaho, ikibazo "cy'icyo nkunda", "icyo nshaka", na "iki nicyo gitekerezo cyanjye". Nimureke twigishe kandi tugaragaze ingeso yo kwicisha bugufi binyuze mu gushyira ibyo abandi bakeneye ku mwanya wa mbere tukabirutisha ibyo twebwe dukunda:

"Ntimukagire icyo mukorera kwirema ibice cyangwa kwifata uko mutari, ahubwo mwicishe bugufi mu mitima, umuntu wese yibwire ko mugenzi we amuruta. Umuntu wese muri mwe areke kwizirkana ubwe gusa, ahubwo azirikane n'abandi." (Abafilipi 2:3,4).

Byongeye kandi, dukaneye guteza imbere umuco wo kubabarana, tukitangira gukemura ibibazo

mu buryo bwihuse kandi burangwa n'ineza. Nimushishikarize abizera b'itorero kwiyunga no kubabarana nk'uko Uwiteka yabababariye: "Mwihanganirana kandi mubabarana ibyaha, uko umuntu agize icyo apfa n'undi. Nk'uko Umwami wacu yabababariye, abe ari ko namwe mubabarana." (Abakolosayi 3:13).

3. Jya utera abandi umwete wo gushyikirana nta wugize icyo akinga undi

Iyo abantu badashyikirana ntibumvikane, bishobora kwiyongera vuba bikavamo kwirema ibice. Nimushyireho uburyo bwo kuganira ntacyo umuntu yishisha, aho abizera babona ko bumvwa kandi bubashywe. Ibi bishobora kubera mu materaniro y'itorero arimo kubaza ibibazo no gusubizwa, ibiganiro byo mu matsinda mato, amateraniro y'imirimo y'itorero aba mu gihe kidahinduka, cyangwa hagashyirwaho uburyo bwo gutanga ibitekerezo byanditse ku mpapuro mu burangwamo ibanga.

"Kandi bakore ibyiza babe abatunzi ku mirimo myiza, babe abanyabuntu bakunda gutanga." (1Timoteyo 6:18).

Abayobozi bagomba gutanga urugero rwo kuba abantu begera abandi, kandi uko gushyikirana kwabo bakabikorera mu mucyo.

4. Munyurwe no kuba mufite impano zitandukanye

Ubumwe ntibushatse kuvuga ko ibantu byose biba bisa. Mu by'ukuri, mujye mwishimira itandukaniro ry'impano, ugutandukana kw'imimerere n'imyumvire byo mu itorero. Mwemere ukuri kuboneka mu 1Abakorinto 12:12 - 14:

"Nk'uko umubiri ari umwe ukagira ingingo nyinshi, kandi nk'uko ingingo z'umubiri zose, nubwo ari nyinshi ari umubiri umwe, ni ko na Kristo ari, kuko mu Mwuka umwe twese ari mo twabatirijwe kuba umubiri umwe, naho twaba Abayuda cyangwa Abagiriki, naho twaba imbata cyangwa ab'umudendezo. Kandi twese twujujwe Umwuka umwe. Umubiri si urugingo rumwe ahubwo ni nyinshi."

Uyu murongo wo muri Bibiliya utwibutsa ko

umubiri wa Kristo ugizwe n'ingingo nyinshi zitandukanye, buri rugingo rukaba rufite umurimo warwo wihariye. Kubw'ibyo rero, kuba twunze ubumwe ntibivuga ko twese tuzakunda ibara rimwe cyangwa tukaryoherwa kimwe kuri buri kintu. Itorero rikeneye abantu bafite ibitekerezo n'ibiyumvo bitandukanye n'ibyanje, nyamara bagakomeza kwizera no kwemera inyigisho [ikubiyemo amahame twizera], bafite intego imwe yo gukorera Imana no kuyobora abantu kuri Kristo. Mu guha agaciro no gukoresha neza [impano] zitandukanye, itorero rirushaho gukomera no kugira imbaraga ihindura mu murimo waryo.

5. Mukorere hamwe

Gukorera hamwe umurimo bituma umuntu agira intego kandi akunga ubumwe n'abandi. Kugena umwanya iteraniro ry'abizera rigomba gukoromo haba mu itorero no mu muryango mugari w'abantu, byateza imbere izo mpano. Guteranira hamwe kugirango mugere ku ntego imwe, byaba ari uguisura abantu mu gace k'iwayu, urugendo rw'ivugabutumwa, cyangwa gukora umurimo w'ubwitange mu itorero, hakabaho gukorera hamwe ku ntego rusange bikomeza imishyikirano kandi bigatuma mwunga ubumwe mu buryo bwimbitse.

"Umuntu wese yatabaye umuturanyi we, akabwira mugenzi we ati "Komera."

Maze umubaji akomeza umucuzi, uhwika akomeza ucura akavuga ngo "Ibyuma twabiteranje neza." Maze akagikomereshi imisumari ngo cye kunyeganyega." (Yesaya 41:6,7).

Iyo dukorera hamwe, duterana umwete; kandi ukwizera kwacu kugakomezwa.

6. Mugire ubuyobozi bufite imbaraga

Abayobozi bafite uruhare rukomeye mu kwimakaza ubumwe: "Uko bimeze kuri rubanda, ni ko bizaba no ku batambyi." (Hoseya 4:9). Bagomba guhora bashyigikira icyerekezo cy'ubumwe, gukemura amakimbirane vuba, no gutanga urugero rwo kwicisha bugufi n'urukundo. Abayobozi kandi bagomba kwifatanya n'abandi kugirango bayobore, bakareba ko nta muntu n'umwe wumva yuko adashobora kugira uruhare mu buzima bw'Imana.

7. Musenge musaba ubumwe

Hari umugani uvuga uti: "Abashakanye basengera hamwe, bararambana." Ibyo ni nako bimeze ku bizera b'itorero basengera hamwe basaba ubumwe.

Mu gihe dusenga dusaba ubumwe, tuzaba dukoriza urugero rwo Yesu, nk'uko twabibonye, yasenze asaba ubumwe mu bizera. (Yohana 17:21 – 23).

Amasengesho ni ngombwa mu kubungabunga ubumwe. Tera umwete

iteraniro ry'abizera gusenga basabirana no gusabira itorero ryose uko ryakabaye. Amateraniro yo gusenga yibanda ku gusabira ubumwe ashobora kugira imbaraga, kubera ko atuma imitima y'abizera b'itorero ihuza n'ubushake bw'Imana.

8. Mwigishe amahame ya Bibiliya avuga ubumwe

Tugomba gushikama ku mahame ya Bibiliya, ndetse tukaba twiteguye no gupfa, bibaye ngombwa, kugirango tubere Imana indahemuka. Na none kandi dukeneye kwemera ibitekerezo by'abandi niba biterekeranye n'amahame. (Dukeneye gukura ukwikunda mu mitima yacu).

Ngisha buri gihe icyo Ibyanditswe bivuga ku byerekeranye n'ubumwe, urukundo, n'umuryango. Ibibwirizwa, amahugurwa, n'ibyigisho bya Bibiliya, bishobora gutanga urufatiro rwa tewolojiya rukanewe kugirango umuntu asobanukirwe impamvu ubumwe ari ingenzi, n'uburyo bwo kubukurikirana bugashyirwa mu bikorwa, hashingiwe ku ljambo ry'Imana.

9. Mukemure ibibazo bitera amacakubiri mubikoranye ubwenge

Amatorero ntabwo akingiwe amakimbirane. Mu gihe havutse ibibazo bitera amacakubiri, ujye uhita ubikemura mu buryo burangwamo ubwenge. Ujye ukurikiza amahame aboneka muri Bibiliya, urugero nk'aboneka muri Matayo 18:15 – 17:

"Mwene so nakugirira nabi, ugende umumenyeshe icyaha cye mwiherereye, nakumvira uzaba ubonye mwene so. Ariko natakumvira umuteze undi cyangwa babiri, ngo 'ljambo ryose rikomere mu kanwa k'abagabo babiri cyangwa batatu. Kandi niyanga kumvira abo uzabibwire Itorero, niyanga kuryumvira na ryo, azakubeho nk'umupagani cyangwa umukoresha w'ikoro."

Ni gute dufata umupagani cyangwa umukoresha w'ikoro iyo baje mu rusengero rwacu? Nimutyo dukomeze kugira uwo mwuka w'ubuntu n'ineza ku bantu bo muri twe bakoze amakosa, kandi dushake uburyo bwo gukemura ibibazo butuma habaho kubaha Kristo n'ubumwe bw'umubiri We.

10. Mushishikarize abantu umubano mwiza uko ibisekuru biha ibindi

Imishyikirano hagati y'abantu bo mu bisekuru bitandukanye, ituma itorero rikungahara. Guteza imbere amahirwe yo guhugurwa, gufatanya ibikorwa, n'ubusabane, biziba icyuho gitandukanya ibisekuru. Abizera bakiri bato bashobora kwigira ku bwenge bw'abakuze, mu gihe abasheshe akanguhe bashobora guterwa umwete n'imbaraga z'urubyiruko n'uburyo abasore babona ibintu.

Imana ishaka ko abantu bo mu bisekuru



bitandukanye, bafite imbaraga, ubumenyi, n'ubunararibonye bitandukanye; bakorera hamwe bunze ubumwe:

"Ndabandikiye bana bato, kuko.....
Namwe ba se, ndabandikiye kuko.....
Ndabandikiye basore, kuko.....
(1Yohana 2:12 – 14)

Umwanzuro

Incuti yanje yari igiye gutakaza ukwizera kwayo nyuma yo kugirana amakimbirane na bene data bamwe na bamwe bo mu itorero. Yarambwiyete ati: "Sinemera ko abantu bava mu Badiventisiti b'Umunsu wa Karindwi Bavugurura kubera ikibazo cy'inyigisho [ikubiyemo amahame twizera]". Ibye byatumye ntekereza ku bantu benshi baretse ukwizera kwabo, ntitaye ku byo bo bavuga, mu by'ukuri biterwa no kubura ubumwe mu bizera. Kutagira ubumwe bishobora kwica itorero; naho ubumwe bugatuma itorero rigera ku nsinzi mu gusohoza inshingano yaryo yo kuyobora abantu kuri Kristo.

Guteza imbere ubumwe mu itorero, si ikintu umuntu akora rimwe gusa, ahubwo ni ikintu umuntu akomeza gukora ubutarambirwa. Bisaba kugira ubushake, kwihangana, no kwishingikiriza ku Umwuka Wera. Binyuze mu gushyira mu bikorwa izi ntambwe z'ingirakamaro, amatorero ashobora kuba ahantu harangwa n'urukundo n'ubwumvikane, bigatuma aba igihamya gikomeye gihimiriza ab'isi ubuntu bw'Imana buhindura. Nk'uko muri Zaburi 133:1 habitwibutsa, "...ni byiza n'iby'igikundiro, ko abavandimwe baturana bahuje!"

Binyuze mu ijambo Rye, muri iki gihe Kristo araturarikira kugira intego mu mitima yacu, kandi kubw'ubuntu Bwe dukore uko dushoboye kose kugirango dusohoze isengesho Rye kandi twunge ubumwe na bene data.

"Ntimukitotombe cyangwa ngo mugire uwo mushakaho amakosa. Nimuhange amaso Yesu, ishusho ya Kristo yandikwe mu mutima

maze igaragarire mu mwuka, mu magambo, no mu murimo nyakuri dukorera bagenzi bacu. Umunezero wa Kristo uri mu mitima yacu, n'umunezero wacu uruzuye. Uko niko iyobokamana nyakuri rimeze. Nimureke duharanire kurigeraho, kandi tube abagwaneza n'abanyabwuzu, tugire urukundo mu mitima yacu; urwo rukundo nirwo rutemba rugana ku bandi kandi rukagaragarira mu mirimo myiza, nirwo rumurikishiriza ab'isi umucyo, rugatuma umunezero wacu wuzura."⁸

Kibw'ibyo rero, ndabinginze ayo magambo nimuyagire ayanyu: uhereye none kubw'ubuntu bwa Kristo, sinzongera kwitotomba cyangwa gushaka amakosa kuri bagenzi banje. Nzaba umugwaneza, ngire urugwiro, kandi ngire urukundo mu mutima wanje, sinzavuga nabi abandi, sinzababeshyera, cyangwa ngo mbassebye. Nzunga ubumwe na bene data, kandi uko bishoboka kose nzabana n'abantu bose amahoro (Abaroma 12:18). Mu izina rya Yesu, Amena.

Aho biboneka:

¹Urwibutso n'Integuza, kuwa 2 Ukuboza, 1890.

²The 1888 Ellen G. White Materials, p.1141.

³Ibyakozwe n'Intumwa, p.551.


⁴Abakurambere n'Abahanuzi, p.520.

⁵Urugo rwa Kidiventisiti, p.179.

⁶Inama Zigirwa Itorero, p.290.

⁷Ibihamya by'Itorero, vol. 8, p.240.

⁸The Upward Look, p.268.



Kunesha no Gukome - za Kunesha

Kuwa Mbere, 20 Nyakanga 2025

Byateguwe na A. C. Sas

Ijambo "kunesha" rishobora kugira ubusobanuro bwinshi butandukanye. Rishobora gusobanura: gutsinda, kwigarurira, gufata, no kubona insinzi.

Muri Bibiliya tubonamo amagambo "agenda anesha kandi ngo ahore anesha" incuro imwe gusa mu Byahishuwe 6:2. Ibi byanditswe mu gihe cy'itorero rya mbere rya Gikristo, byerekeza ku uwagenderaga ku ifarashi y'umweru uvugwa mu buhanuzi buvuga iby'ikimenyetso cya mbere. Iyo mico igaragaza mu buryo bukwiriye imibereho n'umurimo by'Umwami wacu Yesu Kristo, uko yari ameze mu murimo We wo ku isi, yaraneshaga kandi agakomeza kunesha.

Igihe Yesu yavuganaga n'abigishwa Be yaragize ati: "Ibyo mbibabwiriye kugira ngo mugire amahoro muri jye. Mu isi mugira umubabaro, ariko nimuhumure nanesheje isi." (Yohana 16:33). Mu murimo We wa buri munsi yakoze imyaka itatu n'igice ku isi ari Umwana w'umuntu, Umukiza wacu yahoraga anesha. Urugero, akimara kubatizwa, yatsinze Satani igihe yamugeragerezaga mu butayu.

"Umutware w'ab'iyi si araje, niko Yesu avuga, kandi ntacyo amfiteho." (Yohana 14:30). Nta na kimwe cyari muri We cyabashaga kumvira ubuhendanyi bwa Satani. Ntiyigeze yemera gukora icyaha. Ndetse no mu bitekerezo ntiyigeze aneshwa n'igishuko....

"Kandi uko ibi bishoboka, Kristo yarabitweretse. Ni mu buhe buryo yatsinze urugamba rwa Satani? Ni mu ijambo ry'Imana. Ni mur'ryo jambo gusa yabashije gutsindira ibigeragezo. "Handitswe Ngo", ni yo yari intero ye."¹

Mu gihe cyose cy'umurimo We wo ku isi, Kristo yabaye "umuneshi", ariko insinzi ye iheruka yayibonye igihe yavugaga amagambo agira ati: "Birarangiye" (Yohana 19:30). Amagambo ngo "nanesheje isi" yasohoye mu buryo nyabwo ubwo Umukiza wacu yarangizaga umurimo wo kuducungura ku musaraba. Yanesheje Satani maze amunyaga isi yari yarigaruriye binyuze mu buriganya, isi yari yaravanywe mu maboko ya Adamu na Eva mu buryo burangwamo ubugome. Ubu noneho "Ubwami bw'isi bubaye ubw'Umwami wacu n'ubwa Kristo we, kandi azahora ku ngoma iteka ryose." (Ibyahishuwe 11:15).

Nyuma yo kuzukwa Kwe, Umwami wacu w'umuneshi yaravuze ati: "Nahawe

ubutware bwose mu ijuru no mu isi." (Matayo 28:18). Abamuagarariye ku isi yabasezeraniye kubaha imbaraga zo kunesha no gukomeza kunesha. Yaravuze ati: "Nimugende mwigisha muti 'Ubwami bwo mu ijuru buri hafi! Mukize abarwayi, muzure abapfuye, mukize ababembe, mwirukane abadayimoni. Mwaherewe ubusa, namwe mujye mutangira ubundi." (Matayo 10:7,8).

Kugirango rya sezerano rya Yesu rishobore gusohora, abizera bakwiriye guhabwa imbaraga zihariye zituru ka Umwuka Wera. Ntibagomba no kugerageza gukora umurimo w'Umwami badafie iyo mbaraga. Idahari, ntibari gushobora gutsinda. Bagombaga kuguma i'Yerusalem bihanganye, bakahamara iminsi icumi bategereje guhabwa imbaraga basezeraniwe. Yesu yaravuze ati: "Kandi dore ngiye kuboherereza ibyo Data yasezeranye, ariko mugume mu murwa kugeza ubwo muzambikwa imbaraga zivuye mu ijuru." (Luka 24:49).

[Isezerano] ryasohoye ku munsi wa Pentekote

Bibiliya itubwira inkuru y'ikintu cyihariye cyabaye:

"Umunsi wa Pentekote usohoye, bose bari bari hamwe mu mwanya umwe bahuje umutima. Nuko umuriri ubatungura uvuye mu ijuru umeze nk'uw'umuyaga uhuha cyane, ukwira inzu bari bicayemo. Haboneka indimi zigabanije zisa n'umuriro, ururimi rujya ku muntu wese wo muri bo. Bose buzuzwa Umwuka Wera, batangira kuvuga izindi ndimi nk'uko Umwuka yabajaye kuzivuga. Muri Yerusalem habaga Abayuda b'abaturage b'abanyadini, bari baraturutse mu mahanga yose ari munsi y'ijuru." (Ibyakozwe n'Intumwa 2:1 – 5).

Umwuka w'Ubuhanuzi uduha ubundi busobanuro ku byabaye nyuma y'uko abigishwa bujujwe Umwuka Wera:

"Umwuka yatanzwe ku munsi wa Pentekote. Abahamya ba Kristo bamamaje Umukiza wazutse bafite imbaraga. Umucyo wo mu ijuru watamuruye umwijima wari ubuditse ku bwenge bw'abantu bari barashutswe n'abanzi ba Kristo. Noneho bamubonye ashirwa hejuru ngo abe "Ukomeye n'Umukiza, aheshe Abisirayeli kwihana no kubabarirwa ibyaha." (Ibyakozwe n'Intumwa 5:31). Bamubonye agoswe n'ubwiza bw'ijuru, afite ubutunzi butagira akagero mu biganza bye, kugirango abuhe abantu bose bifusa guhindukira bakareka ubwigomeke bwabo. Mu gihe intumwa zamamazaga ubwiza bw'Umwana w'ikinege wa Se, abantu ibihumbi bitatu barihannyne. Bateye abo bantu kwibona nk'uko bari koko; nk'abanyabyaha n'abanduye, naho Kristo akaba incuti yabo n'Umucunguzi wabo. Kristo yarererejwe, kandi yahaweye icyubahiro binyuze mu mbaraga y'Umwuka Wera uri mu bantu. Binyuze mu kwizera, abo bizera bamubonye nk'uwihanganiye igisuzuguriro, imibabaro, n'urupfu; kugirango batarimbuka, ahubwo bahabwe ubugingo buhoraho. Guhishurwa kwa Kristo kubw'Umwuka byabateye gusobanukirwa imbaraga Ze n'ubushobozi Bwe, maze bamuramburira ibiganza kubwo kwizera bagira bati: 'Ndizeye.'

"Nuko ubutumwa bwiza bw'Umukiza wazutse bujyanwa mu turere twa kure cyane dutuwe two ku isi. Itorero ryabonye abihana barigana baturutse impande zose. Abizera [barisanzwemo] bongeye kwihana barahinduka na none. Abanyabyaha bifatanyije n'Abakristo mu gushakisha imaragarita y'agaciro kenshi."¹²

"Ku munsi wa Pentekote Imana ihoraho yihishuriye itorero ifite ububasha. Kubw'Umwuka Wayo Wera yaturutse mu ijuru mu buryo bw'ishuheri y'umuyaga uhuha cyane, iga mu cyumba abigishwa bari bateraniyemo. Ni nk'aho iyo mbaraga yari imaze igihe kirekire ihagaritswe, none ubu ijuru rikaba ryari kuba ryishimiye kuba ryarashoboye gusuka ku itorero ubutunzi bw'imbaraga z'Umwuka. Kandi babishobojwe n'Umwuka, abantu bavuze amagambo yo kwihana no kwatura ibyaha yajyaniraga n'indirimbo zo guhimbaza kubw'ibyaha byababariwe. Amagambo yo gushimira n'ay'ubuhanuzi yarumvikanye. Ijuru ryose ryarunamye kugirango ryitegerezze kandi ryishimire ubwenge bw'Urukundo rutarondoreka, kandi rutagerwa. Intumwa n'abigishwa batangajwe n'ibyo babonye maze baravuga bati: "Mbega urukundo!" (1 Yohana 4:10). Impano bahawe bayakiranye uburemere. Ni iki cyakurikiyeho? Abantu babarirwa mu bihumbi bihannyne mu munsi umwe. Inkota y'umwuka yari iherutse gutyazwa cyane kandi yogeshwa umurabyo w'ijuru, yishakiye inzira ikata ukutizera."¹³

Nyuma ya Pentekote

Isezerano ry'imbaraga yo kunesha ntiryahawwe abigishwa ba mbere gusa. Ahubwo ryanahawwe abayoboke ba Kristo bo mu bihe byose. Buri mwigishwa wa Kristo wese wahindutse by'ukuri ashobora kubona ubwo buntu. Nubwo umurimo wabo uba urimo ibibazo n'ibirushya, ntibacika intäge ngo bacogore. Bakomeza kujya mbere bagana ku nsinzi. Muri uwo murimo, ntibakora bonyine. Bahabwa ubufasha buturutse ku Uwabasezeraniye kubana na bo, "kugeza ku mperuka y'isi" (Matayo 28:20).

Byaba byiza dusubije amaso inyuma tukanyura muri ibyo bitabo, maze tukongera gusoma ibice byadukoze ku mutima ku ncuro ya mbere. Nimutyo dutekereze ku butumwa butangwa n'Umwuka Wera.

Gusubiza amaso inyuma no Kurabagirana

Kuvugurura bikubiyemo ibikorwa!
Nimutyo tugagarize umucyo wa Kristo mu bikorwa byacu:



Umwuka w'ubuhanuzi utubwira ibisabwa kugirango tubone insinzi, tukanesha:
"Abakozi b'lmana bagomba kugira ubunarabonye bwimbitse kurushaho. Niba bazayegurira byose, Imana izabakorera ibikomeye. Bazashinga ibendera ry'ukuri mu birindiro bya Satani, maze bageze igihe bazarangurura insinzi mu ijwi rirenga. Bafite inkovu z'intambara, ariko bahabwa ubutumwa bw'ihumure buvuga ko Uwiteka azabayobora, bakanesha ndetse bagakomeza kunesha."⁴

"Uwiteka yifuza ko ibisonga Bye basohoza inshingano zabo mu budahemuka mu izina Rye no mu mbaraga Ze. Binyuze mu kwizera ijambo Rye no gushyira mu bikorwa ibyo ryigisha, bashobora kujya mbere banesha kandi bakagumya kunesha."⁵

Urugamba rukomeye

Mu ntambara ikomeye yo mu buryo bw'umwuka barwana n' "n'abatware n'abafite ubushobozi n'abategeka iyi si y'umwijima, n'imyuka mibi y'ahantu ho mu ijuru" (Abefeso 6:12), rimwe na rimwe abagaragu b'lmana baratsindwa; siko buri gihe baba abaneshi. Ariko uko gutsindwa kugaragara, kugera aho kukavamo insinzi y'agahebuzo. Dusoma amagambo agira ati:

"Mu iyerekwa nabonye imitwe ibiri y'ingabo ziri mu ntambara iteye ubwoba. Umutwe umwe w'ingabo waru uyobowe n'amabendera ariho ikimenyetso cy'isi; nahoh undi mutwe w'ingabo uyobowe n'bendera risizeho amaraso y'Igikomangoma Imanweli. Amabendera yagiye arambikwa hasi mu mukungugu urukurikirane ubwo amatsinda yagendaga akurikirana ava mu ngabo z'Uwiteka maze akifatanya n'umwanzi. Ku rundi ruhande, amoko yagiye akurikirana ava mu mirongo y'ingabo z'umwanzi maze akifatanya n'ubwoko bw'lmana bukomeza amategeko yayo. Marayika wagurukaga aringanije ijuru yashyize ibendera rya Imanweli mu biganza byanje, ari nako umugaba w'ingabo w'umunyambaraga yarangururaga n'ijwi rirenga ati: "Nimuze mu murongo." Nimutyo noneho ab'indahemuka ku Mana no guhamya kwa Kristo bafate ibirindiro byabo. Nuko muve hagati ya ba bandi mwitandukanye; niko Uwiteka avuga, kandi ntimugakore ku kintu gihumanye. Nanje n забакира, kandi nzababera So, namwe muzambere abahungu n'abakobwa. Mureke abazaza kuvuna Uwiteka bose, bakaza gutabara Uwiteka mu kurwanya abakomeye.

"Intambara yarakomeje. Insinzi yagiye iva ku ruhande rumwe ijya ku rundi. Noneho abasirikare b'umusaraba batanzie inzira 'nk'uko iyo utwara ibendera yiheba' (Yesaya 10:18). Ariko uko bigaragara, ukuba barasubiye inyuma, byari ukugirango bagere ahantu heza kurushaho. Ursaku rw'ibyishimo rwarumvikanye. Indirimbo yo guhimbaza Imana yarazamutse, kandi amajwi y'abamarayika yifatanyije n'ijo ndirimbo,

mu gihe abasirikare ba Kristo bashyiraga ibendera Rye ku nkuta z'ibikingi by'ingabo zari zarafashwe n'umwanzi. Umugaba w'agakiza kacu niwe wategekaga urugamba kandi akohherereza abasirikare Be ubufasha. Imbaraga Ze zagaragajwe mu buryo bukomeye, zitera abasirikare gukomeza urugamba kugeza ku marembo y'umudugudu. Yabigishije ibantu biteye ubwoba mu byerekeranye no gukiranuka mu gihe yabayoboraga intambwe ku yindi, bakanesha kandi bagakomeza kunesha.

"Amaherezo insinzi yagezwaho. Ingabo zari zikurikiye ibendera ryanditseho ngo: 'Amategeko y'lmana no kwizera kwa Yesu', zari zatsinze mu buryo buhebuje."⁶

"Ikibazo cy'urugamba ntkireba imbaraga z'umuntu upfa. 'Uwiteka azatabara ari intwari, arwane ishyaka nk'intwari mu ntambara, azivuga arangurure ijwi, ababisha be azabakoreraho ibikomeye.' Mu mbaraga z'Uwo ugendera ku ifarashi ugenda anesa kandi ngo ahore anesa, umuntu w'umunyantege nke kandi upfa, ashobora kubona insinzi."⁷

Mu gihe cy'imvura y'itumba

"Itsinda ry'Abadiventisiti ryo mu myaka ya 1840 – 1844 ryabaye ukwigaragaza gukomeye kw'imbaraga z'lmana; ubutumwa bwa Marayika wa mbere bwabwirijwe mu isi n'abakorerabushake, kandi mu bihugu bimwe na bimwe habaye gukura mu by'idini, aribyo byagaragajwe n'ivugurura rikomeye ahantu hose uhereye mu kinyejana cya cumi na gatandatu, ariko umusozo wabyo ugomba kuba itsinda rikomeye rifite umuburo w'ubutumwa bwa Marayika wa gatatu. Abagaragu b'lmana, bafite mu maso harabagirana kandi hakamurika ukwiyegurira Imana kwera, bihitira kuva ahantu hamwe bajya ahandi kwamamaza umuburo uvuye mu ijuru. Ubutumwa buzatangwa n'amajwi abarirwa mu bihumbi, hiryu no hino ku isi. Ibitangaza birakorwa, abarwayi bagakizwa, kandi ibimenyetso n'ibitangaza bikurikira abizera. Satani na we akora ibitangaza by'ibinyoma, ndetse akanamanura umuriro uvuye mu ijuru abantu babireba. Bityo rero, abatuye isi bashishikarizwa kugira aho bahagarara."⁸

"Mu mayerekwa ya nijoro neretswe habaye ivugurura mu bwoko bw'lmana. Bensi bahimbaza Imana. Abarwayi bakize indwara, n'ibindi bitangaza byarakozwe. Umwuka wo gusengera abandi waragaragaye, ndetse nk'uwaragaragaye mbere y'umunsi wa Pentekote. Abantu ibihumbi n'ibihumbi babonetse basura imiryango kandi babigisha ijambo ry'lmana. Imitima yahinduve n'imbaraga y'Umwuka Wera kandi umwuka wo guhinduka nyakuri warigaragaje. Imiryango yakinguriwe kwamamaza ukuri ku mpande zose.

Ikibazo cy'urugamba ntikireba imbaraga z'umuntu upfa. Mu mbaraga z'Uwo ugendera ku ifarashi ugenda anesha kandi ngo ahore anesha, umuntu w'umunyantege nke kandi upfa, ashobora kubona insinzi.



Isi yasaga n'aho imurikiwe n'ububasha bw'ijuru. Imigisha y'agahebuzo yahawe ubwoko bw'lmana nyakuri kandi bwicisha bugufi. Numvise amajwi ashima kandi ahimbaza, kandi byasaga n'aho hari ivugurura nk'iryo twabonye mu mwaka wa 1844.⁹

"Itorero rigomba kwinjira mu rugamba ruheruka ryambaye intwaro yo gukiranuka kwa Kristo. Itorero ari "ryiza nk'ukwezi, rirabagirana nk'ikizubazuba, riteye ubwoba nk'igitero cy'ingabo kigendana ibendera" (Indirimbo ya Salomo 6:10), rigomba kujya mu isi yose rinesha ndetse rigakomeza kunesha."¹⁰

"Numvise ba bandi bari bambaye intwaro bamamaza ukuri mu mbaraga ikomeye. Ukuri kwagize umusaruro. Nabonye abari bamaze igihe baboshywe; abagore bamwe bari baraboshywe n'abagabo babo, kandi abana bamwe na bo bari baraboshywe n'ababyeyi babo. Abantu batari indyarya bari barakumiwe cyangwa bakabuzwa kumva ukuri, noneho bakwakiranye ubwuzu bwinshi. Ubwoba bwose bari bafite kubwo gutinya bene wabo bwari bwashize. Kuri bo ukuri konyine niko kwari hejuru y'ibindi byose. Bagukundaga bihebuje kandi kwarushaga agaciro n'ubuzima ubwabwo. Bari bamaze igihe bafite inzara n'inyota byo kumenya ukuri. Nabajije icyari cyateye iyi mpinduka ikomeye. Marayika yaransubije ati: "Ni imvura y'itumba, ni ihemburwa riturutse imbere y'Uwiteka, ni ijwi rirenga rya marayika wa gatatu."

"Imbaraga ikomeye yari kumwe n'abo batoranyiwe."¹¹

"Abagaragu b'lmana bazaba bafite mu maso harabagirana kuko berejwe gukora umurimo wera, bazaba banyuranamo hirya no hino bafite umwete mwinshi wo gutangariza abantu bose ubutumwa mvajuru. Amajwi y'abantu ibihumbi byinshi azaba arangirira ku isi atanga umuburo uheruka. Ibitangaza bizakorwa, abarwayi bakizwe kandi ibimenyetso

n'ibitangaza bizagaragarira abizera. Icyo gihe Satani nawe ariko, azakora ibitangaza biyobya, ndetse azamanura umuriro mu ijuru imbere y'amaso y'abantu. Ibyahishuwe 13:13. Icyo gihe abatuye ku isi bose, bazaba bagomba kugira uruhande bahereramo.

"Ubu butumwa ntibuzarangizwa n'amagambo menshi y'impaka ahubwo buzbarangizwa no kunyurwa kubwo kwemezwa n'Umwuka w'lmana. Ibibazo bizaba byararangiye. Imbuto zizaba zarabibwe, ubwo zizaba zitangiye gukura no kwera imbuto. Ibitabo byatanzwe n'ababwirizabutumwa b'abanyamwete bizaba byarigaruriye imitima myinshi, nyamara imitima myinsi yanyuzwe nabwo izaba yarabujije gusobanukirwa n'ukuri cyangwa kukugenderamo. Noneho imirasire y'umucyo w'ubutumwa bwiza izarasira ahantu hose, maze ukuri kose kumenyekane, abana b'lmana b'indahemuka bacagagure ingoyi zari zarababoshye. Amasano y'imiryango, n'amatorero yabo ntibizaba bigifite imbaraga zo kubaherana. Ukuri kurusha agaciro ibindi byose. Nubwo hazaba imbaraga zikomeye zirwanya ukuri, umubare munini uzamasha guhagarara mu ruhande rw'lmana."¹²

"Urukundo rwa Kristo, urukundo rw'abavandimwe bacu, ruzahamariza ab'isi ko twabanye na Yesu kandi ko twamwigiyeho. Ubwo nibwo ubutumwa bwa marayika wa gatatu buzamamazwa mu ijwi rirenga, kandi isi yose izamurikirwa n'ubwiza bw'Uwiteka."¹³

Irarika ritanzwe mu gihe gikwiriye

"Inshingano ziri imbere yacu izo umuntu akwiriye gusohoza, tugomba kuzikora kandi ntitwirengagize kuzisohoza, ngo ni uko zidahuje n'ibyifuzo byacu.



Tugomba gutoza umutima gushyiraho umwete, tukikorera imitwaro, kandi tugakora imrimo ahatuzengurutse hose, kandi tukagira imbaraga zo kwitsinda ubwacu no kunesha ibirushya. Aho kugirango tube ibiremwa bizima mu mimerere yacu, dushobora kuba abatware muri iyo mimerere yacu, kandi dushobora kunesha inzitizi.”¹⁴

“Ubu turi ku rugamba. Nta gihe cyo kuruhuka, nta gihe cyo kwidagadura, nta gihe cyo kwinezeza. Iyo umaze kugira icyo ugeraho, ukwiriye kongera kurwana urugamba; ukwiriye kunesha kandi ugakomeza kunesha, ugahuriza hamwe imbaraga kugirango uneshe urugamba. Burī nsinzi yose igezweho ituma umuntu arushaho kugira ubutwari, ukwizera, n’uburwanashyaka. Binyuze mu mbaraga z’lmana, uzagaragaza ko ushobora kunesha abanzi bawe.”¹⁵

“Imana yifuzaga ko ubwoko Bwayo buyumvira kuko bari basobanukiwe ko kumvira byari gutuma baba abagabo n’abagore bajijutse. Ababaga bafite ubushake bwo kumvira yabakuruzaga imirunga y’urukundo. Yifuzaga ko ubwoko Bwayo bujya mbere butsinda kandi bugakomeza kunesha. Ni ihirwe ryabo ko bahishurira mu mibereho yabo imico y’umuyobozi wabo. Ubugingo bw’abagabo n’abagore bufite agaciyo katarondoreka mu maso y’lmana. Nk’uko benshi babivuga, bidatewe n’uko bafite ukudapfa kwa kamere, ahubwo bitewe n’uko kubwo kwizerwa bashobora kuronka ukudapfa. Kristo ni we wenyine ufite ukudapfa. Kumwizerwa ni nk’imbuto y’ubugingo bushya ku muntu wihannye.”¹⁶

“Abakozi b’lmana bagomba kugira ubunararibonye bwimbitse kurushaho. Niba bazayegurira byose, lmana izabakorera ibikomeye. Bazashinga ibendera ry’ukuri mu birindiro bya Satani, maze bageze igihe bazarangurura insinzi mu ijwi rirenga. Bafite inkovu z’intambara, ariko bahabwa ubutumwa bw’ihumure bувуга ko Uwiteka azabayobora, bakanesa ndetse bagakomeza kunesha.”¹⁷

“Uwiteka yifuza ko ibisonga Bye basohoza inshingano zabo mu budahemuka mu izina Rye no mu mbaraga Ze. Binyuze mu kwizerwa ijambo Rye no gushyira mu bikorwa ibyo ryigisha, bashobora kujya mbere banesha kandi bakagumya kunesha.”¹⁸

“Abana b’Umwami w’ljuru barwanira imbere y’lmana nyir’ljuru n’isi, kandi ibi byakagombye gutuma twitegura intambara, bikatwerekeza ku kunesha kandi tugakomeza kunesha.”¹⁹

“Urukundo rwa Kristo, urukundo rw’abavandimwe bacu, ruzahamariza ab’isi ko twabanye na Yesu kandi ko twamwigiyeho. Ubwo nibwo ubutumwa bwa marayika wa gatatu buzamamazwa mu ijwi rirenga, kandi isi yose izamurikirwa n’ubwiza bw’Uwiteka.”



Aho biboneka:

¹Uwifuzwa Ibihe Byose, p.123.

²Imigani ya Kristo, p.120.

³Ibihamya by’itorero, vol.7, p.31.

⁴Urwibutso n’Integuza, kuwa 17 Nzeri, 1903.

⁵Inama ku Babyeyi, Abarimu, n’Abanyeshuri, p.353.

⁶Ibihamya by’itorero, vol.8, pp.41,42.

⁷Ubusobanuro bwa Bibiliya [E. G. White Comments], vol.4, p.1146.

⁸Umwuka w’Ubuhanuzi, vol.4, pp.429,430.

⁹Ibihamya by’itorero, vol.9, p.126.

¹⁰Imiberaho Yanje y’Uyu Munsi, p.311.

¹¹Inyandiko z’lbanze, p.271.

¹²Intambara Ikomeye, p.612.

¹³Ibihamya by’itorero, vol.6, p.401.

¹⁴Manuscript Releases, vol.15, pp.240,241.

¹⁵Ibimenyetso by’Ibihe, kuwa 7 Nzeri, 1891.


¹⁶Urwibutso n’Integuza, kuwa 10 Nyakanga, 1900.

¹⁷Ibid., Kuwa 17 Nzeri, 1903.

¹⁸Manuscript Releases, vol.8, p.161.

¹⁹Ibimenyetso by’Ibihe, kuwa 4 Mata, 1895.

Uko Amateka Yakurikiranye



Wowe se ufite uwuhe Mwuka?

Byateguwe na Eliza H. Morton

Mwene data, ni uwuhe mwuka ufite?
Ni uwuhe mwuka ufite, ncuti yanjye?
Waba se ufite Umwuka wa Kristo, Umukiza wawe?
Umwuka yari yarasezeranye kuzohereza?

Umwuka utanga ihumure?
Umwuka uyobora abantu ku gusenga?
Umwuka utuma bashaka gusabana
Na Yesu ahantu hose?

Umwuka utuma umuntu yicisha bugufi?
Umwuka w'urukundo n'imbaraga?
Umwuka wita ku bandi buri kanya,
Buri munsi, buri saha?

Muri iki gihe, umwuka w'ikibi
usendereye mu gihugu
ni uwuhe mwuka uri kukuyobora, ncuti
Kandi ukaba uri kuyobora ubwenge bwawe, n'ibyo
uvuga

Nibyo, Satani n'ingabo ze zose
bakorera mu mitima y'abantu bo mu isi
Kugirango babashyire kure y'ubwiza bw'lmana
Babarohe mu rwobo rw'umubabaro.

Ukwizerera niko kuzana Umwuka,
w'lmana mu buggingo bwawe n'ubwanjye
Nuko rero, byukä, kändi utegerezze isezerano
Byuka, kandi umucyo wawé umurike